

## **Revelation Angkentye Jesus-elarle John-eke imerneke**

*Ayeye nhenhele ileme nthakenhe-arle-irretyenhe apmere ahelhe nhenhenge*

<sup>1</sup> Ayenge John arritnye aneme, ayenge Jesus Christ-eke warrke-irreme. Pipe nhenhele ileme angkentye nhenge Ngkartele-arle Jesus Christ-eke imerneke. Ngkartele ikwere imerneke nhenge yanhe-ngentyele re warrkene ikwerenhe areye iletynhenge arne areye lyete ware nthakenhe-arle-irretyenhe. Christ-ele alkere-arenye ikwerenhe yerneke atyenge-werne apetyetyeke arne yanhe areye atyenge imernetyenhenge. <sup>2</sup> Alkere-arenye yanhele arne ingkirreke anthurre atyenge imerneke. Lyete anteme the pipe-ke intelhe-ileme arne ingkirreke tharle areke aweke-arle anteye. Nhenhe kwenhe ayeye arratye anthurre Ngkarte-kenhe aneke Jesus-elarle alkere-arenyeke imerneke. <sup>3</sup> Kenhe Ngkarte kwenhe akangkemele aneme nhenge tyerrtye areyele angkentye nhenhe renhe aharlperre read-eme-ilerlengge. Ngkarte atnerte akangkemele anthurre-arlike aneme nhenge tyerrtye areyele angkentye nhenhe renhe aywerrkele awerlengge mpwaremele. Alakenhe ikwerenge anteme arrantherre ingkirrekele kwenhe angkentye nhenhe renhe read-eme-ilettyeke, mwantyele awemele, aywerrkele

mpwaremele arne nhenhe areye-arle kwenhe, nhenge Jesus-elarle atyenge imerneke, lyete ware anetyenhenge.

<sup>4</sup> Ye, the kwenhe lyete pipe nhenhe arrekatherre-werne yerneme nhenge Ngkarterle arratyte itelaremeke nhenge apmere yanhe-arle anemeke Asia-ele, apmere 7-elarle anemeke, pipe arrekatherrenhe-arrpe-kenhele apurte-irrerlte-anemele Ngkarterle akertne utyernerlte-anetyeke tnakemele.

Ngkarterle kwenhe itethe akwete-ante-arle anerle-aneme. Urreke arne ingkirreke anthurre anetyenhenge, Re kwenhe itethe aneke. Arle lyete anteme re itethe akwete aneme, Re itethe akwete-ante anetyenhe. The kwenhe Renhe apayuthneme arrenhantherrenhe mwantye-mwantye-iletayeke, nhenge yanhengentyele arrantherre apurte akwete mwerre anetyenhenge. The kwenhe utnenge 7-pele yanhe areye-inpe apayuthneme akwetethe-arle Ngkartenge arrekwele tnerlte-anemeke, itne Renhe apayuthnetyenhenge, arrenhantherrenhe mwantye-mwantye-iletayeke anteye. <sup>5</sup> Kele the Jesus Christ apayuthneme arrenhantherrenhe mwantye-mwantye-iletayeke anteye, nhenge yanhengentyele arrantherre apurte mwerre anetyenhenge. Re apmere ahelhe nhenhe-werne apetyemele ayeye arratyte Ngkarterle akerte akwetethe iletayarte, ikwere-iperrele anteme re ilweke. Ngkarterle anteme Renhe itethe akemelhe-ilirtneke nhenge irrerlkngelarle inteke-iperrele. Kele arle lyete anteme re alartetye anthurre irreke-arle alartetye arrpenhe

ingkirreke anthurreke apmere ahelhe nhenhele-  
arle anemeke. Re kwenhe arrekwele-ipenhe  
aneme Ngkartele-arle itethe akemelhe-ilirtneke  
apmere ahelhe nhenhele. Urreke anwerne  
anteme itethe-irritnetyenhe nhenge ilweke-  
arle-iperre.

Anwerne kwenhe Jesus Christ akertne  
utyernerlte-aneme tnakewarremele. Re kwenhe  
anwerneke ahentye anthurre aneme. Re  
anwernenhe mwantyele arntarnte-areme  
nhenge Ngkartele anwernenhe atweme-ketye  
arne akurne areye-arle anwerne mpwarekenge.  
Re kwenhe yanhe renhe mpwareke alhwe  
ikwerenhe-arrpe thelelhemele nhenge re ilweke  
nhenge arne arntarlkweke-arlenge arlpere  
anemele. <sup>6</sup> Re kwenhe anwerne-kenhe alartetye  
irreke-arle, re angkemele anteye anwerne  
kwertengerle ikwerenhe areye anetyeke Ngkarte  
utyernemele tnaketyeke Akngeye-arle Jesus-  
kenhe anemeke. Kele, anwerne renhe akwete  
akertne utyernerlte-anemele tnakewarreye,  
rarle kwenhe anwerneke alartetye akwete-ante  
anetyenhenge! Yanhe arratye-arle aneme!

<sup>7</sup> Awerrirraye! Jesus kwenhe urreke  
angkulyele-arlenge apetye-alpetyenhe, tyerrtye  
ingkirrekele renhe aretyenhenge, nhenge yanhe  
areyele-arlike renhe-arle nternekeke renhe-arle  
arne arntarlkweke-arleke arlpere arrernekeke.  
Nhenge tyerrtye ingkirrekele apmere ahelhe  
nhenhele-arle renhe aremele imerte atere  
arrangkemele itne-arle ikwere-ketye alhule-  
iwekenge, re-anteme itnenhe arriletynhenge.  
Nhenhe kwenhe arratye aneme. Alakenhe

re kwenhe anetyenhe. <sup>8</sup> Ngkarte kwenhe anwerneke alakenhe angkeme, “Ayenge kwenhe arrekwelenye anthurre aneme, Ayenge-inpe kwenhe ingkernenye anthurre-arle. Arne anetyakenhenge-urrke, Ayenge kwenhe itethe aneke, arlte lyete anteme ayenge itethe akwete aneme. Urreke apmere ahelhe nhenhe-arlke alkere-arlke kwenhe uyerretenye, Ayenge anteme itethe akwete anetyenhe. Ayenge kwenhe Alartetye aneme, arne ingkirrekeke Alartetye anthurre.”

*John-ele Jesus ahirre-ahirre areme*

<sup>9</sup> Ayenge kwenhe John, kake akngerrepate arrekanttherrenhe, ayenge kwenhe warrkene Ngkarte-kenhe aneme arranttherre-arteke. Ngkarte kwenhe anwerne ingkirrekeke alartetye aneme. Arrpenhe areyele ayenge arlkarentye-ileme, arrenhantherrenhe arlkarentye-ileme-arteke anwerne-arle Jesus arratye itelarerlenghe. Yanhe akenhe mwerre-arle aneme. Anwerne kwenhe Jesus arratye akwete itelarerlte-aneme renhe akwetethe apenterlte-anemele, nhenge untyeme-irretyakenhele, rarle kwenhe anwernenhe lterrke-ilerlenghe. Ayenge kwenhe unthetyarte ayeye mwerre Jesus-akerte ilerle-apemele. Alakenhe ikweringe anteme itne ayenge arntwirrkeke apmere Patmos nhenhe-werne yernemele. Apmere akweke nhenhe kwatye alaye mpwepele, jail-le-arteke anteme aneme. <sup>10</sup> Arrule ulkere-arle, arlte Apurrkele ayenge anetyame Ngkarteke angkerle-anemele. Re Utninge Akngerre Ikwerenhe atyenge-werne

yerneke, Utnenge Akngerre atyenge-arleke irrpeke. The aweke tyerrtye angwenhe apeke re ingkerne-ngentyele atyenge angkerleng. Re kwenhe atyenge arnterre anthurre angketyame, angkentye akngerre nhenge trumpet-arteke. <sup>11</sup> Re kwenhe atyenge angkeke, “John-aye! The kwenhe ngkwenge arne atningke anthurre imernetyenhe. Pipe inaye, ikwereke-arleke intelhe-ilaye arne ingkirreke unte-arle areme awemele anteye. Kele imerte pipe renhe apmere 7-pele yanhe areye-werne yernemele, atyewe Jesus-kenhe areye-werne, yanhele-arle anerlte-anemeke. Ephesus-arenye areye-werne renhe yernaye, Smyrna-arenye areye-werne, Pergamum-arenye areye-werne, Thyatira-arenye areye-werne, Sardis-arenye areye-werne, Philadelphia-arenye areye-werne, Laodicea-arenye areye-werne-arlke. Pipe nhenhe itneke ingkirreke-werne yernaye.” Alakenhe rarle re atyenge angkeke.

<sup>12</sup> The renhe aweke-arle-iperre arerle-alhemele, renhe aretyeke ahentye anemele, angwenhe apeke-arle atyenge alakenhe angkekeng. Akngarte-iwelheke-arle the areke arne 7-pele gold-engentyele-arle mpwarekeng alepe-arle atnyenetyeke yanhe ikwerenge tnerlte-anerleng. <sup>13</sup> Kenhe itnekeng-arleke akenhe artwe tnetyame re alkere-arenye-kenhe apmere ahelhe nhenhele-arle alkngirreke. Re kwenhe mantere arlpentye akngerreke-arle irrpeke nhenge ingke ikwerenhe-werne-atheke, arne belt-le-arteke arerre ayernerle-alheke gold-engentyele-arle mpwarekeke. <sup>14</sup> Alte ikwerenhe

imparrkeme anthurre angkulye mperlkere-arteke alknge ikwerenhe ure alkngenthele ampeme-arteke nhenge amparrkemele. <sup>15</sup> Ingke ikwerenhe imparrkemele arlennge-arteke. The angkentye ikwerenhe aweke, nhenge kwatye urewe-arle aywerre akngerre-irremeke-arteke. <sup>16</sup> Iltye akwe-arratyale re kwerralye 7-pele arntwirrketyame. Arrakerte ikwerenhenge akenhe arrateke alyweke arlpentye akngerre-arteke-arle nhenge itere atherre-anteye arrirlpe anthurre. Inngerre imparrkeme anthurre, nhenge alernnge arlte mpwepele ampeme-arteke.

<sup>17</sup> The renhe areke-iperrele, ayenge atnyetye-alpeke ingke ikwerenheke-arleke, ayenge uyarne anthurre akngelheme apeke, angkeme apeke, nhenge ilweke-arle anthurre-arteke ayenge aneke. Re akenhe iltye akwe-arratyale ayenge anpeke imerte angkemele, "Atere-irretyale anaye, arratyale akwete itelarerle-anaye. Ayenge kwenhe arrekwele-ipenhe anthurre aneme, arne anetyakenhenge-urrke, ayenge-arle itethe akwete-arle aneke, ayenge ingkernenye anthurre aneme anteye, nhenge arne ingkirreke anthurre uyerrerenge ayenge akenhe itethe akwete-ante anetyenhe alakenhe re akwete. <sup>18</sup> Ayenge kwenhe akwete-ante anerle-aneme. Ayenge ilweke, lyete akenhe ayenge itethe akwete-ante aneme nhenge awethe ilwetyakenhele. Ayenge kwenhe Utnenge Ngkarte-kenhe-akerte, the kwenhe nhenge ilweke-arle areye itethe akemelhe-ilirtntentye akngerre. Yanhe-ngentye anteme itne itethe

akwete-ante anetyenhenge. Kenhe arrpenhe areye akenhe the impetyenhe itne tyerrtye irrerlkngge areyenge anerlte-anetyenhe.

<sup>19</sup> “Ye John, unte pipe-ke-arleke intelhe- ilaye iwenhe-arle unte lyete awemeke, are- meke anteye. Intelhe-ilaye ingkirreke an- thurre the ngkwenge imerneme. Ingkerreke intelhe-ilaye the kwenhe ngkwenge imerneme arlte lyete anthurre nthakenhe-arle-irremeke, ingkirreke-arlke the ngkwenge imernemeke, arlte urreke-arle anetyenhenge. <sup>20</sup> Lyete an- thurre anteme unte areme kwerralye 7-pele nhenhe areye iltye akwe-arratyete atyinhenge- arlenge, unte kwenhe areme arne arlpen- tyete 7-pele nhenhe areye-arlke gold-engentyele mpwareke-arle alkngenthe akertne-arle atnyen- emenge. Arne nhenhe areyele kwenhe alak- enhe akaltyele-anthemele: kwerralye 7-pele kwenhe alkere-arenye 7-pele atyewe Ngkarte- kenhe areye-arle arntarnte-aremeke, apmere 7- pele ikwere-arle anemeke. Kenhe alkngen- the arntwirrkentye akngerre tyatyete-arenye ar- eye aneme apmere 7-pele yanhe areyenge- arle anerlte-anemeke.” Alakenhe kwenhe Jesus atyenge angketyame.

## 2

*Angkentye Ngkarte-kenhe tyerrtye areyeke ap- mere Ephesus-elarle anemeke*

<sup>1</sup> Kele Jesus atyenge awethe-anteye alak- enhe angkeke, “Ayenge awaye! Angkentye nhenhe alkere-arenyeke intelhe-ilaye atyewe

atynhe areye-arle arntarnte-aremeke apmere Ephesus-elarle anemeke. ‘Ayenge arrekanttherre angkeme: The kwenhe kwerralye 7-pele iltye akwe-arratyete atnyeneme, ayenge arne arlpen-tye 7-peleke-arlenge unthema alknngenthe areye-arle akertne atnyenemeke. <sup>2</sup> Ayenge kwenhe arrekanttherre akaltye aneme. Arranttherre kwenhe atyenge arnterre warrke-irreme, arranttherre ayenge akwetethe arratyete itelarerlte-anemele. Arranttherre kwenhe arne arratyete mpwarerlte-aneme artwe arrpenhe areyenge anyente-irretyakenhele nhenge itne arne akurne areye mpwarerlenghe. Arrpenhe areye kwenhe apale angkeme, “Christ-ele kwenhe ayenge akngakeke yernemele.” Arranttherre akenhe itnenhe mwantyele awemeke-amparre, kele arranttherre anteme itelareke itne-arle urrtyirremele angketyamenge. <sup>3</sup> Ye, ayenge kwenhe akaltye-anteye aneme arranttherre-arle ayenge apenterlte-anemeke. Kenhe nhenge arrpenhe areyele arrenhantherrenhe arlkarentye-ilemele atwemele-anteye arranttherre-arle ayenge arratyete itelarerlenghe, arranttherre ayenge impetyakenhe aneme ayenge akwete apenterlte-anemele. Alakenhe ikwerenge anteme ayenge akangkemele anthurre aneme.

<sup>4</sup> ‘Kele awerrirraye! Ayenge kwenhe atnerte alhwarrpe awelheme arne anyente-ngentyetele ware arranttherre-arle atyenge akweke ware ahentye-anerlenghe. Nhenge arranttherre arrekwele Ngkartekte atyewe-irreke arranttherre atyenge arnterre anthurre-arle ahentye-aneke. Kenhe iwenhenge-arle anteme



arrantherre atyenge ahentye-anentye akngerre impelheke? <sup>5</sup> Arrantherre ingkirrekele itelareme nhenge nthakenhe-arle arrantherre atyenge ahentye anthurre anetyarte. Arrantherre kwenhe atyenge alakenhe re-anteye awethe ahentye-anetyeke, itelaraye arrantherre atyenge arrekwele ahentye anthurre anetyarte-arteke. Kenhe arrantherre apeke akngarte-iwelhetyakenhe aneme, kele ayenge apetyemele arne yanhe areye arrekantherre-ngentyele ineme alkngenthe-arle atnyenemeke.

<sup>6</sup> ‘Ayenge arrekantherre arrpenhe awethe angketyeke ahentye-aneme. Arrantherre yanhe areye itelareme artwe Nicolaus-arle apenterlte-anemeke. Itne kwenhe apale itirreme. Arrantherre kwenhe itneke ahentye-anetyakenhe, alakenhe-anteye kwenhe ayenge itneke ahentye-anetyakenhe. Nhenge arrantherre alakenhe kwenhe itirremele, arrantherre arratyete itirreme.

<sup>7</sup> ‘Ye, arrantherre kwenhe irlpe-akerte aneme! Kele mwantyele awerlte-anaye nhenge Utmenge Akngerre tyerrtye Ngkarte-kenhe areyeke angkemele! Nhenge tyerrtye apeke Satan-ketyenge lterrke tnemele, re apmere mwerre akngerre anthurre alkere akertne-werne atnerrele alhetyeke. Apmere yanhe ikwerenge arne anyente tneme ingkirreke anthurre-arle itethe-ilemeke. Re kwenhe merne mwerre akngerre arne yanhe-ngentyele arlkwetyenhe, akwete-ante itethe anerle-anetyenhenge.’ ”

*Angkentye Ngkarte-kenhe tyerrtye areyeke apmere Smyrna-le-arle anemeke*

8 Kele re atyenge awethe-anteye angkeke, “Angkentye nhenhe alkere-arenyeke intelhe- ilaye atyewe Ngkarte-kenhe areye-arle arntarnte-aremeke apmere Smyrna-le-arle anemeke. Ikwere alakenhe ilaye, ‘Ayenge kwenhe arrekwenye anthurre aneme, ayenge ingkernenye anthurre aneme. Arne anetyakenhenge-urrke, ayenge aneke, lyete ayenge akwete anerle-aneme. Nhenge ahelhe uthene alkere uthene uyerrerlunge ayenge itethe akwete-arle aneme. Ayenge kwenhe aneme nhenge ilweke-arle itethe-irritneke!

9 ‘The itelareme, tyerrtye arrpenhe areyele arrenhantherrenhe arlkarentye-ilemenge, arrekantherre ahele angkerlte-anemele atwerlte-anemele anteye. The itelareme, arrantherre-arle akunye areye anemenge, iltye-ante anerlte-aneme ngkweltyeke arrangkwe. Kele akangkemele anaye Ngkartele-arle kwenhe arrenhantherrenhe Utmenge Ikwerenhele arntarnte-arerlunge, alakenhe kwenhe mwerre anthurre, apwerte ngkweltye akngerrenge mwerre ulkere. The kwenhe itelareme, arrpenhe areye arrekantherre-akerte angkentye akurne angkerlte-anerlunge anhelhemele anteye. Itne kwenhe tnakelhemele angkeme “Anwerne kwenhe Jew areye aneme, Ngkarte-arle arratye apenterlte-anemeke.” Itne kwenhe urrtirremele angkerlte-aneme, itne kwenhe arrentye Satan-kenhe aneme renhe apenterlte-anemele. 10 Kele-anteye-arle itne arrenhantherrenhe akwetethe arlkarentye-ilerlte-aneme, atwerlte-anemele, atere-irretyale

anaye ayenge ware arratyē itelarerlte-anaye. Arrentyē Satan-ele arrenhantherrenhe arrkerneme arrenhantherrenhe Ngkarte-ketyenge artepe untyeme-ilettyeke. Re tyerrytye akurne areye ileke arrenhantherrenhe arntwirrketyeke jail-ke akwernetyeke. Kele awerrirraye! Arrantherre akenhe jail-ele aneme arlte 10-ke-atwetye ware. Ayenge impetyale anaye atyenge akwetethe itirrerlte-anaye. Itne apeke angkerreme-ketye itne-arle arrenhantherrenhe irrerlkngē atwetyenhe, arrantherre akenhe ayenge akwetethe apenterlte-anetyeke kele-anteye-arle itne apeke arrenhantherrenhe irrerlkngē atweme. Kele the arrenhantherrenhe itetheke mpwaretyenhe nhenge ilweke-arle-iperrenge nhenge yanhengentyele arrantherre atyengenge akwete-ante anetyenhenge.

<sup>11</sup> ‘Arrantherre irlpe-akerte! Kele mwantyele awerrirraye, nhenge Utnenge Akngerre Ngkarte-kenhe areyēke angkerlengē! Nhenge angwenhe apeke re lterrke akwete anerlengē arrentyē Satan-ketye, kele re ure akngerre yanhele uyarne ilweme, ure yanhe akwete-ante-arle amperle-anemeke, arrangwe-arle.’ ”

*Angkentye Ngkarte-kenhe tyerrytye areyēke apmere Pergamum-elarle anemeke*

<sup>12</sup> Kele re atyenge awethe-anteye angkeke, “Angkentye nhenhe alkere-arenyeke intelhelaye atyewe Ngkarte-kenhe areye-arle arntarnte-aremeke apmere Pergamum-elarle anemeke. Ikwere alakenhe ilaye, ‘Ayenge

kwenhe aneme alyweke arlpentye akngerre-arle atnyeneme, arriripe kwenhe akantye atherre-anteye aneme. Ayenge kwenhe Pergamum-arenye areyeke angkeme. Arrantherre ayenge awerrirraye!

<sup>13</sup> ‘Ayenge kwenhe apmere arrekantherrenhe-akerte akaltye aneme, apmere yanhele kwenhe arrentye Satan pwathe aneme, tyerrtye atningkele yanhe-arle anemeke renhe apenterlte-aneme. Kenhe arrantherre akenhe arne arratyentye mpwarerlte-aneme renhe alhule-iwerlte-aneme imerte atyenge lterrke akwete anerlte-anemele. Arrekwele ulkere-arle, apmere yanhe ikwerenge itne atyewe atyinhe Antipas irrerlknge atweke rarle kwenhe untherle-aperlengge angkentye atyinhe ilerle-apetyarte. Arrantherre kwenhe atere kwenyele nhenge ayenge atnerre anthurrele akwetethe apenterlte-aneme, alakenhe ikwerenge anteme ayenge arrekantherre akangkeme anthurre.

<sup>14</sup> ‘Ayenge kwenhe arrekantherre ahele-ahele angkeme akweke ware. Tyerrtye urrpetye arrekantherrele-arlengge apale-apale aneme, itne apenterlte-aneme angkentye artwe Balaam-kenhe, nhenge apmere arrule-arle anekeke. Re kwenhe urrtiyirremele ileke Moab-arenye alartetyeke, Balak arritnye. Kele Balak anteme urrtiyirremele ileke Israel-arenye areyeke, nhenge itne iwerre apale-arle alhetyenhenge arne akurne-arlke mpwarerlte-anemele. Itne kwenhe arne akurne areye mpwaryame nhenge arne-ngentyele, apwerte-ngentyele, imerte artepe anemele itnenhe tnaketyenhenge.

Itne Ngkarteke itirretyakenhe aneke, arrangkwe-  
 arle. Balak-ele itnenhe akaltyele-antheke  
 merne-arlike kere-arlike arlkwetyeke ngkarte  
 urrtiyirrentye-arle anthekeke. Balak-ele Israel-  
 arenye areyeke ileke-arlike, mwerre akwele  
 anewe arrpenhe-kenhenge intetyeke. Itne  
 kwenhe akngwelye-arteke interlte-apetyarte,  
 mpwenye akngerre areye-arteke, Ngkarte  
 awetyakenhele. Kele lyete anteme arrantherre  
 arrpenhemele alakenhe-anteye mpwarerlte-  
 aneme.

<sup>15</sup> 'Kenhe arrpenhemele awemele arraty  
 itelaremele iwenhe-arle artwe yanhe Nico-  
 laus angkeke. <sup>16</sup> Nicolaus-ele urrtiyirremele  
 ileme. Itneke-aketye untyeme-irraye. Itne  
 apeke ikwere-ketyenge untyeme-irretyakenhele  
 aneme, kele ayenge alyweke arlpentye akngerre-  
 akerte apetyeme tharle arrakertele atnyenemeke  
 itnenhe atwetyeke.

<sup>17</sup> 'Arrantherre kwenhe irlpe-akerte aneme!  
 Kele mwantyele awerrirraye, nhenge Utnenge  
 Akngerre Ngkarte-kenhe areyeke angkerlenghe!  
 Nhenge angwenhe apeke lterrke anerlenghe ar-  
 rentye Satan-ketye, The renhe merne arrpenhe  
 alkere-arenye anthetyenhe, merne yanhe manna  
 ileme. Ngkartele merne yanhe renhe alengke-  
 iweke, lyete akenhe the tyerrtye antheme  
 ayenge-arle akwetethe apenterle-anemeke. The  
 renhe apwerte athirnte mperlkere nhenge an-  
 thetyenhenge. Apwerte yanhe ikwerenge The  
 ikwere arritnye intelhe-iletienhe, arritnye ar-  
 rpenhe. Kenhe arrpenhe areye akenhe arritnye  
 yanhe ikwere akutne aneme. Tyerrtye apwerte

mperlkere yanhe-akerte re-ante kwenhe ikwere akaltye anetyenhe.’ ”

*Angkentye Ngkarte-kenhe tyerrtye areyeke apmere Thyatira-le-arle anemeke*

<sup>18</sup> Kele re atyenge awethe-anteye angkeke, “Angkentye nhenhe alkere-arenyeke intelhe-ilye atyewe Ngkarte-kenhe areye-arle arntarnte-aremeke apmere Thyatira-le-arle anemeke. Ikwere alakenhe ilaye, ‘Ayenge kwenhe Alere Ngkarte-kenhe aneme. The kwenhe angkentye atyinhe ilerle-apeme. Alkng atherre kwenhe ure alkngenthe-arteke amparrkeme, ingke atherre akenhe arlengge-arteke amparrkeme.

<sup>19</sup> ‘Kele awerre-anteme-irraye! Ayenge kwenhe akaltye aneme arne ingkirrekeke arrantherre mpwarerlenge. Ayenge kwenhe akaltye aneme arrantherre atyenge ahentye anthurre anerlenge, arrantherre arrpenhe areyeke akangkentyele arne areye mpwarerlte-aneme. Ayenge kwenhe akaltye aneme arrantherre-arle ayenge arraty awemenge, warrke atyinhe mwerrentye anthurre mpwaremunge. Ayenge kwenhe akaltye aneme, nhenge arne akurne areye arrekantherre irrerlenge, arrantherre ayenge arraty akwete itelarerlte-aneme. Nhenge arrantherre ayenge arrekwele-iperre arraty itelareke arrantherre arraty anetyarte, arne mwerre areye atyenge mpwaremele. Arrekweleke-amparre arrantherre akweke ware atyenge mpwarewarretyarte. Kenhe lyete akenhe

arrantherre lterrke anthurre irreke-arle arne mwerre akngerre areye mpwarerlte-anemele.

20 ‘Kele awerrirraye! Ayenge kwenhe ar-rekantherre ahele-ahele angketyenhe akweke ware. Arrantherre kwenhe arelhe yanhe alkngetherre iletakenhe aneke, arelhe akurne-arle Jezebel-arteke anemeke, arrule anthurre-arle anekeke, nhenge re arne akurne areye akaltyele-anthetyarte pipe arrekantherrenhenge. Re kwenhe urrtiyirrentye aneke rarle akwele angkentye Ngkarte-kenhe areye ilerle-anemele. Re kwenhe arrenhantherrenhe ilerle-aneme, mwerre akwele arrpenhenge areye akngwelye-arteke intetyeke. Re arrenhantherrenhe kere yanhe arlkwetyeke ileme, ngkarte urrtiyirrentye-arle anthekeke.

21 ‘Atningke anthurre-ngare the ikwere ileke, arne akurne yanhe areye-ngentyele akngarte-iwelhemele untyeme-irretyeke. Ayenge ikwere akarelhemele akarelhemele irreke. Arrangkwe akenhe aneke, re kwenhe ayenge akwetethe untyemele awetyarte rarle kwenhe arne akurne yanhe areye akwetethe mpwaretyeke ahentye-aneke. 22 Alakenhe ikwerenge anteme the renhe rlkerte-anthurre-iletienhe, yanhe ikwerele re rlkerte interle-anetyenhe. Angwenhe areye apeke ikwerenge anyente-irretyeke ahentye-aneme nhenge arne akurne akwetethe mpwarerlte-anemele, kele imerte the itnenhe-inpe rlkerte anthurre iletienhe-anteye-arle.

23 ‘The yanhe areye irrerlknge atwetyenhe arelhe yanhe-arle apentemeke. Kele an-

teme atyewe Jesus-kenhe areyele apmere yanhe ingkirreke-ngentyele itelaretyenhe Ayenge-arle kwenhe akaltye-irretyenheke nthakenhe-arle tyerrtye ingkirreke itirremenge, tharle itelaremenge nthakenhe-arle tyerrtye ingkirreke akurkngele itirreme. Nhenge angwenhe apeke apale anerle-anemele, the renhe iwetyenhe ure yanheke-arleke akwete-ante-arle amperle-anemeke. Nhenge angwenhe apeke arraty aneme, re alhetyenhe atyengenge akwete-ante anetyeke.

24 ‘Awerrirraye! Tyerrtye arrpenhemele arelhe yanhe awerlte-aneme angkemele, “Nhenhe kwenhe angkentye arrentye Satan-kenhe-arteke, anwerne ayeye anyelkng-anyelkng ikwerenheke akaltye aneme.” Itne ayeyele ilelheme itne-arle akwele akngerre aneme, arrangkwe-arle. Kenhe Thyatira-arenye arrpenhe areye, arrantherre renhe akwenpele aweme, nhenge rarle apale-apale akaltyele-anthemenge. Alakenhe ikweringe anteme ayenge arrekantherre akangkemele aneme. The akenhe arrenhantherrenhe akwetethe uternetyakenhele anetyenhe iwenhe apeke renhe mpwaretyeke.

25 ‘Alkngwirretyale anaye, iwerre arraty atyinhe apentetyeke, impelhetyale anaye. Akwete akarelherlte-anaye nhenge ayenge apetyalpetyeken-atwetye.

26 ‘Nhenge angwenhe apeke re arrentye Satan-ketye lterrke akwete aneme, warrke atyinhe mpwaremele, impetyakenhele, the kwenhe renhe



arrernetyenhe apmere ingkirreke ahelhe nhenheke alartetye anetyeke. <sup>27</sup> Ngkartele kwenhe ayengeke-amparre arrerneke apmere ingkirrekeke alartetye anetyeke, lyete anteme the arrenhantherrenhe arrerneme alartetye areye anetyeke alakenhe-anteye. Ayenge arne ingkirreke anthurreke alartetye anthurre anetyenhe, ayenge tyerrtye ingkirreke anthurreke lterrke anetyenhe. Nhenge itne apeke mwernterirrerlunge imerte arrenhantherrenhe awetyakenhe anemele kele arrantherre anteme itnenhe atwetyenhe, alakenhe anteye arrantherre apanthe ultakemele-arteke renhe ngkweltye-ilemele. <sup>28</sup> The akngakeke-iperre arrenhantherrenhe alartetye anteyeke the kwenhe arrenhantherrenhe kwerralye tyeperre anthurre yanhe anthetyenhe nhenge-arle arratemele akertnerirremeke, uternenge arrekwele, ingweleme anthurre. <sup>29</sup> Arrantherre kwenhe irlpe-akerte aneme! Kele mwantyele awerrirraye nhenge Utnenge Akngerre Ngkarte-kenhe areyeke angkerlunge.’ ”

### 3

#### *Angkentye Ngkarte-kenhe tyerrtye areyeke apmere Sardis-ele-arle anemeke*

<sup>1</sup> Kele re atyenge awethe-anteye alakenhe angkeke, “Ayenge awaye! Angkentye nhenhe alkere-arenyeke intelhe-ilaye atyewe Ngkarte-kenhe areye-arle arntarnte-aremeke apmere Sardis-ele-arle anemeke, ‘Ayenge arrekantherre angkeme: The kwenhe Utnenge Ngkarte-kenhe arntirrkweme, utnenge seven-arle anemeke,

the kwerralye seven-arlke arntirrkweme. Ayenge kwenhe arrekantherre akaltye aneme, arne ingkirrekeke-arlke arrantherre-arle mpwaremeke. Atningke kwenhe angkeme arrantherre-arle ayenge mwerre anthurrele apenterlte-anemeke. Kenhe arrangkwe-arle, arrantherre kwenhe ayenge apenteme nhenge tyerrtye ilweke-arle areyele-arteke. Arrantherre kwenhe Atyenge utnenge lterrke anthurrele anetyarte lyete anteme akenhe arrantherre atyepes-atyepes anetyakenhe anteme. <sup>2</sup> Ayenge kwenhe akaltye aneme iwenhe-arle arrantherre mpwaremeke, ayenge akaltye aneme Ngkartearle atnerte akangkentye anetyakenhe aneme nhenge arrantherre warrke Ikwerenhe atyepes-atyepes mpwaretyakenhe anerlengen, arrantherre ilwetyeke-urletye aneme-arteke. Arelhewarraye, arratyebilelhave arrantherre alyepes-alyepes-irremes-ketye, kele Ngkarteke warrke-irretyeke utnenge impenes-impenele. <sup>3</sup> Itelaraye nhenge arrantherre arrekwele-arle angkentye yanhe renhe aweke. Pipe-arenyes alartetye areyele kwenhe arrenhantherrenhe akaltyeles-antheke, arrantherre itneke aywerrke awelheke. Aywerrke akwete renhe awerltes-anayes arne akurnes areyes-ketyes untyemes-irrayes. Arelhewarremeles anayes, arratyebilelhave nhenge yanhe-ngentyeles the apekes arrenhantherrenhe atnulkelhes-ilemes-ketyes nhenge ayenges apekes apetyes-alperlengen ilelhetyakenhe ware. Arrantherre kwenhe apales anemes nhenge ayenges-arles apetyes-alpetyenheke. <sup>4</sup> Arrpenhemes ware Sardis-ele-

arle aneme, Ngkarte akwete awerlte-aneme arne iwenhe apeke renhe mpwarerlte-aneme Rarle ahentye anemenge. Arrantherre mwerre anerlte-aneme untyeme anemele nhenge arne akurne mpwareme-ketye, nhenge mantere arrekatherrenhe aternnge-irretyakenhe-arteke. Alakenhenge ikwerenge anteme arrantherre atyengenge apurte alhetyeke, nhenge mantere alkarle mperlkereke irrpemele, Ngkarte-arle kwenhe arrekatherre atnerte akangkentye anemenge. <sup>5</sup> Arrantherre apeke lterrke akwete anerlte-aneme, arrentye Satan-ketyenge untyeme-irremele, kele arrantherre mantere mperlkere yanhe-arteke akwetethe atnyenerlte-aneme. The kwenhe arritnye arrekatherrenhe pipe atyinheke intelhe-ileke arrantherre itethe akwete-ante anetyenhenge. The arritnye yanhe areye urrparetyakenhe anetyenhe nhenge arrantherre apeke ayenge akwetethe apenterlte-anemenge. Ayenge kwenhe Ngkartenge arrekwele angketyenhe Alkere-arenye Ikwerenhe areyenge-arlke arrantherre-arle atyewe atyinhe areye anemenge.’ <sup>6</sup> Arrantherre kwenhe irlpe-akerte aneme! Kele mwantyele awerrirraye, nhenge Utmenge Akngerre Ngkarte-kenhe areyeke angkerleng!”

*Angkentye Ngkarte-kenhe tyerrtye areyeke ap-  
mere Philadelphia-larle anemeke*

<sup>7</sup> Kele re atyenge awethe-anteye alakenhe angkeke, “Ayenge awaye! Angkentye nhenhe

alkere-arenyeke intelhe-ilaye atyewe Ngkarterkenhe areye-arle arntarnte-aremeke apmerek Philadelphia-larle anemeke. Ikwere alakenhe angkaye: ‘Ayenge-ante ware kwenhe mwerre aneme, ayenge-ante ware arraty anemele. The-ante ware kwenhe key yanhe atnyeneme arrenge anwerne-kenhe David-kenhe. Key yanhele kwenhe arriwe anyente altywere-ilenhe-ilenhe. Yanhe ikweringe kwenhe iwerre altywere Akngeye atyinhe-werne atheke. Nhenge the renhe altywere-ilemele, kele angwenhele apeke renhe uyarne-arle marteme. Nhenge the renhe martemele, kele angwenhele apeke renhe uyarne altywere-ileme. Ayenge nhenhe yanhe areyeke angkeme Philadelphia-larle anemeke. Ayenge awerrirraye! <sup>8</sup> Ayenge kwenhe arne ingkirrekeke akaltye aneme arrantherre mpwaremenge, ayenge akaltye-anteye aneme arrantherre utnenge lterreke akweke ware atnyenemenge. Ayenge kwenhe akaltye aneme arrantherre-arle akwetethe angkentye atyinhe awerlte-aneme, arrantherre-arle ayenge akwetethe apenterlte-aneme ayenelelhetyakenhele. The kwenhe arrekantherre arriwe altywere-ileke arrantherre kweneke irrpetyenhenge, tyerrtye arrpenhele arriwe renhe uyarne marteme.

<sup>9</sup> ‘Awerrirraye! Ayenge kwenhe akaltye aneme iwenhe-arle arrpenhe yanhe areye angkerlte-aneme itneke-arrpe-akerte. Itne kwenhe urrtyrremele angkerlte-aneme alakenhe, “Anwerne kwenhe Jew areye, Ngkarterle awerlte-anemeke.” Kenhe yanhe arraty

anetyakenhe-arle. Itne kwenhe arrentye Satan-kenhe aneme. The anteme urryalthe yanhe areye akngetye-alpetyenhe itnenhe ingke arrekantherrenge kwene-iletienhe. Irlpe itnekenhe altywere-irretienhe, itne akapertenge itelaretienhe tharle arrenhantherrenhe mwantyele arntarnte-arerle-aneme. <sup>10</sup> The kwenhe arrenhantherrenhe ileke ayenge akwetethe apenterlte-anetyeke, arratyte anteme arrantherre ayenge akwete apenterlte-aneke nhenge apurrke-irretyakenhele. Kenhe arrentye Satan-ele kwenhe tyerrtye areye apmere arrpe-anenhele arnterre anthurrele uternerle-anetyeke arrkerneme ayenge apenteme-ketye impetyeke atyengenge untyeme-irretyeke. Kenhe the akenhe arrenhantherrenhe mwantyele arntarnte-areme nhenge arrantherre apeke ayenge akwete apenterlte-anerlenghe, arrentye Satan-ele anteme arrenhantherrenhe uyarne akurne-ileme. <sup>11</sup> Ayenge kwenhe urreke-ulkere apetye-alpeme. Ayenge akwetethe arratyte apenterlte-anaye. The anteme arrenhantherrenhe arne iwenhe apeke renhe arratyte mwerre akngerre antheme. Kenhe arrantherre apeke atyenge-ketye untyeme-irreme, kele-anteye-arle arrantherre arrpenhe awetyeke arrenhantherrenhe-arle ilemeke atyenge-ketye artepe untyeme-irremele anetyeke, kele the arrenhantherrenhe arne mwerre akngerre yanhe renhe anthetyakenhe, arrangkwe-arle. <sup>12</sup> Ye, ayenge akwete apenterlte-anaye, the anteme arrenhantherrenhe apmere Akngeye

atynhe-kenheke arrerneme nhenge yanhenge arrantherre akwete-ante anetyenhenge Renhe tnakewarremele. Arrantherre yanhe ikwerele anerlte-anetyenhe, alhetyakenhe anthurre. Nhenge arrantherre apeke ayenge akwete arratye apenterlte-anerlenge, arrentye Satan-eke ularre-irretyakenhe anetyeke, kele the arrekantherre-arleke arritnye Akngeye atynhe-kenhe intelhe-iletynhe. Alakenhe-anteye the arrekantherre-arleke apmere arritnye Akngeye atynhe-kenhe intelhe-iletynhe, apmere alkarle Jerusalem-arle, arritnye atynhe alkarle-inpe. Apmere yanhe re kwenhe urreke alkere-ngentyele kwene-akerle apetyetyenhe, Ngkarte-ngentyele. <sup>13</sup> Arrantherre kwenhe irlpe-akerte aneme! Kele mwantyele awerrirraye, nhenge Utmenge Akngerre Ngkarte-kenhe areyeke angkerlengle!’ ”

*Angkentye Ngkarte-kenhe tyerrtye areyeke apmere Laodicea-le-arle anemeke*

<sup>14</sup> Kele re atyenge awethe-anteye alakenhe angkeke, “Angkentye nhenhe alkere-arenyeke intelhe-ilaye atyewe Ngkarte-kenhe areye-arle arntarnte-aremeke apmere Laodicea-elarle anemeke. Ikwere alakenhe angkaye: ‘The apele nhenge angkentye Ngkarte-kenhe-arle arratye ilerle-aneme. Arlte arrekwele anthurrenge Akngeye ilerne apmere ahelhe nhenhe uthene alkere uthene mpwarerle-anerreke. Re kwenhe ayenge arrerneme arne ingkirreke anthurreke alartetye anetyeke Rarle mpwarekeke.

15 ‘Ayenge kwenhe arrekatherre akaltye aneme, arne ingkirrekeke nhenge arrantherre-arle mpwaremeke. Arrantherre kwenhe ayenge irrpelthe-irrpelthele apentetyakenhe, arrantherre akenhe anerlte-aneme ankwe intetyeke-urletye-arteke. Ayenge kwenhe arrekatherre ahentye aneme ayenge irrpelthe-irrpelthe anthurrele apenterlte-anetyeke. Ayenge kwenhe arrekatherre ahentye aneme akarre anthurre anerlte-anetyeke nhenge arrantherre ayenge apentemele. Kenhe arrantherre apeke ayenge ipmentye impeme, kele mwerre-arle, ayenge-arle arrekatherre ahentye anetyakenhenge ayenge ankwe-ankwe ware apentetyeke. <sup>16</sup> Mwantye arelhewarraye! Nhenge arrantherre apeke alakenhe akwete apenterlte-anerlenghe, the apeke arrenhantherrenhe iweme-ketye, nhenge tyerrtyele merne mpenge akweke ware arlkweme imerte pelhe-iwemele, alakenhe-anteye the arrenhantherrenhe ipmentye-iweme.

<sup>17</sup> ‘Arrantherre itirreme, arrantherre-arle akwele ayenge arraty apentemeke-athene. Arrantherre anteme angkerreme, “Anwerne kwenhe apwerte ngkweltye akngerre-akerte. Anwerne kwenhe arne arrpe-anenhe ingkirreke anthurre-akerte.” Yanhe kwenhe arraty anetyakenhe, arrantherre kwenhe apale angkerlte-aneme. Akunye areye. Arraty kwenhe arrantherre arrangkwe anthurre atnyeneme. Arrantherre kwenhe mantere kwenye aneme-arteke, alkngewpunge-arteke. Apurenge apelaye!

<sup>18</sup> ‘Kele ayenge awerrirraye. Atyenge-

werne utepe-irraye, arrantherre anteme gold arratyete anthurre inetyenhe gold yanhe apworte ngkweltye akngerrenge mwerre anthurre ulkere. Nhenge arrantherre apetyemele the arrenhantherrenhe mantere mperlkere irrpetyeke anthetyenhenge, arrantherre anteme tyerrtye akethe alheme-ketye apure-irremele. The arrenhantherrenhe merrethene antheme alknge pwengeke, arrantherre anteme apernelheme mwerre aretyeke. <sup>19</sup> The kwenhe arrekantherre nhenhe ileme ayenge-arle kwenhe arrekantherre atnerte ahentye anthurre anemenge. Tyerrtye yanhe areyete ayenge-arle ahentye anemeke, the kwenhe itnenhe mwantye-mwantye-ileme itneke ahele-ahele angkemele, nhenge yanhe-ngentyele itne akaltye-irretyenhenge atyenge mwerrentye iwerre arratyete anetyenhenge. Alakenhe ikweringe anteme the arrenhantherrenhe alkngetherre ileme, nhenge arrantherre atyenge-werne atheke akngarte-iwelhetyenhenge arne akurne mpwarerlte-aneme-ketye. <sup>20</sup> Awerrirraye! Ayenge kwenhe arriwele tnerle-aneme ltare atwemele, arrekantherre arlkerle-anemele. Kele angwenhele apeke ayenge aweme arlkerle-anerlunge arriwe-arlke altywere-ilemele kele ayenge irrpenthemele imerte ikwerele-arlunge anemele merne ikweringe arlkwemele, itne atyengenge arlkwerlunge.

<sup>21</sup> ‘Ayenge arratyete akwete apenterlte-anaye nhenge utnenge lterrke anemele, the anteme arrenhantherrenhe atyenge itweke arrernetyenhenge, arrantherre alartetye-



anteye atyengenge anetyenhenge tyerrtye areye arntarnte-aremele. The kwenhe arne ingkirreke mpwareke Ngkarte ahentye anekenge, ayenge kwenhe arrentye Satan-eke ularre-irretyakenhe. Nhenge ayenge ilweke-arle-ipperlele awethe itethe-irritneke, ayenge Ngkartenge itepeke aneke chair mwerre akngerre anthurre ikwengenge. Ilerne apmere ahelhe nhenhe renhe ingkirreke anthurre apurtele arntarnte-arerle-anerreme. Alakenhe renhe-anteye arrantherre atyengenge anetyenhe apmere ahelhe nhenhe ingkirreke arntarnte-aretyenhenge.

<sup>22</sup> ‘Arrantherre kwenhe irlpe-akerte aneme. Kele mwantyele anteme awerrirraye arrantherre akaperte-werne iletienhenge nhenge Ut-nenge Akngerre Ngkarte-kenhe areyeke angkerleng!’ ”

## 4

*Alkere akertnenge-arle itne Ngkarte uty-ernemele tnaketyame*

<sup>1</sup> The arne ingkirreke yanhe areye areke-arle-ipperlele, the arne arrpenhe anthurre areke. The alkere akertnele areke arriwe arrpenhe altywere-irrerlengenge. The angkentye renhe-anteye aweke, arnterre anthurre angkerlengenge arne nhenge trumpet-arteke. Atyenge re angkeke, “Akertne-werne apetyaye! The kwenhe ngkwengenge arne arrpenhe areye imernetyeke ahentye aneme urreke-arle irretyenheke.”

<sup>2</sup> Iparrpe anthurre-arle Ut-nenge Ngkarte-kenhe atyengenge apurte-irreke atyenge

anteme imerneke. The chair mwerre akngerre anthurre areke alartetye anentye akngerre alkere akertnenge tnerle-anerleng. Arrpenhe chair yanhe ikwerenge anetyame. <sup>3</sup> Inngerre ikwerenhe imparrkeke, nhenge apwerre mwerre akngerre areye-arteke uternenge imparrkemele, mwerre akngerre intelhentye akngerre anteye, jasper uthene carnelian uthene akerleng. Kenhe mpwelarre mwerre akngerre anthurre aneke chair ikwerenge itepe arrpenenhe, re pwarrtyeme anteye. <sup>4</sup> Kenhe yanhe ikwerele aneke chair arrpenhe 24 aneke, itne chair akngerre yanhe ikwerenge itepe arrpenenhele. Chair yanhe ikwere areyenge aneke alartetye 24 ingkirreke mantere mperlkereke irrpekele, akaperte itnekenhenge aneke arne nhenge akaperte-kenhe tyellarre-arteke tyerrtyele-arle gold-engentyele mpwarekeke. <sup>5</sup> Chair yanhe ikwerenge-ntyale aneke nhenge mpepe anthurrenge arne iwenhe apeke re alharrketyeme nhenge kwatye-ngentyele alharrkeme-arteke nhenge kwatye angkeme-arteke, aywerre akngerre-irrerleng. Chairnge arrekwele aneke, ure alkngenthe alepe seven ampetyame, itne kwenhe aneke utnenge Ngkarte-kenhe seven-pele. <sup>6</sup> Kenhe chair yanhe ikwerenge arrekwele aneke ahelhe anetyakenhenge-arteke re akenhe arne arrpenhe kwenhe kelathe-arteke aneke nhenge mwerre akngerre anthurre, nhenge kwatye alkarle-arteke.

Mpwepenge chair ikwere itwele aneke, arne four-pele atnunthe-arteke tnerleng. Itne

alknge atningke anthurre-akerte arerreke-  
 arleke artepeke-arleke-arlke, arunthe anthurre.  
 Itne chair ikwere-arlenge itepe arrpe-anenhele  
 aneke. <sup>7</sup> Kenhe arne itethe yanhe areye alknge  
 atningke-akerte inngerre arrpenhe anthurre-  
 akerte. Anyente kwenhe lion-arteke aneke,  
 arrpenhe pweleke-arteke aneke, arrpenhe  
 tyerrtye-arteke aneke, kenhe arrpenhe akenhe  
 irretye-arteke alkere akertneke-irreme. <sup>8</sup> Itne  
 kwenhe irlpelhe atherre-akerte-ante ware  
 anetyakenhe aneke, re akenhe irlpelhe six-  
 pele arrpenhe anthurre-akerte kwenhe aneke,  
 alknge-ante tyerrtye itne-kenheke-arlenge  
 aneke, irlpelhe lhenpele aneke alknge atningke  
 anteye-arle. Atnunthe yanhe areye arltele  
 uthene ingwele uthene alakenhe akwetethe  
 alyelhepelheme:

“Ngkarte, Alartetye anthurre kwenhe tyeperre  
 ameke-ameke anthurre aneme.

Re kwenhe arlte arrekwele anthurrele anentye  
 akngerre, lyete anteme aneme,

Re akwete-ante anerle-anetyenhe  
 uyerretyakenhele.”

<sup>9</sup> Alakenhe rarle, itne akwete alyelheke  
 tnakemele anyente yanhe renhe chair mwerre  
 akngerrele-arle anemeke, akwete-ante-arle  
 itethe anerle-anetyenheke. Nhenge itne  
 alyelherlte-anemele, <sup>10</sup> alartetye 24 kwenhe  
 artepe kwene-irretyame chair-nge arrekwele  
 Renhe tnakemele, akwete-ante-arle anerle-  
 anemeke. Itne tyellarre gold ilywelheke itnenhe  
 atheneme chair-nge arrekwele, alakenhe anteme  
 angkemele: <sup>11</sup> “Ngkarte Akngeyaye! Unte

kwenhe alartetye anthurre anwerne-kenhe aneme, Ngkwenge mwerre kwenhe aneme, Unte anwernenhe ingkirreke aretyeke Ngenhe tnakewarrerlenge,

Unte-arle kwenhe Utmenge Ngkwinhele arne ingkirreke anthurre aknganekenge.

Unte-arrpe kwenhe itirreke arne ingkirreke mpwaretyeke, ingkirreke apmere ahelhe nhenheke alkereke-arlke arrerneyeke nhenge itethe anetyeke.”

## 5

### *Itne Yepe-Yepe Akwerrke tnaketyame*

<sup>1</sup> The kwenhe renhe areke nhenge chair mwerre akngerre anthurre-arle anemeke pipe imarteye-iweke-arle iltje akwe-arratyete arntwirrkerlenge. Arrpenhele angkentje areye intelhe-ileke-arle arrekweleke ingkerneke-arlke pipe yanhe ikwere. Arrpenhele angkentje yanhe areye read-eme-iletjakenhe aneke arrpenhele-arle kwenhe ankere apurte-arteke <sup>7</sup> pipeke-arleke arrernerlenge itnenhe ayernemele nhenge altywere-irreme-ketye.

<sup>2</sup> The anteme alkere-arenje lterrke anthurre areke arnterre angkerlenge. Alakenhe kwenhe re angkeke, “Angwenhe-ame aneme Ngkartele-arle akngakekeke ankere nhenge ularte-iwetyeke pipe renhe altywere-iletjeyeke? Artwe mwerre anthurrele-ante kwenhe renhe altywere-iletjeyeke.” <sup>3</sup> Kele itne apmere arrpe-anenhe areke imerte arrpenheke uyarne untheke nhenge ankere renhe-arle ularte-iwetyeke pipe renhe

altywere-iletyeke renhe aretyeke, itne-arle alk-  
 erenge uthene ahelhenge uthene kwenhe apale-  
 untheke artwe mwerre anthurre anyenteke-  
 ante, nhenge ahelhe kwenenge-arlke kwenhe  
 itne uyarne untheke, arrangkwe-akwete-arle  
 aneke. <sup>4</sup> Nhenge the nhenhe renhe aremele  
 ayenge arnterre anthurre artneke itne-arle  
 artwe mwerre anyenteke uyarne anthurre un-  
 thekenge pipe renhe altywere-iletyeke renhe  
 aretyeke. <sup>5</sup> Kele alartetye anyente anteme  
 atyenge angkeke, “Artnetyale anaye! Araye,  
 lterrke akngerre anyente-arle lion-arteke-arle  
 nhakwe tnerlenghe Judah-eke artweye areye-  
 ngentyele. Re kwenhe arratyete mwerre anthurre  
 aneme, Re kwenhe alartetye David-kenheke  
 artweye-ngentyele aneme, re ilyenpenye an-  
 thurre; atwentye arrpenhe anthurre. Re kwenhe  
 ameke-arle-areye aneke. Alakenhe ikweringe  
 anteme rarle thewe pipe renhe-arle inetyeke  
 ankere renhe ularte-iwemele altywere-iletyenhe  
 imerte renhe aremele.”

<sup>6</sup> Ikwere-iperrele anteme the areke yepe-yepe  
 urreye akweke \* tnerle-anerlenghe chair mw-  
 erre akngerre ikwere itwele nhenge atnunthe  
 arpelhe-akerte 4-pele mpwepele alartetye 24  
 areyele-arlke. Nhenge the Yepe-Yepe Akwerrke  
 areke imerte ayenge itirremele, “Renhe apeke  
 arrpenhele akwele irrerlknghe atweke, re akenhe  
 awethe itethe-anteme-irriktneke.” The areke  
 rarle rulye-rulye seven-akerte alknghe seven-  
 akerte anerlenghe. Alknghe seven yanhe ar-

---

\* **5:6** Yepe-yepe urreye akweke nhenhe kwenhe Jesus Christ-arle  
 aneme.

eye aneke utnenge seven Ngkartele-arle ap-  
 mere ahelhe nhenhe itepe arrpe-anenhe-werne  
 yernekeke. <sup>7</sup> Yepe-Yepe Akwerrke yanhe al-  
 heke pipe imarteye-iweke-arle renhe arrpenhe-  
 ngentyele inemele chair anyente-arle anekeke  
 renhe iltye akwe-arratyē ikwerenhele arn-  
 twirrkemele. <sup>8</sup> Nhenge re pipe ineke-arle, at-  
 nunthe arlpelhe-akerte four-pele uthene alarte-  
 tyē twenty-four uthene Yepe-Yepe Akwerrke  
 ikweringe arrekwele ulperre inteke inngerre  
 kwene-akerle renhe tnaketyeke. Itne arrpe-  
 anenhele arne guitar-arteke atnyeneke, apanthe-  
 arlke gold-engentyele-arle mpwarekeke. Apan-  
 the areye-ngentyele kwerte ntyentye mwerre  
 akngerre Ngkarteke akertne-atheke urnteme,  
 nhenge re kwerte mwerre akngerre ntyernemele  
 Re atnerte akangkentye anthurre aneke. Kwerte  
 nhenhe kwenhe alakenhe-arteke aneke nhenge  
 atyewe Ngkarte-kenhe areye Ikwere angkeme.  
 Re itnenhe aweke akangkemele anteme aneme,  
 nhenge alakenhe-arteke re kwerte ntyentye mw-  
 erre akngerre ntyernemele. <sup>9</sup> Kele imerte at-  
 nunthe four-pele uthene alartetye twenty-four  
 uthene Yepe-Yepe Akwerrke ikwere alyelhentye  
 arrpenhe alakenhe alyelhemele:

“Unte anyente ware kwenhe arratyē mwerre  
 anthurre-ulkere aneme pipe imarteye-  
 iweke-arle inetyeke renhe altywere-  
 ilettyeke.

Unte-ante ware kwenhe ankere ularte-  
 iwetyeke renhe altywere-ilettyeke,  
 unte-arle kwenhe anwerneke piwelhemele il-  
 weke, arrule anthurre-arle,

alhwe ngkwinhe tyerrtye ingkirreke ap-  
mere arrpe-anenhe-arenye areyeke thelel-  
hemele.

Unte tyerrtye areye itetheke mpwareke angken-  
tye arrpenhe-arle angkemeke, tyerrtye  
areye yenpe arlkenye arrpenhe-akerte-  
arle, tyerrtye areye apmere arrpe-anenhe-  
arenye areye-arle.

Unte itnenhe Ngkarte-werne akngetye-  
alpeke, nhenge yanhe-ngentyele itne  
lkwerenhe anetyenhenge.

<sup>10</sup> Kele itnekenhe alartetye irreke-arle unte it-  
nenhe kwertengerle tyatyekenhe areye  
anetyeke arrerneke warrke Ngkarte-kenhe  
aywerrkele mpwarerlte-anetyeke,  
arlte urreke-arle anteme itne tyerrtye ingkir-  
reke anthurre arntarnte-areme anteme  
apmere ahelhe nhenhele-arle anemeke.”

<sup>11</sup> Nhenge the akwete aretyame the alkere-  
arenye atningke anthurre areke, arunthe  
anthurre itne aneke, yerre areye-arteke. Itne  
kwenhe chair mwerre akngerre yanhele itepe  
arrpe-anenhe tnetyame, atnunthe four-pele  
areye-arlike alartetye twenty-four areye-arlike.

<sup>12</sup> The itnenhe ingkirreke anthurre alyelherlenge  
aweke, arnterre anthurre alakenhe arlkemele:

“Anwerne Yepe-Yepe Akwerrke yanhe renhe  
akwetethe akertne utyernerlte-aneye!  
Renhe-arle itne irrerlkngge atweke,  
kenhe re akenhe awethe-arle itethe-  
irrirtnerlenge, re mwerre akngerre  
anthurre aneme.

Yepe-Yepe Akwerrrke yanhe re alartetye anthurre  
anwerne-kenhe aneme Utmenge Ngkarte-  
kenhe-akerte,

nhenge arne ingkirreke atnyenemele, re  
itnenhe akwetethe mwantyele antherle-  
aneme.

Re kwenhe akaperte altywere anthurre  
aneme, arratye akwetethe itirrerle-aneme,  
re arne areye ilyernpenye mpwarerle-  
aneme.

Kele anwerne renhe akwetethe akertne  
utyernerlte-anemele tnakewarreye.”

<sup>13</sup> Ikwere iperrele anteme the arne ingkir-  
reke alyelherlenghe aweke Ngkartele-arle mp-  
warekeke, tyerrtye-arlke, atnunthe-arlke, thipe-  
arlke, irrpenngge-arlke, arne ingkirreke apmere  
ahelhele-arle anemeke, alkerere-arlke, kwatye  
kwenele-arlke. Itne ingkirreke alakenhe alyel-  
heke:

“Tyerrtye ingkirrekele kwenhe yanhe renhe  
akertne utyernerlte-anemele tnaketyeke,  
renhe chair mwerre akngerrele-arle  
anerle-anemeke! Itne Yepe-Yepe  
Akwerrrke akwetethe akertne utyernerlte-  
anemele tnaketyeke!

Yanhe atherre kwenhe arratye mwerre akngerre  
aneme, nhenge arne ingkirreke ilyern-  
penye anthurre mpwaretyeke, Ratherre  
apmere arrpe-anenheke alartetye anerle-  
anerremele.

Kele anwerne ikwere-atherre akangkemele  
artepe kwene-irremele, akwetethe  
alyelhemele, tnakemele anteye,  
akwetethenhe-akwetethe!”



14 Nhenge itne alyelhentye uyerremele, atnunthe four-pele chair akngerre-apenhe yanhe ikwere-arle itwele tnetyameke, alakenhe angkemele, “Yewe, yanhe kwenhe mwerre anthurre-arle!” Alartetye 24 areye artepe kwene-irremele anteye Renhe akertne utyernemele tnakeke.

## 6

*Rarle thewe, Yepe-Yepe Akwerrke-arteke-arle anemeke, ankere pipe imarteye-iweke-arle-nge ularte-iweme*

<sup>1</sup> The anteme Yepe-Yepe Akwerrke-arteke areke pipe imarteye-iweke-arle renhe ankere arlware seven-akerte akwete arntwirrkerlenge. Nhenge the aretyamele re ankere arlware anyente-urrke pipe-ngentyele ularte-iwerlenge. The anteme aweke four-pele atnunthe-ngentyele anyente angkerlenge, angkentye kwatye angkemele-arteke, “Apetyaye.” \* <sup>2</sup> Nhenge re arlkeke, the areke nanthe mperlkere arraterlenge-arle. Artwe irrtuarte-akerte nanthe artepele, arrpenhele renhe tyellarre mwerre akngerre antheke nhenge imernetyeke rarle alartetye atyeperre anemenge. Re nanthe artepele alheke, tyerrtye yanhe areye irrerlknge atwetyeke ikwere-arle ahentye anetyakenhe anekeke. Rarle kwenhe atwerretyeke ilyernpenye anthurre aneke.

---

\* **6:1** Ankere nhenhe kwenhe anwerne-kenhe-arteke anetyakenhe arrpenhe kwenhe aneme, nhenge arne iwenhe apeke ikwereke-arleke arrernerlenge re mwerre ularte-iwerlenge.

*Rarle thewe, Yepe-Yepe Akwerrke-arteke-  
arle anemeke, ankere arrpenhe anteme, ularte-  
iwetyeke*

<sup>3</sup> Kele rarle thewe, Yepe-Yepe Akwerrke-arteke-  
arle anemeke, ankere arrpenhe anteme ularte-  
iweke. Kele imerte the aweke atnunthe arrpenhe  
arrpenheke arlkerlenghe, “Apetyaye!” <sup>4</sup> Kele  
anteme artwe arrpenhe nanthe athethekeke-  
arlenghe arrateke. Ngkartele artwe renhe  
alyweke arlpentye akngerre antheke-arle renhe  
ileke alhetyeke tyerrtye areye apmere ahelhe  
arrpe-anenhe-arenye uternetyeke ingkirreke  
atwerretyeke, irrerlknghe atwerretyeke nhenge  
yanhenge itne mwerre awethe anetyakenhe  
anetyenhenge.

*Rarle thewe, Yepe-Yepe Akwerrke-arteke-arle  
anemeke, ankere arrpenhe anteme, ularte-iweme*

<sup>5</sup> Kele rarle thewe, Yepe-Yepe Akwerrke-  
arteke-arle anemeke, ankere arrpenhe anteme  
ularte-iweke. Kele imerte the aweke atnunthe  
arrpenhe arrpenheke arlkerlenghe, “Apetyaye!”  
The iparrpe anthurre areke artwe arrpenhe  
nanthe urrperleke-arlenghe arrateke. Artwe  
yanhele iwenhe apeke renhe atnyenemele  
merne ulthentye apeke aretyeke. <sup>6</sup> The anteme  
iwenhe apeke renhe ahentye-arteke aweke  
atnunthe four-pele areye-ngentyele arraterlenghe.  
Re kwenhe artweke alakenhe angketyame  
nantheke-arlengheke, “Arlte lyete ulkere, artwe  
kwenhe ingweke-atwetye warrke-irreme, kele  
anteme apwerte ngkweltye ikwerenhe inemele  
imerte ngkweltye renhe uyerrelhe-ilemele

merne akweke ware inetyeke. Re ngkweltye ikwerenhele tyampite annge wheat-akerte anyente-ante ware inetyeke, tyampite barley-akerte urrpetye-arlke apeke. Kele mwantyele awerrirraye, arne olive-akerte areye-arlke, arne kripethe areye-arlke mwantyele arntarnte-araye, itnenhe ultaketyale anteme anaye.”

*Rarle thewe, Yepe-Yepe Akwerrke-arteke-arle anemeke ankere arrpenhe anteme ularte-iweme*

<sup>7</sup> Kele rarle thewe, Yepe-Yepe Akwerrke-arteke-arle anemeke, ankere arrpenhe anteme ularte-iweke. Kele imerte the aweke atnunthe arrpenhe arlkerlenghe, “Apetyaye!” <sup>8</sup> Kele anteme the areke nanthe arrerlkere arraterlenghe, nanthe yanheke-arlenghe artwe arritnye-arle “Atwenhe-atwenhe-arle” ilemeke. Artwe arrpenhe nantheke-arlenghe ingkernele apetyemele, arritnye-arle “Ahelhe Irrare” ilemeke. Arrpenhe ikwere-atherre angkeke, “The kwenhe mpwelenhe yerneme apmere arrpe-anenhe-werne alhetyeke, tyerrtye arrpenhe areye ilyernpenyele irrerlknghe atwetyeke. Kenhe arrpenheme ilwetyenhe nternenheke-arle iperrenghe, arrpenheme ilwetyenhe angayakwe akngerre-irreke-arle iperrenghe ahurraty e akngerre-arle anerlenghe, kenhe arrpenheme akenhe ilwetyenhe rlkerte akngerre-arle ipenhele, kenhe arrpenheme akenhe ilwetyenhe nhenge atnunthe ahe akngerrele itnenhe arlkweme. Alherraye, alakenhe renhe mpwarerle-anerraye, kenhe tyerrtye ingkirreke atweme-ketye, nhenge arrpenheme ware itne ilwetyeke. Nhenge

ratherre apeke tyerrtye anyente irrerlknge atweme, arrpenhe urrpetye itethe akwete anemele impetyeke, alakenhe re.”

*Rarle thewe, Yepe-Yepe Akwerrke-arteke-arle anemeke ankere arrpenhe anteme ularte-iweme*

<sup>9</sup> Kele rarle thewe, Yepe-Yepe Akwerrke-arteke-arle anemeke, ankere arrpenhe anteme ularte-iweme. Kenhe the kwerrene atningke areke arrpenhe areyele-arle irrerlknge atwekeke. Itne ure rerrkenge kwenele nhenge tyerrtye areyele-arle arne areye akngetyetyarte imerte itnenhe Ngkarteke itemele. Tyerrtye areyele itnenhe irrerlknge atweke-arle, itne-arle Ngkarte arratyte itelarekenge, itne-arle akwetethe unthetyarte arrpenhe areyeke ayeye mwerre Jesus-akerte ilerlte-apemele. <sup>10</sup> Kwerrene yanhe areye kwenhe irnterre angkemele, “Ngkarte Alartetye-aye, Unte apele lterrke akngerre anthurre aneme, Unte kwenhe arratyte mwerre anthurre aneme, Unte kwenhe arratyte angkerle-aneme. Ilengare-ame Unte tyerrtye ingkirreke apmehelhe nhenhe-arenye court-eke ngkernetyenhe itnenhe akalkelhe-ilemele imerte irrerlknge atwemele itne-arle anwernenhe irrerlknge atwekenge?” <sup>11</sup> Kele Ngkartele itnenhe ingkirreke mantere mperlkere irrpetyeke antheke itneke angkemele, “Akarelhemele anaye, The kwenhe arrpenhe areye akngakeke, nhenge alakenhe-anteye-arle ilwetyenheke arrantherre-arle ilwekeke-arteke itne-arle Jesus apenterlte-ankenge ikwere warrke-irrerlte-anemele. Ikwere-iperrele anteme The itnenhe

arrekantherrenge apurtelhe-iletuyenhe-anteye. Ikwerenge-ante ware anteme The arrpenhe areye akalkelhe-iletuyenhe arrenhantherrenhe-arle irrerlknge atwekeke.”

*Rarle thewe, Yepe-Yepe Akwerrke-arteke-arle anemeke ankere arrpenhe anteme ular-te-iweme*

<sup>12</sup> The kwenhe renhe areke, rarle thewe Yepe-Yepe Akwerrke-arteke-arle anemeke, ankere arrpenhe anteme ular-te-iweke. Kele ahelhe-anteme akngelhetyeke-irreke akiltye-irremele. Arlennge pwarrtyetyakenhe aneke ingwemerte-anteme-irreke, kenhe atnyentye-arlke akenhe alhwe-arteke athetheke-irreke. <sup>13</sup> Kenhe kwerralye atningke alkere-ngentyele ahelhe-werne-atheke atnyeke. Arrantherre itelareme nhenge nthakenhe-arle rlke akngerrele antethe areye atnyetyeke uyerretyeke anteme mpwareke, alakenhe-arteke. <sup>14</sup> Kenhe alkere uyerreke, nhenge tyerrtyele pipe imarteye-iweme-arteke. Apwerte antherrtye ingkirreke akngelhetyame, akeme-irremele anteme apmere arrpenheke-arleke arrernelhemele. Apmere akweke areye nhenge kwatye mpwepele-arle anemeke, itne-arlke kwenhe akngelhetyame alakenhe re-anteye. Itne ingkirreke anthurre-arle akngelheme apmere anyente-ngentyele apmere arrpenhe-werne. <sup>15</sup> Ikwere-iperrele anteme, tyerrtye ingkirrekele Ngkarte-arle arratyte itelaretyakenhe anekeke, inteye areyeke irrpemele itne-arle kwenhe atere-arlpe-irremenge. Kenhe alartetye anthurre ingkirreke apmere ahelhe nhenhe-arenye areye,

atwerrentye akngerre areyeke-arlike alartetye, tyerrtye apworte ngkweltye akngerre-akerte areye-arlike, arrpenhe areye-arlike alartetyeke-arle warrke-irremeke, arrpenhe areye-arlike itneke-arrpe-arle warrke-irremeke, ingkirreke aterele alwirreme. Arrpenheme inteye kwenele alengke-iwelheke, kenhe arrpenhe areye akenhe apworte akngerre-apenhe areyele-arleng alengke-iwelheke. <sup>16</sup> Itne apworte areyeke arlketyame, “Anwerneke-arleke atnyerrirraye, anwernenhe Ikwere-ketye alengke-iwemele, Ikwere-ketye thewe chair mwerre akngerrele-arle anemeke anwernenhe areme-ketye. Kele-anteye-arle Yepe-Yepe Akwerrke-arteke apeke anwerneke ahele-irreme-ketye imerte anwernenhe irrerlkngge atwemele. <sup>17</sup> Arlte anwerne-kenhe kele-arle aneke nhenge ratherre imernetyeke ratherre-arle anwerneke ahele anthurre anemele. Lyete kwenhe ratherre anwernenhe ureke iwetyeke-urletye, anwerne apatemele anthurre anetyenhenge anwerne-arle renhe-atherrenhe uyarne ayakemenge.”

## 7

*Alkere-arenye Ngkarte-kenhe areyele tyerrtye Israel-arenye 144,000-eke-arleke imperre arrerneme*

<sup>1</sup> Nhenge ikwere-iperrele the areke alkere-arenye four-pele tnerlte-anerlengge, anyente kwenhe Iknngerrele tnerle-anetyame, anyente akenhe Alturlele, anyente akenhe Ayerrerele, anyente akenhe Antekerrele.

Itne kwenhe aperretyame rlkele wernemeketye, re wernetyakenhe anetyeke apmereketye, re wernetyakenhe anetyeke apmereketye, nhenhe akethe-ante arrernemeketye, kwatye alaye-arlke, arne areye-arlke. <sup>2</sup> The anteme areke alkere-arenye arrpenhe Ikngerre-ngentyele atyenge-wernetheke apetyerlenge. Kenhe re akenhe iltie ikwerenhele atnyeneke arne nhenge imperre arrernetyeke, nhenge re tyerrtye areyekerleke imperre arrernetyenhenge Ngkartekenhe areye-arle atyene anemeke. Re alkere-arenye four-peleke arnterre anthurre angkemele rlkele-arle aperretyameke wernemeketye, <sup>3</sup> “Akwete akarelhaye, ahelhe-arlke, kwatye alaye-arlke, arne areye-arlke akwete akethe-ante arrernetyale anaye. Anwerne kwenhe urle itnekenheke-arleke imperre arrernetyeke Ngkartearle arratyete itelaremeke, warrke Ikwerenhearle aywerrkele mpwarerlte-anemeke.” Re kele urleke-arleke intelhe-iletieyete irreke yanhe areyete warrke Ngkartekenhe-arle aywerrkele mpwarerlte-anemeke. <sup>4</sup> Alkere-arenyele anteme atyenge ileke, “Tyerrtye nhenhe areye kwenhe alere 12-pele artwe ampwe Israel-kenhengentyele arrateke, yanhe kwenhe yerre anthurre aneme, 144,000. Arrule anthurrearle Israel-ele alere twelve-pele atnyeneke-arle, alere itnekenhe arritnye aneke Judah, Reuben, Gad, Asher, Naphtali, Manasseh, Simeon, Levi, Issachar, Zebulun, Joseph, Benjamin uthene. Itneke-ngentyele aneke nhenge atyemeye areye ikweringentyele akwerrke-ipenhe atningkeame-atningke-irreke. <sup>5</sup> Kele itne urle itne-

kenheke-arleke imperre arrerneke:

atyemeye 12,000 peleke Judah-kenhe areye-  
ngentyele,

atyemeye 12,000 peleke Reuben-kenhe areye-  
ngentyele,

atyemeye 12,000 peleke Gad-kenhe areye-  
ngentyele,

<sup>6</sup> atyemeye 12,000 peleke Asher-kenhe areye-  
ngentyele,

atyemeye 12,000 peleke Naphtali-kenhe areye-  
ngentyele,

atyemeye 12,000 peleke Manasseh-kenhe  
areye-ngentyele,

<sup>7</sup> atyemeye 12,000 peleke Simeon-kenhe areye-  
ngentyele,

atyemeye 12,000 peleke Levi-kenhe areye-  
ngentyele,

atyemeye 12,000 peleke Issachar-kenhe areye-  
ngentyele,

<sup>8</sup> atyemeye 12,000 peleke Zebulun-kenhe  
areye-ngentyele,

atyemeye 12,000 peleke Joseph-kenhe areye-  
ngentyele,

atyemeye 12,000 peleke Benjamin-kenhe  
areye-ngentyele-arlike.

Itne urlle itneke-kenheke-arleke imperre ar-  
rerneke nhenge imernetyeke Ngkartele-arle it-  
nenhe ingkirreke anthurre akayake-ileme.”

*Tyerrtye atningke anthurre chair mwerre  
akngerre anthurrenge arrekwelele tnerrire*

<sup>9</sup> Ikwere-iperrele anteme the tyerrtye atningke  
anthurre areke tnerlte-anerlenge, yanhe



ikwerele atningke anthurre aneke, nthakentye apeke uyarne itelareme. Itne kwenhe apmere arrpe-anenhe-ngentyele apetyeke, angkentye arrpe-anenhe itne angkeke, apmere ahelhe arrpe-anenhe-ngentyele, ayenpe arlkenye arrpe-anenhe-ngentyele. Itne chair mwerre akngerre anthurrenge arrekwele tnerriretyame, Yepe-Yepe Akwerrke-artekenge-arlke, itne ingkirreke mantere mperlkereke irrpeke. Ilye itnekenhele itne arlpelhe arlpentye akngerre atnyeneke nhenge arne date-ngentyele-arteke. <sup>10</sup> Itne anteme arlkeke alakenhe angkemele, “Ngkarte, chair-elarle anemeke uthene Yepe-Yepe Akwerrke-arteke uthenele anwernenhe akayake-ileke-arle, anwernenhe mwantyele arntarntearemele ilweme-ketye. Anwerne anteme renhe-atherrenhe akwetethe akertne utyernerlte-anemele tnaketyenhe.” <sup>11</sup> Kenhe alkerearenye ingkirreke akenhe chair yanhe ikwerele tnerrireke, alartetye 24 areye-arlke, atnunthe 4-pele-arlke. Itne ingkirreke anthurre artepe kwene-irremele, ulperre interrirremele, Ngkarte akertne utyernemele tnakewarreke, <sup>12</sup> alakenhe angkemele, “Yewe, Unte Ngkarte anwernekenhe kwenhe arratye mwerre anthurre aneme, Unte kwenhe ingkirreke anthurre ilyernpenye anthurrele akwetethe mpwareme, akaperte altywerele mpwarerle-anemele. Anwerne kwenhe Ngkwenge akwetethe akangkemele aneme Ngenhe akwetethe tnakewarremele. Unte kwenhe Ngkarte anwerne-kenhe itethe akwete-ante anerle-aneme. Ye, yanhe kwenhe mwerre aneme.”

<sup>13</sup> Kenhe alartetye anyentele akenhe ayenge apayuthneke, “Angwenhe apeke-ame tyerrtye nhenhe areye mantere mperlkere-akerte? Nthenhe-ngentyele-ame itne apetyeke?”

<sup>14</sup> Ayenge anteme ikwere angkeke, “Yekwe, ayenge akutne. Unte apeke-arle itelareme.”

Re-anteme atyenge angkirtnerlenge, “Arrpenhe areyele kwenhe itnenhe arlkarentye-iletartye, itnenhene atwemele, rlkerte anthurre ilemele. Kele anteye-arle re apeke itneke akurne anthurre irreke, itne Ngkarte-ngentyele akwete untyeme-irretyakenhe. Itne kwenhe arrekwele arne akurne areye mpwaretyarte, itne akenhe itelareke Yepe-Yepe Akwerrke-arteke-arle itneke ilwekenge, alhwe ikwerenhe itneke thelelheke. Itne anteme mantere itnekenhe alhwe Yepe-Yepe Akwerrke-kenhenge alheweke itnenhe mperlkere-ilemele. <sup>15</sup> Alakenhe

ikwerenge anteme itne kwenhe chair mwerre akngerre Ngkarte-kenhenge arrekwele tnerlte-aneme, ingwartentyele arltele-akake tyatye Ikwerenhele Ikwere akwetethe warrke-irremele. Rarle thewe, chair-elarle anerle-anemeke, itnenhe arntarnte-aremele, re itnekenge akwetethe anerle-aneme. <sup>16</sup> Itne kwenhe

awethe angayakwe-irretyakenhe anetyenhe nhenge kwatyeke angkethakwe-irretyakenhe anetyenhe. Kenhe arlengele apeke urele apeke itnenhe awethe ampetyakenhe anetyenhe.

<sup>17</sup> Kele Yepe-Yepe Akwerrke, chair mwerre akngerrele-arle anemeke, re itnenhe akayake-iletienhe mwantyele arntarnte-aremele, yepe-yepe arntarnte-arentye akngerrele yepe-yepe

ikwerenhe areye-arrpe arntarnte-areme-arteke. Arrantherre itelareme nthakenhe-arle yepe-yepe arntarnte-arentye akngerrele yepe-yepe ikwerenhe areye kwatye-werne antywetyeke akngeme. Nhenge itne apeke kwatye yanhe-arteke antywerlenghe itne itethe akwete-ante anetyenhe. Ngkartele kwenhe alkngultye itnekenhe urrparyenhe, nhenge itne awethe artnetyakenhe anetyenhenge.”

## 8

*Rarle Yepe-Yepe Akwerrke-arteke-arle ane-meke, ankere arrpenhe, 7-arle, ularte-iweme*

<sup>1</sup> The anteme Yepe-Yepe Akwerrke-arteke areke pipe imarteye-iweke-arle renhe akwete arntwirrkerlenghe. Nhenge the aretyame re ankere arlware ingkernenye, 7-arle, pipe-ngentyele ularte-iwerlenghe, kele imerte alkere akertne ikwerele nterte anthurre aneke nhenge angketye-arlke-akenhe anthurre aneke akweke ware. <sup>2</sup> The anteme areke alkere-arenye seven-pele Ngkartenge arrekwele tnerlenghe, Ngkartele anteme itnenhe-arrpe trumpet atnyenetyeke antheke.

<sup>3-4</sup> Alkere-arenye arrpenhele panthe arntwirrkeke gold-engentyele-arle mpwarekeke. Panthele-arlenghe tyerrtye areyele arne nhenge ankere-arteke akwernetyarte imerte renhe itemele nhenge yanhe-ngentyele kwerte ntyentye mwerre akngerre anthurre antyetyenhenge. Chair mwerre akngerrenge arrekwele arne arrpenhe tneke ankere itetyeke arne akertneke-arleke itne-arle arne areye

Ngkarteke akwetethe itetyarte. Alkere-arenye yanhe apetyemele ure itwele tnetye-alheke ankere-arle ampetyameke. Alkere-arenye arrpenhele anteme renhe ankere akngerre- apenhe anthurre antheke ure yanhe ikwere- arleke arrernetyeke Ngkarteke ampetyeke. Nhenge re arne renhe ureke arrernemele ampetyeke. Ngkarteke ure kwerte ntyentye mwerre akngerre anthurre ntyernemele Re akangkemele anthurre aneke. Alakenhe-anteye- arle, nhenge Ngkarte-kenhe areye Ikwere angkemele, angkentye itnekenhele Ikwere- werne antyemele nhenge Ikwere akangkemele anetyeke. <sup>5</sup> Kele imerte alkere-arenye yanhele tyampite inemele kwerte-kwarte-arle ntyentye mwerre akngerre ilemeke. Re aperrke ure rerrke-ngentyele ineke tyampite ikwere-arleke arrerneke. Re-anteme arne renhe apmere ahelhe nhenhe-werne iweke. Nhenge re iweke- iperrele kwatye angkerleng, kwatye alarrkeme, apmere ahelhe nhenhe akngelheke tyarrpe- irremele.

*Alkere-arenye areyele pewe-ileke trumpet it- nekenhele aywerre akngerre-anteme-irrerleng*

<sup>6</sup> Kele alkere-arenye seven-pele pewe-ilettyeke- uryetye aneke trumpet seven-pele itnekenhele aywerre akngerre ilettyeke. <sup>7</sup> Kenhe alkere- arenye arrekwele-iperrele pewe-ileke trumpet ikwernenhele aywerre akngerre irrerleng, iparrpe anthurre kwatye apweteke-arlke ure- arlke alhwe-arlke alkere-ngentyele thelelheke ahelheke-arleke itnyeke. Kenhe apmere

arrpenheme urele ampeke, arne arrpenheme-arlke name ingkirreke-arlke. Kenhe ahelhe arrpenhe akenhe mwerre akwete-arle aneke.

<sup>8</sup> Alkere-arenye arrpenhele anteme, pewe-ileke trumpet ikwerenhele aywerre akngerre-irrerlenghe. Iparrpe anthurrele apwerte akngerre anthurre akenhe akwele-arle ampekeke alkere-ngentyele kwatye alayeke atnyeke. Itere arrpenhenge akenhe kwatye alaye re alhwe-irrerlenghe.

<sup>9</sup> Kenhe arne arrpenheme-arlke kwatye kwene-arenye yanhe ikwerenge ilweke, boat arrpenheme akngelhetyamele kwatye alaye ikwerenge ultakelheke kwatyeke irrpeke.

<sup>10</sup> Alkere-arenye arrpenhele anteme, pewe-ileke trumpet ikwerenhele aywerre akngerre-anteme-irrerlenghe. Iparrpe anthurrele kwerralye purle anyente alkere-ngentyele atnyeke ure alkngenthe-akerte ingkirreke. Re kwatye arrpenhemeke-arleke, lhereke-arleke, kwatye pintyeke-arleke, kwatye antywentye akngerreke-arleke-arlke atnyeke. <sup>11</sup> Kwerralye arritnye aneke “Kwatye Irrkerteye-ilentye akngerre.”

Nhenge re kwatye pintye arrpenhemeke-arleke atnyeke re itnenhe irrkerteye-ileke, kele nhenge tyerrtye areyele kwatye pintye-ngentyele antyweke itne ilwerrirreke anteme. Tyerrtye atningke anthurre ilwerrirreke kwatye yanhe-arle antywerirrekenge.

<sup>12</sup> Alkere-arenye arrpenhele anteme, pewe-ilemele trumpet ikwerenhele aywerre akngerre-irrerlenghe. Iparrpe anthurre-arle, arne iwenhe apeke re alkngenthe arlengge renhe itepe arpenhe arrkngerte-ileme, atnyentye renhe itepe

arrpenhe-arlke, apmere ahelhe nhenhe re-anteme ingwemerte-irrekenge. Kenhe kwerralye arrpenheme alkngenthe pwarrtyetyakenhe aneke. Alakenhe ikwerenge anteme arlenge kwenhe ampetyakenhe aneke arlte mpwepeke-atwetye, ingwele atnyentye uthene kwerralye uthene ampeke akweke wareke-atwetye.

13 The anteme alkere arnareme imerte aremele irretye nhenge akertne anthurre alkereke-irrerlenge. The renhe aweke arnterre angkerlenge alakenhe, "Araye, Ayenge kwenhe tyerrtye areyeke alhwarrpe anthurre awelheme apmere ahelhe nhenhe-arle anemeke, itneke akurne akngerre anthurre-arle irretyehenge nhenge alkere-arenye urrpetye ingkerne-ipenhele pewe-ilerlenge trumpet itnekenhe areyele aywerre akngerre-irrerlenge. Tyerrtye akunye areye! Urrpetye-ngare kwenhe itneke arne akurne-anthurre-irretyehenge. Arne akurne akngerre nhenhe areyele itnenhe alhwarrpe anthurrele anthetyenhe." Alakenhe renhe the aweke irretye angkerlenge.

## 9

1 Alkere-arenye arrpenhele anteme pewe-ileke trumpet ikwerenhele aywerre akngerre anthurre ilemele. Iparrpe anthurrele the areke alkere-arenye akurne anthurre anerlenge. Re kwenhe kwerralye-arteke aneke alkere-ngentyele-arle ahelhe-werne-atheke atnyeke. Arrpenhele renhe key antheke iperte akngerre

anthurre altywere-iletayeke ahelhe kwene-werne-atheke-arle irreke. \* 2 Kwerralye yanhele arne nhenge akngeke iperte anthurre altywere-anteme-ileke, ure kwerte antyure akngerre altywere akngerre yanhe ikwerenge-ntyeye akeme-irreme ure akngerre-arle ampeke-arteke. Kele imerte ingwemerte-irrerlengere ure kwerte antyure akngerre-arle iperte anthurre-ngentyeye akeme-irrerlengere, alkngenthe arlengere-ketye arrkngerte-ilemele. 3 Kele inteltye atningkere anthurre ure kwerte-ngentyeye arrateke, ahelhe-werne kwene-akerle apetyemele. Kenhe Ngkartele itnenhe akngarte-iweke itne atnethakertele-arteke atanthetyeke. 4 Re anteme itneke angkeke, "Atherrke arlkwetyale anetyeke arne apeke arne atherrke arrpenhe-arlike apeke, tyerrtye atanthetyale anetyeke imperre Ngkarte-kenhe-arle urlele anemeke-akerte. Tyerrtye arrpenhe areye-ante ware atanthaye. 5 Nhenge arrantherre itnenhe atanthemele itnenhe irrerlknge uthnetyalaye, kele itnenhe rilkerre akngerre anthurre ilemele ware nhenge atnyentye five-peleke-atwetye ware, itnenhe akwetethe kwarnerlte-anetyenhe atnethakerte yanhele-arle itnenhe atantheke. 6 Arlte yanhe ikwerele-ureke tyerrtye areyele ilwetyeke ahentye anetyenhe alakenhe itirremele, 'Ayenge kwenhe iparrpe-iparrpe ilwetyeke ahentye-aneme, ayenge kwenhe uyarne anthurre

---

\* **9:1** Iperte nhenhe ikwere kwene-werne Ngkartele-arle arren-tye areye arrerneke martemele nhenge urreke arlte ingkernenge Re itnenhe ureke-arlike iwetyenhenge.

itirreme rlkerte akngerre nhenhenge ularre.' Itne akenhe ilwetyakenhe anetyenhe, itne kwenhe rlkerte akngerre anthurre yanhe ikwere-akerte akwete anerlte-anetyenhe."

<sup>7</sup> Kele the anteme areke inteltye nanthe areye-arteke angkarre-angkarre tnerrirrerlenge atwerretyeke alhetyeke-urletye. Itne inngerre artwe areye-arteke, mwekarte akaperteke irpeke, arrantherre itelareme tyellarre nhenge alartetye areye-arle irrpeme gold-engentyele-arle mpwarekeke. <sup>8</sup> Itne alte arlpentye-akerte marle-arteke, artitye itnekenhe arrirrlpe anthurre lion-kenhe-arteke-arle. <sup>9</sup> Arerreke-arleke itne arne alkwerte iron-artekeke irrpeke, ilpelhentye akngerre. Nhenge itne ingkirreke arlpelhe akngelhekenge the aweke aywerre akngerre anthurre irrerlenge, nhenge nanthe wagon-akerte atningkele aywerre unteme-arteke aheke akngerre atwerretyeke nhenge aywerre akngerre irremele. <sup>10</sup> Itne tile-akerte nhenge atnethakerte-arteke tyerrtye areye atanthetyeke itnenhe rlkerte-akngerre-ilettyeke, itne tile-le tyerrtye areye rlkerte anthurre ilettyenhe atnyentye five-ke-atwetye. <sup>11</sup> Alkere-arenye anyente aneke inteltye nhenhe areyeke alartetye-arle, re iperte akngerre kwerte-akerte yanhe renhe arntarnte-aretyarte. Nhenge angkentye Hebrew-ele arritnye ikwernenhe Abaddon aneke, nhenge angkentye Greek-ele akenhe arritnye ikwernenhe Apollyon aneke. Arritnye nhenhe atherrele kwenhe ileme, "Nhenhe kwenhe Akethe-ante Arrernentye Akngerre-arle anekeke."

<sup>12</sup> Yewe, yanhe re-arteke kwenhe aneke, arne



akurne anthurre arrekwelenye alakenhe re-anteme urreke ulkere-arle aneme uyerretyenhenge anteme, ikwere-iperrele anteme arne akurne akngerre arrpenhe atherre irretyenhe.

<sup>13</sup> Alkere-arenye arrpenhele anteme pewe-ileke trumpet ikwerenhele aywerre akngerre-ilemele, the anteme aweke angkentye apwerte athirnte yanhe-ngentyele apetyerlengen thenhele-arle itne arne areye Ngkarteke ampeke. Apwerte athirnte yanhe re kwenhe aneke gold-elarle artekeke nhenge Ngkartenge arrekwele tneme. Apwerte athirnte akertneke-arleke itne arne ankere-arteke ampeme ure kwerte-ilemele nhenge ntyentye mwerre akngerre anthurre. Apwerte athirnte re itepe 4-pele-akerte, angkentye apetyeke itepe arrpe-anenhe-ngentyele. <sup>14</sup> Re alkere-arenye trumpet-akerteke, alakenhe angkeke, “Lhere Euphrates-werne alhaye alkere-arenye four-pele irlwemele aywepetyeke unte-arle yanhe ikwerenge ayerneke-arle aretyenhenge.” <sup>15</sup> Kele re alheme alkere-arenye four-pele irlwemele aywepeke. Kenhe Ngkartele kwenhe itnenhe atnyenetyame nhenge arlte arratyeke-ante Ngkartele-ante ware-arle itelaremeke. Kele nhenge arlte yanhe re apetyerlenge arrpenhele apeke imerte itnenhe irlwemele aywepetyeke, itne anteme alheme tyerrtye arrpenheme irrerlknge atwetyenhenge apmere ahelhe arrpe-anenhele-arle anemeke. <sup>16</sup> Kenhe arrpenhele atyenge ileke artwe atwerrentye akngerre atningke anthurre anerlenge nanthe artepele, atningke akngerre anthurre 200 million-

arle. <sup>17</sup> Artwe atwerrentye akngerre nhenhe areyele atnyeneke arne alkwerte-arteke iron-gentyele-arle mpwarekeke arlkenye areye-akerte nhenge arerre ilpelhetyeke. Arrpenheme athetheke aneke nhenge ure alkngenthe-arteke, arrpenheme alkere-alkere aneke, arrpenheme untarne-untarne aneke nhenge antethe-arteke. Kenhe nanthe areye akaperte lion-kenhe-akerte aneke, ure alkngenthe akngerre arrakerte itnekenhe-ngentyele arrateke, ure antyure-arteke akeme-irreme ntyenge irntirte-akerte.

<sup>18</sup> Ure alkngenthe-arlke ure antyure-arlke nanthe arrakerte-ngentyele arrateme tyerrtye atningke anthurre irrerlkngele atwerlunge apmere ahelhe arrpe-anenhele. Kenhe tyerrtye arrpenhe atningke akenhe itethe akwete aneke.

<sup>19</sup> Nanthe areyele itnenhe irrerlknge atweke nhenge arrakerte-ngentyele tile areyele-arlke, tile itnekenhe akaperte apmwe-kenhe-arteke-akerte, itne tyerrtye areye irrerlknge atweke nhenge apmwe ahe-akngerre areyele-arle uthnemele irrerlknge atweme-arteke.

<sup>20</sup> Ahe nhenhe ikwerenge-ntyale tyerrtye atningke anthurre ilwerrirreke. Kenhe tyerrtye arrpenhe areye akenhe itethe akwete aneke itne akenhe arne akurne arrpenheke-arrpenhe akwete mpwarerlte-anemele. Itne-arle kwenhe arne akurne nhenhe areke itne ikwere-ipperre atere awelhetyakenhele aneke Ngkarterne perte-irremele, arrangkwe-arle. Itne arrentye areye-ketye untyemurle-irretyakenhe itne akenhe akwete-arle itnenhe tnaketyarte. Arne ingkirreke anthurre itne arne-ngentyele

apworte-ngentyele mpwareke-arle itne arne nhenhe areyeke akwete anthurrele ahentye anemele itnenhe akwetethe tnakemele. Itne arne yanhe areye tnaketyarte gold-engentyele-arle silver-ngentyele mpwarekeke tyerrtye-arteke-arle anekeke. Itne akwetethe tnakeme arne yanhe areye uyarne-arle areme, uyarne-arle aweme, uyarne-arle unthema. <sup>21</sup> Tyerrtye areyele akurne akwete mpwarerlte-anemele perte-irretyakenhele, apure awelhetyakenhele. Itne arrpenhe areye irrerlkngge atwetyarte, arrpenhe areye artenge-iweme itnenhe rikerte-ilettyeke, itnenhe arne arrengkwelthele uthnemele, itne kwenhe anyelknggele interreme, arne arrpenhe-kenhe areye anyelknggele inemele-arlke. Itne kwenhe apure irretyakenhe aneke, alhwarrpe awelhemele angketyakenhe, itne Ngkarte-werne utepe-irretyakenhe, arrangkwe-arle.

## 10

*Alkere-arenyele pipe akweke imarteye-iweke-arle atnyeneme*

<sup>1</sup> The anteme alkere-arenye akngerre-apenhe arrpenhe areke alkere-ngentyele atnarnpe-intyerlengge. Re kwenhe tnetyame angkulyele artelheke nhenge mantere-arteke, mpwelarre akaperte itepe arrpe-anenhele aneke. Inngerre ikwerenhe imparrkeye anthurre aneke nhenge uternele ampeme-arteke, ngkwerne ikwerenhe imparrkeke ure alknggenthe ngkwerne-arteke. <sup>2</sup> Re kwenhe pipe akweke atnyenemele arrpenhele-arle

kele altywere-ilekenge. Ingke akwe-arratyete re kwatye alaye akngerrele tneke, ingke akwangenyete re apmere ahelhele tneleme. <sup>3</sup> Re arnterre anthurre arlkeke nhenge lion akngerre-arle arlkeme-arteke. Nhenge re arlkeke-arle-iperre arne iwenhe apeke re kwatyete arnwangkemele-arteke alkere-ngentyete sevenngare arrware angkemele. <sup>4</sup> Nhenge tharle arrware awemele ayenge alhetyete itirreke intelhe-iletete iwenhe-arle angkekenge. Kenhe urreke the iwenhe apeke renhe intelhe-iletetenhenge, the aweke angkentye arrpenhe alkere-ngentyete angkerlenghe, “Impaye! Intelhe-iletetalaye angkentye kwatye-arle sevenngare angkekeke! Itnenhe alengke-iweme, arrpenhe areyete iletete anaye!” Kele the impeke intelhe-iletetenkenhe aneke.

<sup>5</sup> Kele alkere-arenye yanhe ingke ikwerenhe-arle ahelhe uthene kwatye alaye utheneke-arleke arrerenekeke iltete akwe-arratete imerte akertne-ilelhemele alkere-werne-atheke. <sup>6-7</sup> Re anteme angkeke, “Tyerrtye areye awerrirraye! Ngkarte kwenhe itete akwete-ante aneme. Re kwenhe aneme apmere ahelhe nhenhe-arle mpwarekeke, alkere-arlke, kwatye-arlke, arne arrpenhe ingkirreke-arlke. Ikwerenge arrekwele kwenhe ayenge arrekantherre angkeme, ‘Arrantherre itelareme arrule anthurre Ngkartele-arle alengke-iwemele atnyeneke nhenge iwenhe apeke renhe-arle Re itirretyete mpwaretyete, Re yanhe areyete-ante ware ileke angkentye Ikwerenhe-arle arrpenhe areyete ilerlapekeke. Lyete kwenhe angkentye Ngkarte-

kenhe nhenhe akethe-irretyenhenge. Re renhe arratelhe-iletynhe nhenge alkere-arenye ingkernenyeye pewe-ilerlengge trumpet ikwerenhele angkentye akngerre-anthurre-iletayeke.’ ”

Alakenhe re alkere-arenye akngerre-apenhe yanhe angkeke.

<sup>8</sup> The anteme awethe aweke angkentye re-anteye alkere-ngentyele angkerlengge, “Alkere-arenye alartetye yanhe-werne alhaye, kwatye alayele uthene ahelhele uthene tnerle-anemeke. Pipe yanhe renhe inetyeke alhaye rarle atnyenemeke, pipe apelaye kele-arle altywere-ilekeke.”

<sup>9</sup> Kele the anteme alkere-arenye apayuthnetyeke alheke ayenge pipe anthetyeke. Re-anteme atyenge angkeke, “Me, inaye renhe arlkwaye! Arrakerte kwenele renhe ngkwarle ikwemeyearteke arrkernetyenhe, arlkwemele iperrele anteme unte awelhetyenhe atnerte ngkwinhe atnerte irrkerteye-irrerlengge.”

<sup>10</sup> Kele the anteme pipe akweke renhe alkere-arenye iltye-ngentyele akngeke renhe arlkwemele. Arrakerte kwenenge the arlkwemele arrkerneme ngkwarle-arteke, nhenge the arne renhe akwerneke-iperrele, re atnerte irrkerteye-ilerlengge.

<sup>11</sup> Kele re-anteme atyenge angkeke, “Tyerrtye ingkirrekeke angkentye Ngkarte-kenhe awethe ilerle-apetyeke alhaye nthakenhe-arle itneke irretyenhe. Itneke apmere arrpe-anenhele ilerle-apaye, tyerrtye angkentye arrpe-anenhe areyeke, tyerrtye yenpe arlkenye arrpenheke-arrpenheke, imerte tyerrtye alartetye areyeke-arlke ilemele.”

# 11

## *Yanhe atherre-akerte Ayeye Ngkarte-kenhe- arle ilerle-apekeke*

<sup>1</sup> Kele arrpenhele ayenge arne arlpentye araty e antheke. Ngkarte anteme angkeke, “Arne nhenhe inaye imerte tyaty e akngerre-werne alhemele nthenhele-arle tyerrtye areyele Ayenge tnakewarremeke. Arne yanhe akwetethe kwene arrernaye akwetethe anthurre arrkernemele nhenge yanhe-ngentyele anteme unte akaltye anetyenhenge, apmere yanhe akngerre apeke-arle anemenge. Arlpentye akngerre apeke-arle apmere yanhe re anemeke, urtekeke apeke. Alakenhe-anteye apwerte athirnte akngerre yanheke arrkernaye, arne areye-arle Atyenge itentye akngerre. Tyerrtye arrpenhe atningke apmere yanhe kwene ikwerenge tnerlte-aneme, Atyenge angkerlte-anemele. Tyerrtye nthakentye araye, atningke anthurre apeke, urrpetye apeke. <sup>2</sup> Kele ahelhe tyaty e aketheke arrkernetyale, re akngerre apeke ithwenge apeke, tyaty e kwenele-ante ware mwantyele arrkernaye. Alakenhe mpwaraye, Tharle ahelhe akethe tyerrtye apmere arrpenhe-arenye areyeke anthemenge, Ayenge-arle arraty e itelaretyakenheke, itne anteme ahelhe renhe ingkele ulthetyenhe renhe akurne-ilemele, apmere Atyeperre anthurre Jerusalem anteye. Itne ahelhe renhe akwetethe ultherlte-anetyenhe atnyentye 42-eke-atwetye. <sup>3</sup> The anteme artwe ayeye ilentye akngerre atherre yernetyenhe angkentye Christ-kenhe ilerle-apetye, itne Atyenge

akwetethe angkerlte-anetyenhe atnyentye 42-  
eke-atwetye. Itne mantere itelheye ntheke-  
nthekeke irrpetyenhe alte nanikute-ngentyele  
mpwareke imernelhetyeke ratherre alhwarrpe  
awelhemele tyerrtye areyele-arle akurne mp-  
warekeke.” Alakenhe Re atyenge angkeke.

<sup>4</sup> Ngkarte atyenge akwete angkeke, “Kenhe  
artwe nhenhe atherre arne olive atherre-arteke,  
alkngenthe atherre-arteke-arlike imparrkerle-  
anerreme. Arrantherre itelareme arne olive  
yanhe atherre, alkngenthe atherrame-arlike  
Atyenge arrekwele tneke, ahelhe nhenheke  
alartetye anthurre-arle. <sup>5</sup> Tyerrtye arrpenhe  
areye ikwere-atherre ahentye anthurre  
anetyakenhe anetyenhe. Kenhe nhenge  
angwenhele apeke renhe-atherrenhe irrerlknge  
atwetyeke arrkernerlenge, kele urele ikwere-  
atherrenge arrakertenge arratemele itnenhe  
uyerrelhe-ileme. Tyerrtye areyele renhe-  
atherrenhe uyarne atweme.

<sup>6</sup> “The renhe-atherrenhe Utmenge Atyinhe  
anthetyenhe kwatye alkere-ngentyele  
arrkngerte-ilettyeke, kele anteme kwatyeke  
arrangkwe anetyenhe nhenge ratherre  
angkyentye Atyinhe ilerle-aperrrerlenge atnyentye  
42-eke-atwetye. The renhe-atherrenhe Utmenge  
Atyinhe anthetyenhe kwatye ingkirreke akurne-  
ilettyeke tyerrtye areyele-arle antywerlte-  
anemeke nhenge yanhe-ngentyele kwatye  
akngarte-iwelhetyenhenge alhwe-anteme-  
irretyenhenge. Awethe-anteye The Utmenge  
Atyinhe renhe-atherrenhe anthetyenhe nhenge  
ratherre arne akurne arrpenheke-arrpenhe

iletayeke apmere ahelhe nhenhe ingkirreke ikwerele. Kele nhenge ratherre ahentye anemele, ratherre arne akurne arrpenheke-arrpenhe atningke-ngare arratelhe-iletayeke, apmere ahelhe nhenhe ikwerele.

<sup>7</sup> “Kele ratherre angkentye Atyinhe apmere arrpe-anenhe ikwerele ilerle-aperretyenhe atnyentye 42-ke-atwetye. Ratherre angkentye yanhe ilerle-apeke-arle uyerrelhe-ileme, arrentye akngerre-apenhe anthurre kwenhe iperte akngerre yanhe-ngentyele arratetyenhe renhe-atherrenhe arlkarentye-iletayeke. Re arlenge-arlentye ikwere-atherrenge atwerremele unthetyenhe, renhe-atherrenhe irrerlkngke atwetyeke-atwetye. <sup>8</sup> Kele atyalangke ikwere-atherrenhe iwerre mpwepele intetyenhe apmere akngerre Jerusalem ikwerele, apmere yanhe nhenge itne-arle alartetye ikwere-atherrenhe Jesus arne arntarlkweke-arleke arlpare arrernekenge. Apmere Jerusalem re apmere Sodom uthene Egypt uthene-arle aneke-arteke. Itelaraye, apmere yanhe atherreke-arlike tyerrtye areyele arne akurne mpwarewarretyarte anteye.

<sup>9</sup> “Ye, atyalangke yanhe atherre kwenhe yanhe ikwerele intetyenhe arlte urrpetyeke-atwetye. Kenhe tyerrtye areye akenhe apmere arrpe-anenhe-ngentyele apetyetyenhe, angkentye arrpe-anenhe angkemele, tyerrtye yenpe arlkenye arrpenhe areye-arlike. Itne atyalangke yanhe atherre akwetethe arerlte-anetyenhe, arrkngerte-ilemele arrpenhe areye apetyeme-ketye atyalangke atherre iperteke arteme-ketye.



10 Kenhe nhenge tyerrtye areye Atyenge-werne-arle utepe-irretyakenhe anemeke, atyalangke atherre aremele, itne akangkemele anthurre anetyenhe warrkene Atyinhe nhenhe atherre-arle kwenhe ilwekenge. Itne kwenhe akangkemele alakenhe angkerretyenhe, 'Kele mwerre anthurre-arle! Yanhe atherre-arle ilweke! Ratherre kwenhe anwerneke ahe akngerre anthurre anetyarte, anwernenhe akwetethe alkngetherre iletarte, kele lyete anteme ratherre anwerneke arne akurne areye uyarne mpwareme awethe.' Itne anteme apurte-irretyenhe, arne arrpenheke-arrpenhe areye akangkemele antherretyenhe." Alakenhe renhe Ngkarte atyenge angkeke.

11 Nhenge the aremele arne nhenhe areye mpwareke-arle iperre, kele anteme arlte urrpetye uyerreke-iperrele Ngkartele renhe-atherrenhe aheye antheke, renhe-atherrenhe akarrelhe-ilemele, ratherre anteme ilweke-arle-iperre akeme-irreme, tnerle-anerreke ware kweye. Nhenge tyerrtye ingkirreke anthurrele renhe-atherrenhe arerrirremele itne apatemele anthurre atere anthurre awelheke. <sup>12</sup> Kele yanhe atherrele aweke angkentye alkere akertne-ngentyele arnterre anthurre alakenhe arlkerlengge, "Mpwele-aye, nhenhe-werne apetye-alherraye!" Kenhe yanhe areyele ikwere-atherre-arle atnerte ahentye anetyakenhe anemeke, renhe-atherrenhe areke alkere-werne atheke alherlengge angkulyele-ureke. <sup>13</sup> Arlte ikwerele-anteye ahelhe arnterre anthurre akngernelheke apanpe akiltye-irremele, apmere

arrpenheme-arlke atakelheke, tyerrtye atningke anthurre ilweke 7,000 anthurre. Kenhe tyerrtye areye, itethe-arle akwete anekeke, atere anthurre irreke imerte angkerremele, “Arratye kwenhe Ngkarte alkererele aneme, Re lterrke anthurre anemele.”

<sup>14</sup> Ahelhe akngelheke-arle iperre apanpe akiltye-irreke-arle anteye, ahele atherre-ngare re aneke, kele uyerremele anteme. Awethe anteme ahele arrpenhe re lyete aneme, urrpetye-ngare anteme irretyenhe.

*Alkere-arenye ingkernenyele anteme trumpet pewe-ileme aywerre-ilemele*

<sup>15</sup> Kele alkere-arenye ingkernenyele anteme trumpet pewe-ileke aywerre-ilemele, alkere akertnele arrpenhe atningke arnterre anthurre angkeme, itne alakenhe angkeke, “Lyete Ngkarte Alartetye anwerne-kenhe uthene Alere Ikw-erenhe Jesus Christ uthene, lterrke akngerre-arle anerle-anerremeke, alartetye irretyenhe apmere ahelhe nhenhe ikwerele, Ratherre alartetye akwete-ante anerle-anerretyenhe.” <sup>16-17</sup> Nhenge artwe akngerrepate 24-ele, chair areyenge-arle Ngkartenge arrekwele anerlte-aneme, trumpet yanhe awerrirremele, itne artepe kwene-irreke ulperre interrirremele Ngkarte akertne utyernemele tnakewarreke. Itne alakenhe angkemele,

“Ngkarte Alartetye-aye, Unte kwenhe arrekwe-  
lenye aneme, Unte apele itethe akwete-  
ante anerle-aneme. Unte kwenhe ar-  
rpenhe ingkirrekenge mwerre akngerre-  
ulkere.

Anwerne kwenhe Ngenhe akangkemele anthurre tnakewarreme Unte-arle kwenhe ilyernpenye anthurre anerlenge, Unte-arle apmERE ahelhe nhenhe ingkirreke renhe arntarnte-aremenge.

Kenhe yanhe areyele, Ngkwenge-arle ahentye anetyakenhe anemeke, Ngenhe uyarne akurne-ileme.

18 Unte tyerrtye ilweke-arle areye Ngkwengenge arrekwele ngkernetyenhe Unte itnenhe akalkelhe-iletyeke, yanhe areyele-arle Ngenhe awekeke, kenhe arrpenhe areyele-arle Ngenhe alhule-iwekeke.

Unte anteme yanhe areyeke ahele-irretyenhe Ngenhe-arle alhule-iwekeke.

Unte kwenhe itnenhe ureke-arleke iwe-tyenhe.

Kenhe tyerrtye mwerre areye-arle anemeke Unte arne mwerre areye anthirtnetyenhe.

Unte kwenhe warrkene Ngkwinhe areye an-thetyenhe,

yanhe areyeke angkentye Ngkwinhe-arle awemele anteme ilerlte-apemeke,

yanhe areyeke Ngenhe-arle tnakewar-remeke,

artwe areyeke-arlke, arelhe areyeke-arle, ampe areyeke-arlke Ngkwinhe-arle ane-meke.

Unte akenhe tyerrtye akurne areye irrerlknge atwirtnetyenhe,

nhenge yanhe areye tyerrtye Ngkwinhe areye-arle irrerlknge atwekeke apmERE ahelhe nhenhe ikwerenge.”

Alakenhe rarle akngerrepate areye angkeke.

<sup>19</sup> Ikwere iperrele anteme arrpenhele tyatye akngerre arriwe altywere-ileke alkere akertnele-arle tne-meke. Arriwe ikweringe-ureke the arne box ameke-ameke areke angkentye Ngkartekenhe 10-akerte kwenele. Kwatyte akngerre anthurre angkeke, nhenge kwatyete anhekengearteke. Apweteke akngerre-apenhe alkere-ngentyete atnyerrirreme. Ahelhe-arlke ngkernelheke, apanpele ahelhe akiltye-irremele.

## 12

*Kwatyte kwelayele arelhe uyarne anthurre arntwirrkeme*

<sup>1</sup> Kele arne iwenhe apeke re-anteme ilyernpenye anthurre, arrpenhe anthurre-arle apeke, alkere akertnenge arrateke. The akertne-atheke apatemele anthurre areke arelhe alkere akertnenge anerlenge, mantere ikwerenhe arlenngearteke aneke, ingke atnyentye akertnele aneke, tyellarre mwerre akngerre kwerralye 12-akerte akaperte ikwerenhele aneke. <sup>2</sup> Arelhe kwenhe atnerte-atnerte aneke, re arnterre anthurre ampwangketyame ampe akweke-arle arratetyeke anemenge.

<sup>3</sup> The anteme areke arne arrpenhe anthurre alkerenge arraterlenge, apmwe kwatyte-arenye athetheke akngerre-apenhe anthurre-arle aneke akaperte 7-akerte, rulye-rulye 10-akerte, akaperte arrpe-anenheke aneke tyellarre mwerre akngerre anthurre-arle. <sup>4</sup> Tile ikwerenhele apmwe kwatyte-arenye yanhele kwerralye atningke akngernelhe-ileke itnenhe alkere-ngentyete apmere ahelhe-werne-atheke iweke.

Ikwere iperrele anteme re arelhe yanhenge arrekwele tnyeke alheke re arlkwetyeke ampe akweke yanhe renhe arraterlenge arteke. <sup>5</sup> Kele arelhele anteme ampe urreye akweke atnyeneke, urreke-arle amangketyenhenge alartetye irretyenhe, tyerrtye atningke uternetyenhe arne areye mpwaretyeke. Kenhe tyerrtye areye apmere arrpe-anenhe-arenyele renhe uyarne mwernte-ileme. Kenhe nhenge ampe akweke re intemele arrpenhele renhe iparrpe rakerlenge apmwe kwaty-arenye yanhele renhe iparrpe ineme-ketye, renhe Ngkartewerne akngemele chair mwerre akngerre yanhe ikwerele-arle anemeke. <sup>6</sup> Tyerrtye yanhele ampe akweke renhe rakeke-arle iperre, arelhe apmere ahurraty ikwere-werne uyerrlerle-alheke Ngkartele-arle ikwere akwetante mpwaretyeke, nhenge yanhe-ngentyele alkere-arenye Ikwerenhe areyele renhe arntarntearetyenhenge arlte 1,260-eke-atwetye.

<sup>7</sup> Kele imerte atwerrentye akngerre anthurre alkere akertnele aneke. Alkere-arenye Michael, alkere-arenye ikwerenhe areyele-akerte apmwe kwaty-arenyenge atwerretyame, alkere-arenye akurne ikwerenhe areyenge-arlke. Kele apmwe kwaty-arenyele-arlke alkere-arenye akurne ikwerenhe areyele-arlke itnenhe atwirtnetyame anteye. <sup>8-9</sup> Itne akwete anthurre atwerretyame, kele Michael-kenhe areyele anteme itnenhe arlenge anthurre aywepeke. Itne itnenhe alkere-ngentyele kwene-akerle iweke itne alkerele aneme-ketye. Itne apmwe kwaty-arenye renhe-arlke alkere-ngentyele iweke, rarle thewe

arrule anthurre-arle apmere ahelhe nhenhele ampwe-arteke anekeke. Apmwe kwatye-arenye yanhe thewe, re kwenhe arrentye Satan arritnye aneme, tyerrtye ahelhe nhenhe-arenye areyeke urrtiyirremele-arle itne arne akurne mpwarerlte-anetyenhenge. Kenhe Michael akenhe alkere-arenye ikwerenhe areyele-arlke apmwe kwatye-arenye renhe ahelhe nhenhe-werne kwene-akerle iweke, alkere-arenye akurne itnenhe-arlke.

<sup>10</sup> The anteme aweke arrpenhe alkere akertnele angkentye akngerrele arlkerlenghe, alakenhe angkemele, “Lyete-arle Ngkartele kwenhe tyerrtye areye itetheke mpwareke Rarle kwenhe arrentye Satan renhe alkere-ngentyele iwerne, yanhe athewe, atyewe anwerne-kenhe areye-arle ilpernetyarteke Re itnenhe Ngkartenge arrekwele akwetethe ilpernetyarte arltele-akake, ingwele-akake. Kele lyete anteme Ngkarte Utmenge Ikwerenhele renhe arlenghe arlentye-werne iweke. Ye, Ngkarte kwenhe alartetye anthurre aneme, Alere Ikwerenhe anwernenhe-arle itetheke mpwaremeke, imerte arne ingkirreke anthurreke akngerre anthurre irreke-arle.

<sup>11</sup> Atyewe anwerne-kenhe, Ngkarte-kenhe-arle anemeke, itne kwenhe arrentye Satan anathe-ileke renhe aywepemele. Iwengenge-arle-ame arrantherre itirreme arrentyele itnenhe uyarne akurne-ileke Jesus-ketyenge untyeme-irretyeke? Itne renhe anathe-ileke Yepe-yepe Akwerrkele-arle kwenhe alhwe ikwerenhe itneke thelekenghe, itne anteme renhe arratye itelareme. Itne renhe anathe-ileke itne kwenhe angkentye ar-

ratye ilerlte-apetyarte anteye, alakenhe ikw-  
 erenge anteme itne renhe ingkwe irrerlknge  
 atweke. Kele anteye-arle itne akenhe nhenhe  
 itelareke, itne atere-irretyakenhele aneke itne  
 anthelhetyeke ilwetyeke, arratyete anthurre an-  
 teme itne ilweke. <sup>12</sup> Alakenhe ikw-  
 erenge anteme arrantherre alkerele-arle anerle-anemeke  
 kwenhe akangkemele anetyeke. Kenhe in-  
 gkirreke apmere ahelhe nhenhe-arenye areyeke  
 akurne anthurre irretyenhe, kwatyele-arle ane-  
 meke anteye, arrentye Satan-arle ahele an-  
 thurre irrerlengge arrekantherre-werne kwene-  
 akerle apetyeke re itelareme arlte ikw-  
 erenhe-arle urteke ware anemeke nhenge tyerrtye  
 areyeke arne akurne areye mpwaretyeke.”

<sup>13</sup> Nhenge apmwele itelaremele, Michael-  
 elarle renhe apmere ahelheke-werne iweke,  
 re itirreke, “Yewe! Lyete, the kwenhe arelhe  
 yanhe alwerneme, ampe urreye akweke-arle  
 atnyenekeke.” <sup>14</sup> Kenhe arrpenhele akenhe  
 arelhe renhe arlpelhe irretye akngerre-kenhe  
 antheke-arle, re alkereke-irretyeke apmwe  
 kwatye-arenye yanhe ikw-erenge-ntyete nhenge  
 apmere arrangkethe-werne Ngkartele-arle  
 ikwere akwetante mpwarekenge. Nhenge re  
 yanhe ikwere irretye-alhemele itne renhe merne  
 antheke, renhe mwantyele arntarnte-aremele  
 uterne 4-peleke-atwetye apmwe kwatye-arenye-  
 ketye. <sup>15</sup> Kele apmwe kwatye-arenye re-anteme  
 kwatye urewe-arteke antewe-irreke arrakerte  
 ikw-erenhe-ngentyete arelhe yanhe ikwere-  
 werne-atheke, re apeke renhe kwatye urewele  
 akngetyeke. <sup>16</sup> Kenhe Ngkartele akenhe ahelhe

altywere-ileke nhenge kwatye yanhe re kwene ikwere-werne atheke thelelhetyenhenge renhe akngetyakenhe anteme aneme. Kele arelhe re-anteme mwantye alkereke-irreke. <sup>17</sup> Kele apmwe kwatye-arenye re-anteme ahele-anthurre-irreke re unthetyeke alheke ampe arrpenhe arelhenhe areyenge atwerretyeke, yanhe areyenge-arle Ngkarte-kenhe anemeke. Itne kwenhe aneme Ngkarte-arle aywerrke awerlte-anemeke, angkentye Jesus-akerte arratye-arle ilemeke. <sup>18</sup> Kenhe apmwe kwatye-arenye re-anteme apetyemele kwatye alaye akngerre iterele tnetye-alheke.

## 13

*Arrentye atherrame-akerte kwatye alayengentyele-arle arratekeke*

<sup>1</sup> The anteme areke arrentye kwatye alaye ikweringe-ntyete akeme-irremele arraterlenge akaperte 7-akerte rulye-rulye 10-akerte. Rulye-rulye-arrpeke-arlenge akenhe arne akweke tyellarre-arteke-arle re atnyeneke alartetye irrpentye akngerre-arteke, akaperte-arrpeke-arleke angkentye akurne intelhe-ileke-arle Ngkarteke-arle anyurre-irremeke. <sup>2</sup> Arrentye tyerrtye alkngge atherrke akngerre-apenhe-arteke atnyeneke nhenge leopard-arteke, ingke ikwerenhe tywepmare arlpentye akngerre-akerte nhenge bear-arteke, arrakerte ikwerenhe aneke lion-kenhe-arteke. Apmwe kwatye-arenye arrentye renhe ngangkere ikwerenhe-arrpe antheke nhenge re-artekele arne arrpenheke-arrpenhe mpwaretyenhenge



ilyernpenye anthurrele. Re arrentye ileke chair ikwerenheke-arleke arrernelhetyeke arne ingkirreke anthurreke alartetye anetyeke apmere ahelhe nhenhele-arle anemeke. <sup>3</sup> Nhenge the arrentye yanhe renhe akaperte 7-akerte aretyamele, the areke akaperte anyente impepe anerlenge re irrerlkngge atwetyeke aneke! Nhenge tyerrtye apmere ahelhe nhenhe-arenye areyele renhe aremele itne apatemele anthurre, alakenhe ikwerenge anteme itne renhe apenteke nhenge rarle alartetye irrekenge. <sup>4</sup> Itne apmwe kwatye-arenye renhe tnakeme rarle arrentye ngangkere ikwerenhe-arrpe anthekenge tyerrtye ingkirreke apmere ahelhe nhenhe-arenyeke alartetye anetyeke. Itne arrentye-inpe tnakewarreke alakenhe angkemele, “Tyerrtye arrpenhe arrentye nhenhe-arteke kwenhe anetyakenhe aneme. Arrpenhele renhe uyarne atweme. Re atwentye arrpenhe anthurre, arrpenhe ingkirrekenge ilyenpenye anthurre-ulkere.”

<sup>5</sup> Kele apmwe kwatye-arenyele arrentye tyerrtye leopard-akerte-arteke ileke ayeyele ilelhetyeke Ngkarteke akengentye angketyeke, tyerrtye ingkirrekeke alartetye anetyeke atnyentye 42-eke-atwetye. <sup>6</sup> Re anteme Ngkarte arrengk-welthele akurne-ileme arratye Renhe iltemele anteye, apmerekere-arlke akengentye angkemele Rarle anemeke, yanhe areye-arlke Ikwerenge-arle alkererele anemeke. <sup>7</sup> Apmwe kwatye-arenyele arrentye awethe ileke atyewe Ngkarte-kenhe areyenge atwerretyeke itnenhe aterele-anthemele. Re anteme itnenhe atweke ar-

ratye, itnenhe rlkerte-anthurre-iletaye. Re awethe angkeke apmere arrpe-anenheke alarteye anetyeke, tyerrtye ingkirrekeke-arlike, tyerrtye areyeke-arlike angkentye arrpe-anenhele-arle angkemeke, tyerrtye areyeke-arlike yenpe arlkenye arrpe-anenhe-akerte-arle anemeke.

<sup>8</sup> Kenhe tyerrtye atningke apmere nhenhele-arle anemeke artepe anemele kwene-irreke arrentye yanhe renhe tnakemele, kenhe tyerrtye arrpenhe areyele akenhe renhe tnaketyakenhe aneke. Tyerrtye nhenhe areye-kenhe arritnye Yepe-Yepe Akwerrkele pipe-nge intelhe-ileke-arle itne itethe akwete-ante anetyenhenge. Urreke ahelhe nhenhe mpwaretyenhenge Re arritnye itnekenhe intelhe-ileke-arle. Yepe-yepe Akwerrke nhenhe athewe, itne irrerlkngge atwerrirreke-arle. Kenhe atyewe Yepe-Yepe Akwerrkenhe areyele arrentye renhe tnakewarretyakenhe aneke.

<sup>9</sup> Tyerrtye ingkirrekele kwenhe mwantye anthurrele awetyeke nhenge irlpe-werne ilemele angkentye nhenhe renhe Ngkarterngentye: <sup>10</sup> Ngkarte kwenhe arrekantherre akaltye aneme, Re itelareme yanhe areyele arrekantherre-arle ahentye anetyakenhe anemeke arrenhantherrenhe arrpenheme arntwirrkemele jail-ke akwernetyenhe. Re itelareme anteye yanhe areyele arrekantherre-arle ahentye anetyakenhe anemeke, arrenhantherrenhe arrpenheme alyweke akngerrele aketyenhe irrerlkngge atwemele. Alakenhe ikwerenge anteme Ngkarte-kenhe areyele Renhe akwetethe awerlte-anetyeke,

Renhe arratye apenterlte-anetyeke.

*Arrentye arrpenhe arrateme*

<sup>11</sup> Yanhe ikwere-iperrele the areke arrentye arrpenhe ahelhe kwene-ngentyele arraterlenge. Arrentye nhenhe re rulye-rulye atherre-akerte nhenge yepe-yepe akwerrke-arteke re angkentye angkeke apmwe kwatye-arenye-arteke. <sup>12</sup> Arrentye arrekwelenyele arrentye intertenye ileke alartetye anetyeke ngangkere akngerre-akertele tyerrtye ingkirreke anthurre uternetyeke iwenhe apeke renhe mpwaretyeke rarle ilemeke. Kele re-anteme tyerrtye ingkirreke anthurre uterneke apmere ahelhe nhenhele-arle anemeke arrentye arrekwelenyeke kwene-irremele renhe tnaketyeke, atweke-arle yanhe thewe akaperte anyente utylene akngerre-akerte mwerre-anteye-arle irrirtnekeke. <sup>13</sup> Kenhe arrentye intertenyele akenhe arne atningke ilyernpenye anthurre mpwareke tyerrtye ingkirrekele aretyeke, itne anteme apatemele anthurre aneke. Re ure alkere-ngentyele ahelhe-werne atnyetyeke ileke nhenge tyerrtye ingkirrekele alkngelenge arerleng anthurre. <sup>14</sup> Re arne akngerre anthurre areye mpwareke nhenge arrentye arrekwelenyele arerleng, tyerrtye areyele apmere arrpenenhe-ngentyele renhe aremele arratye itelareke, itne itirreke rarle akwele alartetye anthurre anekeke-athene. Kele imerte arrentye yanhele itnenhe uterneke arne mpwaretyeke arrentye arrekwelenye ahirre-arteke-arle

anemeke, yanhe athewe akaperte anyente-akerte utyene akngerre yanhe-akerte alyweke akngerre-apenhe-ngentyele itethe-arle awethe-irritnekeke, renhe-arteke. Kele itne yanhe renhe-arteke anthurre mpwareke. <sup>15</sup> Kenhe arrentye intertenyele arne yanhe aheye antheke itne-arle mpwarekeke, re anteme angketyeke. Re imerte tyerrtye atningke irrerlknge atwetyeke alhemele itne kwenhe ikwere artepe kwene-irretyakenhe aneke renhe tnakewarretyeke. <sup>16</sup> Kele anteme arrentye intertenye re akenhe arrpenhe uterneke tyerrtye areyeke-arleke imperre arrernetyeke, nhenge intelhe-ileke-arle-arteke. Tyerrtye arrpenhemele imperre yanhe akwe-arratyeke-arleke atnyeneke, kenhe arrpenhemele akenhe imperre yanhe urleke-arleke atnyeneke. Ingkerreke anthurrele imperre atnyeneke, tyerrtye akweke areyele, tyerrtye ampwe areyele, tyerrtye apwerte mane akngerre-akerte areyele, alhengkeye areyele, yanhe areyele alartetyeke-arle warrke-irremeke, arrpenhe areyele itneke-arrpe-arle warrke-irremeke, ingkirreke anthurre imperre yanhe itneke-arleke-arrpe atnyeneke. <sup>17</sup> Imperre yanhe thewe aneke arritnye arrentye-kenhe, number ikwerenhe-arlike. Kenhe tyerrtye angwenhele apeke re imperre renhe-arle atnyenetyakenhe anekeke, re merne uyarne ineme, mantere-arlike, arne iwenhe apeke arrpenhe renhe uyarne ineme, itne arne iwenhe apeke renhe apwerte maneke uyarne antherreme.

<sup>18</sup> Angwenhele-ame imperre arrentye-kenhe itelareme? Nhenge arrpenhele apeke iterle-ame-

iterle aneme re anteme imperre renhe count-eme-ilaye, ikwere-akerte akaltye-irretyeke, imperre nhenhele-arle kwenhe arritnye artwenke ilerleng, imperre 666.

## 14

*Ayeye Yepe-Yepe Akwerrke-akerte ikwerenhe areye-arlke*

<sup>1</sup> Kele the anteme Yepe-Yepe Akwerrke apw-erte akertnele tnerleng areke, apwerte yanhe Zion arritnye aneke Jerusalem-ele. Yanhe ikwerele tyerrtye atningke ikwerenge apurte tnerlte-aneke, 144,000 anthurre. Urle itnekenhe-arrpeke-arleng arrpenhele arritnye Yepe-yepe Akwerrke-kenhe intelhe-ileke, arritnye Ngkarterkenhe-arlke. <sup>2</sup> The aweke angwenhe apeke re alkere akertne-ngentyele angkerleng. Re arnterre anthurre angkeke nhenge kwatye aywerre angkeme-arteke nhenge apwerte akert-nenge thelelhemele, nhenge kwatye angkeme-arteke. Nhenge the aywerre awemele re kwenhe angkentye mwerre akngerre anthurre-arteke nhenge aywerre tyerrtye areye-arle guitar apeke arrkene-irreme-arteke. <sup>3</sup> Kenhe tyerrtye 144,000-anthurre akenhe chair Ngkarterkengenge arrekwele tnetyame, atnunthe 4-pele-arlke akngerrepate 24-arlke. Itne yanhe ikwerele tnetyame alyelhentye alkarle alyelhemele itne-ante ware-arle itelarekeke. Arrpenhe-ante alyelhentye alkarle yanhe ikwere uyarne akaltye-irreme. Nhenhe areye kwenhe Ngkartere-arle itetheke mpwarekeke nhenge itne apmere

ahelhe nhenhele anetyartenge, itne-ante ware kwenhe alyelhentye alkarle nhenhe ikwere akaltye-irreme. <sup>4</sup> Tyerrtye 144,000 nhenhe areye kwenhe Ngkarteke-ante ware akwetethe arraty mwerre anerlte-aneme. Nhenhe areye kwenhe aneke arelhenge-arle intetyakenhe anekeke, itne urlerte akwete anetyarte angwarelhemele. Itne akwetethe yanhe renhe apentetyarte Yepe-Yepe Akwerrke-arteke-arle anemeke, nhenge nthenhe-werne apeke re alherlenge. Artwe nhenhe areye kwenhe aneke Ngkarte-kenhe, Yepe-Yepe Akwerrke-kenhe anteye. Artwe nhenhe areye kwenhe arrekwenyeye areye-arteke aneme Yepe-Yepe Akwerrkele-arle itheteke mpwarekeke Ngkarte-werne akngemele anteye. <sup>5</sup> Itne kwenhe urrtiyirremele ilettyakenhe aneke, arrpenhe ilperntetyakenhe aneke, iwerre akurnele anetyakenhe aneke, arrangwe-arle.

### *Alkere-arenye urrpetye-akerte*

<sup>6</sup> Yanhe ikwere-iperrele the areke alkere-arenye arrpenhe alkere akertne anthurrele alkereke-irrerlenge. Re kwenhe apmere arrpe-anenhe-werne alhetyame tyerrtye ingkirrekeke angkentye mwerre-akerte ilettyeke, tyerrtye areyeke angkentye arrpenhe areyele-arle angkemeke, tyerrtye arrpenhe areyeke yenpe arlkenye arrpenhe areye-arle anemeke anteye. <sup>7</sup> Alkere-arenye re anteme arlkemele angkeke, “Ngkarte akertne utyernerlte-anemele tnakewarraye arlte-arle angathe-irremenge Rarle nhenge tyerrtye ingkirreke court-eke ngkernetyeke itnenhe akalkelhe-ilettyeke. Renhe

tnakewarraye Rarle alkere, ahelhe, kwatye alaye, kwatye pintye, ingkirreke anthurre aknganekenge.”

<sup>8</sup> Alkere-arenye arrpenhe anteme ikwerenge intertele apetyeke imerte angkemele, “Awerrir-  
raye! Apmere yanhe Babylon arritnye aneme tyerrtye atningkele-arle tnakewarremeke, kele lyete anteme atakelheke arltwe anteme in-  
temele, tyerrtye areye apmere yanhe-arenye uyerrekenge anteye. Arrantherre itelareme ty-  
errtye areye apmere yanhe ikwerele-arle an-  
errirretyarte kwenhe akurne anthurre anet-  
yarte. Kenhe tyerrtye arrpenhe areye apmere  
arrpe-anenhe-ngentyele apetyetyarte itnekenge  
apurte-irreke-arle itne-arlke akurne-irreke ty-  
errtye areyele apmere yanhe-ngentyele-arle it-  
nenhe uternetyarteke. Arrantherre itelareme,  
nthakenhe-arle nhenge tyerrtye anyentele apeke  
arrpenhe ngkwarle antywetyeke uternemele re  
anteme antyweme arerte-irremele, imerte ar-  
rpenhe areyenge apale interremele. Yanhe alak-  
enhe re-arteke kwenhe itne akurne-irreke itne  
anteme Ngkarteke alkngwirreke anthurre.”

<sup>9-10</sup> Awethe-anteye alkere-arenye arrpenhe  
alkereke-irremele apetyeke, arrpenhe yanhe  
atherre alheke-arle iperre, re-anteme arnterre  
anthurre alakenhe angkeke, “Ngkarte kwenhe  
ahele akwete aneme tyerrtye areyeke-arle  
artepe kwene-irremeke arrentye yanhe  
tnakewarremeke arrentye yanhe renhe,  
tyerrtye areyeke-arle arne arrpenhe-arle  
mpwarekeke arrentye-arteke-arle renhe-arle  
tnakewarremeke. Re tyerrtye yanhe areyeke

ahela anthurre aneme anteye imperre-arle atnyenemeke iltje akwe-arratyela apeke nhenge urlele apeke. Ikwere-arle itne mpwarekenge Re itnenhe ure kweneke-arleke iwetyenhe nhenge kwerte arntirte-arle ntyemeke. Itne arnterre anthurre ampangketyenhe, nhenge Yepe-Yepe Akwerrke-artekele uthene alkere-arenye Ngkarte-kenhe areyele kwenhe arerlenge. <sup>11</sup> Kwerte ure-ngentyele itnenhe-arle ampemeke, re akwete-ante akertne antyerle-anemele. Arlte uthene ingwe uthenele itne akwetethe ampangkerlte-anetyenhe. Alakenhe nhenhe re kwenhe tyerrtye areyeke irretyenhe arrentye yanhe renhe-arle tnakewarremeke arne yanhe re-arteke-arle anemeke, nhenge yanhe areye ingkirrekeke arrentye yanhe ikwere-arle anthelherlte-anemeke imperre ikwerenhe itne-arrpeke-arleke intelhe-ilekenge.” Alakenhe-arle alkere-arenye ingkerne-iperre angkeke.

<sup>12</sup> Alakenhe ikwerenge anteme tyerrtye Ngkarte-kenhe areyele, Ngkarte-arle awerlte-anemeke imerte mpwarerlte-anemele iwenhe-arle Re itneke ilemeke, Jesus-arle itelarerlte-anemeke, akwetethe awemele renhe arratyete itelarerlte-anetye anaye.

<sup>13</sup> The anteme aweke arrpenhe atyenge alkere-ngentyele angkerlenge, “Pipe-ke alakenhe intelhe-ilaye! ‘Lyete-ngentyele yanhe areyele Jesus-arle apenterlte-anetyarteke nhenge itne apmere ahelhe nhenhele itethe anemele, kele itne alkere akertnele akangkemele anthurre-arle anetyenhe.’”



Nhenge Utmenge Akngerrele nhenhe renhe awemele, re angkeke, “Arratye apelaye! Ilweke-arle iperre itne akwete warrke-irretyakenhe anetyenhe. Kele-anteye-arle itne ltyerreyeke, Ngkarte-arle kwenhe yanhe areyeye akangken-tye anthurre anerlenge iwenhe apeke renhe-arle mpwaretyarteke, Re itnenhe mpwaretyeke ileke.”

*Arrpenhele tyerrtye akurne areye irrerlknge atweme*

<sup>14</sup> Yanhe ikwere-ipperrele anteme the alkere arnareke, the anteme areke artwe-arteke angkulye mperlkererele alkere akertne anthurrenge anerle-anerlenge. Re mwekarte-akerte gold-engentyele-arle mpwarekeke alartetye areye irrpentye akngerre, iltye ikwerenhenge re alyweke arnkwerte-arnkwerte arlpentye akngerre atnyenemele yanhe rarle kwenhe arriripe akngerre anthurre anekeke.

<sup>15</sup> Alkere-arenye arrpenhe tyatye akngerre Ngkarte-kenhe-ngentyele arrateme artwe yanhe ikwere arlikeke angkulye mperlkerenge-arle anetyameke ikwere angkemele “Alyweke arnkwerte-arnkwerte ngkwinhe inaye! Merne wheat ingkirreke kwenhe apmere ahelhe antekele mpenge-anteme-irreke. Ingkerreke anthurre aketyeke alhaye, apurtelhe-ilemele imerte!” <sup>16</sup> Kele re mpwareke iwenhe-arle renhe alkere-arenyele mpwaretyeke ileke. Re merne wheat alyweke arnkwerte-arnkwerte arlpentye akngerrele aketye-alheke apmere ahelhe antekele-arle lyapemeke imerte ingkirreke apurtelhe-ilemele.

17 The anteme areke alkere-arenye arrpenhe tyatye akngerre Ngkarte-kenhe-ngentyele arraterlenge, re-inpe alyweke arnkwerte-arnkwerte arlpentye akngerre atnyenemele arrpenhe nhenge-arteke.

18 Yanhe ikwere-iperrele anteme the alkere-arenye arrpenhe areke, alkere-arenyele-arle ure arntarnte-arentye akngerre anemeke akwetethe-arle amperle-anemeke apwerte athirnte ikwerenge nhenge kwerte ntyentye mwerre akngerre-akerte. Re alkere-arenyeke arlkeke alyweke ankwerte-ankwerte-arle atnyenetyameke angkemele, “Merne kripethe areye kwenhe kele mpenge-irreke apmere ahelhe ikwerenge. Itnenhe ingkirreke anthurre arne altyeye-altyeye-ngentyele alyweke yanhe-akertele aketyeke alhaye imerte itnenhe apurtelhe-ilemele!” 19 Kele re alhemele mpwareke nhenge iwenhe renhe alkere-arenyele mpwaretyeke ileke-arle, merne renhe alyweke ikwerele akemele. Itnenhe apurtelhe-ilemele re itnenhe akngemele arne akngerreke-arleke akwernemele, tyerrtye areyele-arle merne kripethe itnenhe ulthetyarteke akarrwe rlpurnetyeke. Ayeye nhenhe kripethe-akerte kwenhe angkeme tyerrtye areye-akerte akurne-arle mpwaremeke. Alakenhe kwenhe angkeme Ngkarte-arle itneke ahele-irretyenhe itnenhe ulthemele atwemele anthurre-ante. 20 Kenhe apmere akethenge Ngkartele kripethe areye ultheke akarrwe rlpurnemele yanhe-ngentyele alhwe akngerre arne tyampite ikwerenge-ntyeye athelherlenge nhenge Re kripethe itnenhe

rlputneke-iperrele. Re kwatye urewe akngerre-arteke apetyeme, alhwe yanhe re iperte akngerre aneke untye artwe-kenheke-atwetye, re kwenhe arlenge-arlentye anthurre kwatye urewe re irntwarre-akerle-irremele kilometre 300-ek-atwetye.

## 15

*Ayeye alkere-arenye seven-akerte rlkerte-ilemeke-arle*

<sup>1</sup> Yanhe ikwere-iperrele the areke iwenhe apeke arrpenhe renhe alkere-akertnenge araterlenge arne iwenhe apeke re akngerre-apehe anthurre renhe nhenge the renhe areke-iperrele apatemele anthurre. Alkere-arenye 7 aneke, Ngkartele itnenhe ileke rlkerte arrpenhe 7-pele tyerrtye akurne areye anthetyeke alhetyeke. Ngkarte kwenhe tyerrtye akurne areyeke ahe akngerre anthurre irreke-arle Re alkere-arenye nhenhe 7-pele yerneke itnenhene rlkerte-ilemele atwetyeke apeke apmere ahelhe nhenhe-arlike kwatye alaye-arlike akurne-ilettyeke. Nhenge itne tyerrtye areye rlkerte-ileke-arle atwemele anteye uyerrelhe-ileke-iperrele, kele itne impetyenhe anteme. Ngkarte anteme ahele-irretyakenhe anetyenhe. <sup>2</sup> The awethe-anteye areke kwatye alaye akngerre kelathe-arteke areke anteme, re kwenhe ure uthene kelathe uthene anyente-irreke-arle-arteke. The areke tyerrtye atningke anthurre kwatye alaye iterele tnerlenge kelathe-arteke-arle anemeke. Nhenge apmere ahelhe nhenhe ikwerele anemele, nhenhe

areyele arrentye-ketye ayene-ilelheke-arle, re itnenhe uyarne uterneke ikwere artepe kwene-irretyeke renhe tnaketyeke nhenge arne renhe apeke re-arteke-arle anekeke tyerrtye areyele-arle mpwarekeke. Itne imperre 666-kwenye aneke, imperre nhenge arrentye-kenhe anemeke. Itne ingkirrekele arne guitar-arteke atnyeneke Ngkartele-arle itnenhe anthekeke.  
<sup>3</sup> Itne yanhe ikwerele tnerrireke alyelhen-tye Moses-kenhe alyelhemele, arrantherre itelareme nhenge Moses-arle Ngkarteke warrke-irretyarte. Itne Jesus-eke alyelheme anteye, Yepe-Yepe Akwerrke-arteke-arle anemeke. Itne kwenhe alakenhe alyelheme:

“Ngkarte, Unte anyente-ante ware kwenhe arne ingkirreke anthurreke alartetye aneme,  
 Unte anyentele ingkirreke anthurre mpwareme ilyernpenye anthurre.

Nhenge anwerne arne ingkirreke aremele Unte-arle mpwarekeke, anwerne apateme anthurre.

Unte apele tyerrtye areyeke apmere ingkirreke anthurre-ngentyele alartetye anthurre aneme,

Unte itneke arratye anthurre angkeme itnenhe mwantyele arntarnte-arerle-anemele.

<sup>4</sup> Tyerrtye ingkirreke kwenhe Ngkwenge atere ware itirreme artepe anemele kwene-irremele Ngenhe tnakeme,  
 itne ingkirrekele-arle itelarerrirreme Unte-arle Alartetye aneme.

Unte anyente ware kwenhe mwerre anthurre aneme.

Tyerrtye ingkirreke anthurre kwenhe apmere  
 arrpe-anenhe-ngentyele apetyetyenhe  
 Ngenhe akertne utyernetyeke  
 tnakewarremele,

Unte-arle arraty mwerre itirrerlenghe ak-  
 wetethe arne ingkirreke arraty mwerre  
 mpwarrerle-aneme.”

<sup>5</sup> Ikwere-iperrele anteme the awethe  
 arnareke tyatye akngerre Ngkarte-kenhe  
 alkere-akertnenge aremele, arriwe altywere  
 anekenge. Kwenenge ilthe ameke-ameke  
 atyeperre Ikwerenhe tneke, apmere nhenge  
 itne angkentye ameke-ameke Ngkarte-kenhe  
 areye atnyenetyarte. <sup>6</sup> Kenhe alkere-arenye  
 7-pele areyele, arne akurne seven-arle  
 yernekeke, tyerrtye areye arlkarentye-iletayeke  
 tyatye akngerrenge-ntyete arrateke. Itne  
 mantere mperlkere anthurreke irrpetyame  
 amparrkerlenghe-arle. Itne antayeke irrpeke  
 gold-engentyele-arle mpwarekeke arerre  
 ayernelheke. <sup>7</sup> Kenhe atnunthe 4-pele  
 yanhe ikwerele tnerirretyame, anyentele  
 alkere-arenye 7-arrpe apanthe antheke gold-  
 engentyele-arle mpwarekeke. Ngkartele anteme  
 ngkwarle-arteke apanthe seven-eke-arleke  
 theleke imernetyeke Rarle ahele anthurre  
 aneke. Rarle thewe akwete-ante-arle anemeke,  
 Re kwenhe tyerrtye areyeke ahele anthurre  
 aneme arne akurne-arle mpwaremeke. <sup>8</sup> Nhenge  
 Ngkarte apmere ameke-ameke yanhe ikwerenge  
 anemele angkulye kwerte akngerrele renhe

arrkngerte-ileme areme-ketye, Rarle ilyernpenye anthurre anerlenge, rlterrke anthurre-arle anemele. Nhenhe ikwerele ureke tyerrtye areye apmere ameke-ameke yanheke uyarne irrpeme. Alkere-arenye 7-areyele rlkerte yanhe areye thelemele uyerrelhe-ileke-arle iperrenge, tyerrtye areye anteme awethe kwene-werne irrpetyeke.

## 16

### *Alkere-arenye seven-akerte*

<sup>1</sup> Yanhe ikwere-iperrele the aweke arrpenhe tyaty akngerre ikwerenge-ntyeye arnterre anthurre arlkerlenge alkere-arenye areyeke apanthe 7-arle atnyenetyameke, “Nhenhe-ngentyele alherlte-iwaye arne kwatye athetheke-arteke apmere ahelheke apanthe 7-ngentyele thelaye. Nhenhele kwenhe imernetyenhe Ngkarte-arle tyerrtye areyeke ahele anthurre aneme Ikwere-ketye-arle artepe untyeme-irrekeke Rarle itnenhe atwetyenhenge anteye.”

<sup>2</sup> Kele alkere-arenye arrekwele-iperrele apanthe ikwerenhe-ngentyele ahelheke theleke, kenhe tyerrtye ingkirreke anthurrele arrentye tnakewarremeke utyene akurne anthurre-akerte aneke, itne uyarne itirremele. Tyerrtye yanhe areye imperre arrentye-kenhe-akerte, itne kwenhe arne nhenge arrentye-arteke tnakewarremele tyerrtye areyele-arle mpwarekeke. Nhenhe areye thewe utyene akurne anthurre-akerte aneke nhenge

alkere-arenyele arne renhe apanthe-ngentyele thelekenge.

<sup>3</sup> Kele alkere-arenye arrpenhele anteme apanthe ikwerenhe-ngentyele kwatye alayeke theleke, alakenhenge anteme kwatye ingkirreke akurne-irremele athetheke-irreke nhenge alhwe tyerrtye ilweke-arle-arteke akngarte-iwelheke. Atnunthe arrpenheke-arrpenhe ingkirreke kwatye-arenye, ilweke anteme.

<sup>4</sup> Kele alkere-arenye arrpenhele anteme apanthe ikwerenhe-ngentyele kwatye lhere uthene kwatye pintye utheneke theleke. Alakenhenge anteme kwatye lhere-nge uthene kwatye pintye-nge ingkirreke anthurre re alhwe-werne akngarte-iwelheke.

<sup>5</sup> Kenhe the alkere-arenye aweke kwatye ingkirreke anthurre-arle arntarnte-aremeke Ngkarteke angkerlenge, “Unte kwenhe arratye anthurre Ngkarte aneme, Unte-ante arratye mwerre aneme. Unte apele Ngkarte lyete-arle anemeke itethe akwete-arle aneke! Arne akurne nhenhe areye Unte-arle apmere ahelhe nhenhe-werne yerneme kwenhe mwerre anemenge Unte-arle kwenhe tyerrtye ingkirrekeke arratye itirreme.

<sup>6</sup> Tyerrtye areyele, akurne-arle mpwarerlte-anemeke, atyewe Ngkwinhe areye irrerlknge atwemele nhenge yanhe areye angkentye Ngkwinhe-arle ilerlte-apemeke. Itne tyerrtye Ngkwinhe areye atweke alhwe itnekenhe thelelheke itne anteme itnenhe irrerlknge atweke. Alakenhe ikweringe anteme Unte kwatye alhwe-werne akngarte-iwemele itnenhe antywetyeke antheke.” <sup>7</sup> The anteme arrpenhe

aweke apworte athirnte-ngentyele angkerlengere ure kwerte ntyentye mwerre akngerre-arle antyeme-ngentyele, “Ye, Ngkarte Alartetye, Unte kwenhe arraty akngerre anthurre aneme, ilyernpenye anthurre. Unte arraty-arle itirreke itnenhe rllkerte-ilemele.”

<sup>8</sup> Kele alkere-arenye arrpenhele anteme apanthe ikwernenhe-ngentyele arlengeke theleke. Arlenge anteme urinpe anthurre irreke, tyerrtye areye arnterre ampetyeke. <sup>9</sup> Kele arlengele tyerrtye areye ampeke anthurre, kenhe itne anteme Ngkarteke ahele-anthurre-irreke renhe iltemele Rarle itnenhe arlengele arnterre anthurre ampemenge. Itne akwele utepe-irretyakenhe-arle irreke Ngkarte awetyeke Renhe tnakewarreyeke anteye, arrangkwe-arle akenhe itne aneke. Itne kwenhe mwernte-irreke akwetethe anthurre akurne mpwarerlte-anemele.

<sup>10</sup> Kele alkere-arenye arrpenhele anteme apanthe ikwernenhe-ngentyele apmerekere theleke arrentye akngerre-arle anentye akngerre ikwerele, alakenhe ikweringe anteme ingwemerte anthurre irreke apmerekere arrentye-kenhele, yanhe areyele arrentye renhe-arle awerlte-anemeke uyarne anthurre itirreme, itne ampwangkemele artneke alenye akakwelhemele itne-arle uyarne anthurre itirrekenge. <sup>11</sup> Itne Ngkarteke ahele akengentye angkemele Renhe ilteke, Alartetye-arle alkere akertnele anemeke, itne-arle utyene akngerre-akerte uyarne anthurre itirrekenge. Itne akenhe akwete anthurre-arle arne akurne areye akwenpele mpwarerlte-aneke itne Ikwere-



werne utepe-irritnetyeke itirretyakenhe aneke.

<sup>12</sup> Kele alkere-arenye arrpenhele anteme apanthe ikwerenhe-ngentyele lhere Euphrates-ke theleke. Kele kwatye yanhe re uyerreke ahelhe-anteme arerrtye-irreke. Ngkartele kwenhe nhenhe mpwareke nhenge yanhe-ngentyele alartetye areye artwe irraweeye anthurre itnekenhe areye-akerte urreke ikngerre-ngentyele apetyetyenhenge ahelhe arlenye ikwerele tyanenhetyeke. <sup>13</sup> The anteme areke utnenge akurne urrpetye arraterlengge antyetyerre-arteke-arle anemeke. Anyente apmwe kwatye-arenye arrakerte-ngentyele arrateke, arrpenhe arrentye nhenge arrakerte-ngentyele arrateke, arrpenhe ayeye ilantheke-arle arrakerte-ngentyele arrateke urrtyirremele ilemeke-arle. <sup>14</sup> Utnenge nhenhe areye kwenhe akurne anthurre aneke, itne arne akurne arrpenenhe ilyernpenye anthurre mpwaretyame. Itne alartetye ingkirreke apmwe ahelhe anteke nhenhe-arenye areye-werne alheke itnenhe apurtelhe-ilemele atwerretyeke-urletye. Kenhe Ngkartele akenhe, Alartetye Impene-arle anemeke, itnenhe ileme nhenge arlte iwenhe anthurrenge arratye ahele atwerretyeke.

<sup>15</sup> The Alartetye Jesus angkerlengge aweke, “Tyerrtye areye-aye, ayenge mwantyele awerrirraye. Ayenge kwenhe anyelkngge-anyelkngge apetyetyenhe, nhenge anyelkngalthele ingwele apetyeme-arteke. Nhenge ayenge apetyemele ayenge yanhe areyeke akangkemele anetyenhe akarre akwete-arle anerlte-anemeke, atyenge arelhemele,

mwerre akwete-arle anerlte-anemeke nhenge yanhe-ngentyele itne apure awelhetyakenhe anetyenhenge. Nhenge tyerrtye-arteke-arle mantereke akwete-arle irrpemeke, re apure-irreme-ketye nhenge tyerrtye areyele renhe arerlenghe akethe untherlenghe.”

<sup>16</sup> Kele arrentye urrpetyele antyetyerre-arteke-arle anekeke alartetye areye artwe irraweye itnekenhe areye-akerteke antangkeke, itnenhe ingkirreke apmere Armageddon arritnyenge apurtelhe-ilemele akngetyetyeke. Kenhe yanhe areye akenhe angkentye Hebrew-ele angkeme arritnye yanhe renhe alakenhe ileme.

<sup>17</sup> Kele alkere-arenye ingkernenyele anteme apanthe ikwerenhe-ngentyele alkereke theleke. Iparrpe anthurre angkentye chair mwerre akngerre Ngkarte-kenhe-ngentyele pipe kwenele-arle anemele arnterre anthurre alakenhe angkeme, “Kele kwenhe, kele uyerreke.” <sup>18</sup> Kenhe kwatye alarrkeke, kwatye arnterre anthurre unernenge angkeke, ahelhe arnterre anthurre akngelheke, apmere ahelhe ingkirreke anthurre anteme akiltye-irreke. Ahelhe awethe-anteye akngelheke akngerre-ulkere, tyerrtyele kwenhe aretyakenhe aneke alakenhe re arrekwelenghe akngelherlenghe.

<sup>19</sup> Kele anteme apmere akngerre Babylon arritnye akalke-irreke apmere urrpetye anteme aneke. Apmere akngerre arrpenhe ingkirreke anthurre atakelheke, nhenge ahelhe akngelhemele re apmere arrpenheme atakerlenghe. Kenhe Ngkartele anteme akenhe itelareke tyerrtye atningke apmere Babylon-

arenye-arle akwetethe akurne mpwarerlte-anetyartenge, kele Re anteme itneke ahele-anthurre-irreke imerte itnenhe ingkirreke anthurre irrerlknge atwemele. <sup>20</sup> Kenhe apmere ahelhe akweke areye kwatye alayelearle utepe-akerrirremeke imerte uyerremele, anetyakenhe aneke, apwerte antherrtye areyearlike atnyemele uyerreke. <sup>21</sup> Kwatye apweteke akngerre alkere-ngentyele atnyerrirreke iparrpe anthurre. Itne kwenhe ulthentye akngerre anthurre, nhenge itne-arle iron-ngentyele mpwareke-arteke. Itne artwe uthene arelhe uthene ingkirreke atwetyame, itne uyarne anthurre itirreme. Itne apatemele anthurre aneke, itne Ngkarte akwetethe ilterlte-anemele Ikwere akengentye angkemele Rarle itnenhe alakenhe atwetyamenge.

## 17

### *Arelhe apmere akurne akngerre Babylon-arteke-arle aneme*

<sup>1</sup> Alkere-arenye 7 yanhe areye ikwerele tnerirretyame apanthe arltwe areye-akerte. Kele anyente itneke-ngentyele apetyemele atyenge angkeke, “Nhenhe-werne apetyaye the ngkwenge arelhe akurne imernetyenhenge artwe atningkenge-arle apwerte maneke interleanemeke, Ngkartele-arle renhe irrerlknge atwetyenhenge lyete. Arelhe nhenhe-akerte arrpenhe itirraye, re kwenhe apmere akngerre Babylon-arteke aneme, nthenhele-arle artwe ingkirreke arelhe arrpenhe areyenge akwetethe interlte-apemenge. Apmere akngerre yanhe

kwenhe lhere atningke itwele. <sup>2</sup> Kenhe alartetye areye akenhe apmere arrpe-anenhe-ngentyele apetyemele apmere akngerre yanhe ikwerenge apurte-irrerlte-aneme itne ingkirreke anthurre anteme akurne-irremele re-arteke, arelhe arrpenhe areyenge interlte-apemele, akngwelye areye-arteke akwele. Alakenhe-anteye tyerrtye areye ahelhe anteke-ngentyele apetyemele akurne-irreremele tyerrtye apmere yanhe-arenye areyele-arle itnenhe uternerlenge akurne mpwaretyeke. Itne itnenhe ngkwarle antywetyeke antheme, antyweke-arle-iperre itne arerte-irremele akurne anteme mpwareme, angwenhe apeke ikwerenge intemele, re-arteke.” Nhenhe kwenhe alkere-arenyele atyenge imerneke, atyenge ilemele.

<sup>3</sup> Yanhe ikwere-iperrele anteme Utnenge Akngerre Ngkarte-kenhe atyenge-arleke irrperlenge, alkere-arenye anteme apetyemele ayenge apmere arrangkethe-werne akngeke. Apmere yanhe ikwerele the arelhe areke, arrentye athetheke anthurre ulkereke arrernelherlenge. Arrentye yanhe akaperte 7-akerte rulye-rulye 10-akerte aneke. Angkentye akurne-ante anthurre arrentye nhenhe aneke arrpenhele-arle intelhe-ilekeke, Ngkarteke-arle anyurre-irremeke. <sup>4</sup> Kenhe arelhe akenhe mantere athetheke mwerre akngerreke irrpeme, re arne mwerre akngerre arrpenhe areyeke irrpeke gold-engentyele-arle mpwarekeke apwerte tyeperre areye-ngentyele-arlike, iltye-kenhe areye, ingke-kenhe areye, untye-kenhe areye, atyepene-kenhe areye-arlike. Iltyele re

tyampite arntwirrkeke gold-engentyele-arle mpwarekeke arne akurne anthurre areye-akerte rarle mpwareke. Arrantherre itelareme, re artwe atningke anthurrenge inteke, arne akurne arrpenhe areye mpwaretyarte. Arne akurne akngerre yanhe areye rarle mpwareke-arle tyampitele-arlenge arrernerlenge-arle mpwanke anthurre. <sup>5</sup> Arrpenhele arelhe urleke-arleke arritnye anyente intelhe-ileke-arle. Arritnye yanhe re aneke angkentye alengkiwentye-akerte arrpenhe areyele itelaretyakenhenge anetyarte, kenhe lyete anteme tyerrtye ingkirrekele itelareme iwenhe apeke renhe arritnye ilemenge. Nhenge intelhe-ilentyele alakenhe ileme, “Ayenge kwenhe apmere akngerre anthurre Babylon aneme, mikwe ingkirrekeke arrpenhe areyenge-arle apworte ngkweltyeke interlte-anemeke. Arne akurne ingkirreke anthurre-arle atyenge-ngentyele arrateme.” <sup>6</sup> The areke arelhe yanhe arerte-irrerlenge nhenge Ngkarte-kenhe areye irrerlknge atweke-iperrele kele imerte alhwe itnekenhe anteme antywemele, tyerrtye yanhe areyele-arle akwetethe anthurre Jesus arratye itelarerlte-anekeke.

Nhenge the arelhe nhenhe aremele ayenge apateke anthurre. <sup>7</sup> Kenhe alkere-arenye anteme atyenge angkeke, “Iwengenge-arle-ame unte apateme anthurre? The kwenhe lyete ngkwenge iletynhe imernemele nhenge iwenhe unte lyete arernenge, arelhe yanhe, arrentye-arlke renhe-arle akngernerle-apemeke, yanhe-arle thewe akaperte 7-akerte rulye-rulye

10-akerte. <sup>8</sup> Arrentye yanhe re unte-arle lyete ware arerle-iwerneke kwenhe itetheke-amparre aneke ilweke anteme re, arrpenhele renhe iperte akngerre anthurreke akwerneke. Kele lyete anteme re iperte akngerre ikwerenge-ntyetele arrateme. Nhenge tyerrtye akurne areyele aremele arrentye renhe iperte akngerrenge-ntyetele arraterlenge itne apatetyenhenge anthurre. Tyerrtye nhenhe areye kwenhe aneme arritnye-arle Ngkartele pipe-ke intelhe-iletyakenhe anekenge, yanhe areye itethe-arle akwete-ante anetyakenheke anetyenhe. Kenhe arrentye yanhe re kwenhe arrekwele-arle itetheke-amparre anekeke re anteme ilweke, awethe anetyakenhe anteme aneke, re kwenhe awethe arratetyenhe Ngkartele anteme renhe uyerrelhe-iletyeke anthurre, renhe irrerlknge atwetyenhe anthurre.”

<sup>9</sup> Kele alkere-arenye anteme atyenge arrentye yanhe ikwere-akerte awethe ileke. “Unte apeke ilyernpenye anthurre aneme, unte ayeye nhenhe renhe itelaretyenhe nhenge akapertewerne ilemele. Kenhe akaperte 7-ele apwerte antherrtye 7-akerte arratye-ileme nthenhele-arle arelhe yanhe anemeke. <sup>10</sup> Akaperte areyele, itne ileme-anteyele alartetye 7-akerte. Kenhe alartetye 5-pele interteke-interte kele aneke uyerreke anteme, lyete anteme aneme anyente akwete aneme apmere ikwerenheke alartetye antime, kenhe arrpenhe akenhe alartetye irretyakenhe akwete-arle. Nhenge re alartetye irreke-arle iperre, re arlte arlenge-arlentye anetyakenhele, arrangwe-arle. Akweke ware re anetyenhe

imerte uyerretyenhenge anteme. <sup>11</sup> Kenhe arrentye yanhe re itethe-arle anekeke ilweke-arle anteme, re kwenhe alartetye arrpenhe aneme nhenge eight-ngare. Re kwenhe arraty akurne anthurre anetyenhe nhenge alartetye arrpenhe 7 areye-arteke. Kenhe Ngkartele kwenhe renhe ure kweneke-arleke iwetyenhe renhe uyerrelhe-iletienhe anthurre.”

<sup>12</sup> Kenhe alkere-arenyele atyenge arrentye yanhe ikwere-akerte akwete anthurre iletiname. Re angkeke, “Rulye-rulye yanhe 10-pele unte-arle areke, itne kwenhe alartetye 10-pele aneme, kenhe itne akenhe alartetye irretyakenhe akwete-arle. Itne akenhe arrentye yanhe ikwerenge apurte-arle-irretienhe nhenge re alartetye irrerlenghe, itne ikwerenge apurtele tyerrtye ingkirrekeke alartetye anerlte-anetyenhenge. Itne kwenhe itneke alartetye arlte arlenghe-arlentye anetyakenhe anetyenhe, arlte urteke ware itne anetyenhe, nhenge hour anyenteke ware-arteke, kele itne anteme uyerretyenhe, itneke alartetye akwele aneke akweke ware. <sup>13</sup> Kenhe nhenhe 10-pele itne ingkirrekeke itirreke arne renhe-anteye mpwaretyeke, itne arrentye yanhe ikwere angkeke, ‘Unte anyente-arenye kwenhe arne ingkirrekeke alartetye akwete anetyenhe, anwerne kwenhe ngenhe-ante ware awetyenhe mpwaremele iwenhe apeke renhe unte anwernenhe mpwaretyeke ileme.’ <sup>14</sup> Alartetye 10-pele uthene arrentye uthene kwenhe Yepe-Yepe Akwerrke-nge atwerretyenhe. Re akenhe itnenhe irrerlknghe atwetyenhe itnenhe

uyerrelhe-iletienhe, Rarle kwenhe Atyeperre anthurre aneme alartetye arrpenhe ingkirrekeke alartetye-arle anemeke. Re King aneme, King arrpenhe ingkirrekeke alartetye-arle anemeke. Tyerrtye yanhe areye ikwerenge-arle anemeke itne kwenhe aneme Ngkartele-arle akngakeke, renhe-arle arratyete itelarerl-anemeke.” Alakenhe nhenhe re-arteke kwenhe alkere-arenyele atyenge ileke.

<sup>15</sup> Kele alkere-arenye re atyenge awethe angkeke, re atyenge arelhe akurne yanhe-akerte ileke alakenhe angkemele, “Awaye, the ngkwenge arratyete-iletienhenge iwenhe-arle unte arekeke. Itelareme, nhenge unte arelhe akurne yanhe areke apmere akngerre yanhe-arteke-arle anemeke, nhenge lhere akngerre areye itwele. Lhere akngerre yanhe areye kwenhe tyerrtye areye aneme apmere arrpe-anenhe-ngentyele, tyerrtye yenpe arlkenye arrpenhe areye-akerte, tyerrtye areye-arlke angkentye arrpenheke-arrpenhe-arle angkeme. <sup>16</sup> Itelaraye, unte rulye-rulye 10 areye areke, itne alartetye 10 areye-akerte, arrentye akngerre-akerte-arlke ileme. Itne apurte-irretienhe ingkirreke anteme arelhe yanheke ahentye-anetyakenhe anetyenhe artwe atningkenge-arle interle-apemeke. Itne arne mwerre akngerre ingkirreke ikwerenge-ntyete rakemele akngetyenhe rarle atnyenemeke, itne mantere ikwerenge irlwetyenhe, renhe akethe-iletienhenge. Itne tyelke ikwerenhe arlkwetyenhe renhe ureke-arleke iwemele renhe irrerlknge atwemele. <sup>17</sup> Ngkartele kwenhe



alartetye 10-pele nhenhe areye apurtelhe-ileke itne anyente-arteke itirremele anetyeke nhenge yanhe-ngentyele itne arrentye yanheke iletynhenge alartetye itnekenhe anetyeke. Kele arrentye yanhe re anteme arne ingkirreke anthurreke alartetye anetyenhe nhenge iwenhe-arle Ngkarte angkeke arratyete irretyete-atwetye.

<sup>18</sup> “Arelhe akurne yanhe unte areke, re kwenhe apmere akngerre-arteke aneme. Kenhe alartetye apmere yanhe ikwere-arenye anteme alartetye arrenhe ingkirrekeke alartetye irretyenhe apmere ahelhe anteke nhenhele-arle anemeke.” Alakenhe renhe alkere-arenyele atyenge ileke.

## 18

### *Ngkartele apmere akngerre Babylon atakeme*

<sup>1</sup> Nhenhe ikwere-iperrele the areke alkere-arenye arrenhe alkere-ngentyele apetyerleng. Alkere-arenye nhenhe re kwenhe alartetye impene aneke rltarrke anthurre-arle anemeke. Kenhe ahelhe anteke nhenhe anthurre alkngenthe-irreme rarle kwenhe imparrkemele anthurre anekenge. <sup>2</sup> Nhenge re apetyemele arteke arnterre anthurre arlkemele angkeke, “Ngkartele kwenhe apmere akngerre Babylon ataketyeke aneme tyerrtye ingkirreke anthurre apmere ikwerele kwenhe ilwetyenhe. Alakenhe ikwerenge anteme arrenkwelthe arpe-anenhe apmere yanhe ikwerele anetyenhe, thiye akurne areye-arlike yanhe ikwerele anetyenhe. <sup>3</sup> Tyerrtye apmere yanhe-arenye areyele kwenhe arne akurne areye akwetethe mpwarerlte-anetyarte. Itne mpwenye akngerre areye

anetyarte. Kenhe tyerrtye apmere arrpe-  
 anenhe-ngentyele apmere yanhe-werne alherl-  
 iwetyarte itnenhe arrkernemele, iwerre akurne  
 itnekenhe apentemele. Alartetye areye apmere  
 arrpe-anenhe-ngentyele apmere ikwere-werne  
 alhetyarte, arne akurne areye mpwarerl-  
 anetyeke alakenhe re-anteye. Kenhe arrpenhe  
 areyele arne areye-arle apwerte ngkweltyeke  
 antherretyarte, apmere yanhe ikwere-werne  
 alhetyarte. Itne arne mwerre akngerre areye  
 akngetyetyarte tyerrtye ankeyalthe areyeke  
 sell-eme-ilettyeke, apwerte ngkweltye akngerre  
 inirtnemele. Tyerrtye ingkirreke arerte-  
 irreke ngkwarle-arle antyweke-iperre-arteke.”  
 Alakenhe renhe alkere-arenye yanhele atyenge  
 ileke.

<sup>4</sup> Awethe-anteye the Ngkarte aweke alkere-  
 ngentyele angkerleng. Re kwenhe alakenhe  
 angkeke,

“Tyerrtye Atyinhe areyaye, apmere akngerre  
 yanhe impemele alhaye ikwerenge-ntyete  
 arratemele.

Nhenge arrantherre apeke itnekenge apurte  
 akwete aneme, arrantherre-inpe itne-  
 arteke-anteye akurne-irretyenhe.

The kwenhe itnenhe arlkarentye-akngerre-  
 ilettyeke aneme itnenhe arrilemele,  
 itne-arle arne akurne areye ingkirreke mp-  
 wartyartenge.

Kele iwerre akurne itnekenhe arrkernetyale  
 anaye, The apeke arrenhantherrenhe  
 arrileme-ketye-nge.

5 Itne kwenhe arne akurne areye akwetethe  
mpwarerlte-aneme,  
itne arne akenge arrpe-anenhe aharle-iweme-  
arteke alkere-akertneke-atwetye.  
Kenhe Ayenge kwenhe itneke ingkirrekeke  
akaltye anthurre aneme,  
nthakenhe-arle itne akwetethe arne akurne ar-  
eye mpwarerlte-anemenge,  
Ayenge arne akurne yanhe areyeke alkng-  
wirretyakenhe aneme.”

6 Kele Ngkarte anteme alkere-arenye yanhe  
areyeke angkeke, yanhe areye-arle Re ilekeke  
itnenhe arriletyeke,  
“Arne akurne iwenhe apeke renhe-arle tyerrtye  
areyele apmere ahelhe nhenhe-arenye ar-  
rpenhe areyeke mpwareke,  
arrantherre kwenhe itneke alakenhe-anteye  
mpwarirtnetyeke.  
Itne kwenhe Atyinhe areye akwetethe arntherre  
anthurre atwetyarte.  
Kele arrantherre kwenhe itnenhe atwirtnetyeke-  
anteye lyete, arntherre anthurre nhenge  
ulkere.

Akurne yanhe areye arratye-anteye arrilaye.

7 Tyerrtye yanhe areye apmere akngerre  
yanhele-arle anetyarte ayeyele ilelherlte-  
anetyarte.  
Itne kwenhe mantere akngerre atnyeneke  
arne mwerre akngerre arrpenhe areye-  
arlke apwerte ngkweltye akngerre-akerte-  
arlke.  
Itnenhe arlkarentye-akngerre-ilaye itne  
uyarne anthurre itirremele anetyeke.

Tyerrtye areye apmere yanhele-arle anekeke itneke-arrpe alakenhe angkeme,  
 ‘Anwerne kwenhe arelhe impene-arteke aneme, tyerrtye ingkirrekeke alartetye-arteke.

Anwerne kwenhe warlekwerte-irretyakenhe anetyenhe, nhenhele anemele akayale artnemele, alhwarrpe anerlte-anemele, anwerne akangkemele anthurre-tetye anetyenhe.’

Alakenhe-arteke kwenhe itne ayeyele ilelheme.

<sup>8</sup> Itne-arle alakenhe tnakelherlenghe, lyete ware The anteme itnenhe atwetyenhe, itne uyarne anthurre itirretyenhenge.

Itne rlkerte anthurre irretyenhe anteme, tyerrtye atningke ilwetyenhe, itne alhwarrpe anthurre atnerte awelhetyenhe. Nhenhe ikwerele ureke, apmere arlenye ararrtye anthurre irreme merneke arrangkwe-arlke.

The apmere akngerre yanhe urele itetyenhe, re ampetyenhe uyerretyeke-atwetye.

Ayenge kwenhe Alartetye arratyeh anthurre aneme, Ayenge kwenhe aneme itirremele-arle nthakenhe-arle itnenhe arrilettyeke.”

<sup>9</sup> Nhenge apmere akngerre yanhe re amperlenghe, ure akwerte antyure akngerre akeme-irretyenhe, alartetye areye apmere arrpe-anenhe-arenyele aretyenhe imerte arnterre anthurre arrangkemele. Alartetye areye apmere arrpe-anenhe-ngentyele itne kwenhe yanhe ikwere-werne alhetyarte, mpwenye ikngwetyarte, arne akurne areye mpwaremele,

iwenhe apeke ikwere itne akangkemele anetyeke. Itne anteme kwerte antyure yanhe renhe apmere arlenge-ngentyele aretyenhe, itne apmere yanhe ikwere arnterre anthurre artnetyenhe, Ngkartele-arle kwenhe renhe urele iterlenge renhe akethe-ante arrernemele. <sup>10</sup> Apmere arlenge-ngentyele itne tneleme aretyenhe atere-irremele nhenge Ngkartele itnenhe-arlike urele iteme-aketye. Yanhe ikwerele tneleme anteme itne itirretyenhe nhenge nthakenhe-arle arne areye anetyarte-akerte. Itne angketyenhe, “Ayekaye, akunye areye. Yanhe areye apmere akngerre yanhele-arle aneme uyerreke anthurre. Apmere akngerre yanhe kwenhe mwerre akngerre anthurre anetyarte, tyerrtye areyele renhe tnaketyarte. Kenhe Ngkartele akenhe renhe urele iteke imerte renhe iparrpe-iparrpe anthurre atakemele.”

<sup>11</sup> Kenhe tyerrtye areye, arne areye-arle apwerte ngkweltyeke antherrentye akngerre, apmere yanhe ikwere irnterre anthurre arrangketyenhe, tyerrtye areye arne areye-arle itneke-ngentyele apwerte ngkweltyele inetyarte, itne-arlike apeke kwenhe ilweke. Itne kwenhe itneke-ngentyele apwerte ngkweltye awethe uyarne ineme. <sup>12</sup> Itne apatemele anthurre uyarne itelaretyenhe iwenhe apeke renhe mpwaretyeke. Itne apayuthnerremele anetyenhe, “Angwenhele-ame gold uthene silver uthene anwerne-kenhe inetyenhe, apwerte mwerre akngerre arrpenhe areye-arlike? Angwenhele-ame mantere arkenye

arrpenhe mwerre akngerre areye anwerne-kenhe inetyenhe, antere unpe mwerre-angkere ntyeme-arlike? Angwenhele-ame arne arrpenhe mwerre akngerre areye inetyenhe anwerne-arle apwerte-ngentyele metal-ngentyele mpwarekeke? Uyerreke kwenhe, tyerrtye areye arne mwerre akngerre areye-arle anwerneke-ngentyele inetyarte kwenhe ingkirreke anthurre ilwerrirreke. <sup>13</sup> Kele angwenhele-ame arne ntyentye mwerre akngerre nhenhe areye anwerne-kenhe inetyenhe, ngkwarle, antere, merne ulpmenthe, annge wheat, pweleke, yepe-yepe, nanthe areye, wagon areye-arlike, arne arrpenhe ingkirreke-arlike anwerne-arle atnyenemeke? Angwenhele-ame warrkene nhenhe areye anwerne-kenhe inetyenhe? Uyerreke kwenhe, tyerrtye areye arne mwerre akngerre areye-arle anwerneke-ngentyele inetyarte kwenhe ingkirreke anthurre ilwerrirreke. <sup>14</sup> Arne mwerre akngerre ingkirreke itne-arle atnyenetyarte uyerreke, apwerte ngkweltye ingkirreke, arne mwerre akngerre arrpenhe areye kwenhe arrangkwe aneme. Itne kwenhe arne yanhe areye-arteke awethe atnyenetyakenhe anetyenhe, arrangkwe anthurre-arle.”

<sup>15</sup> Itne alakenhe angketyenhe, itne-arle kwenhe apmere akngerre yanhe ikwere-werne alhetyarte arne arrpenheke-arrpenhe areye antherretyeke apwerte ngkweltye akngerre inemele. Artwe yanhe areye kwenhe arlengele atere tnetyenhe Ngkartele itnenhe anteme apeke urele iteme-ketye anteye. Ikwere iperre anteme

itne irnterre anthurre arrangemele alknultye thellehe. <sup>16</sup> Itne anteme angketyenhe, “Ayekaye akunye-apenhe areye. Akurne akngerre anthurre itneke irreke-arle. Yanhe areye apmere akngerre yanhe ikwerele-arle anemeke kwenhe uyerreke. Yanhe areye mantere mwerre arlkenye arrpenhe anthurreke-arle irrpetyarte. Itne ite-kenhe areyeke irrpetyarte iltye-kenhe areye-arlke goldengentyele-arle apwerte tyeperre anthurrengentyele-arlke-arle mpwarekeke. <sup>17</sup> Kenhe iparrpe anthurre Ngkartele arne mwerre akngerre ingkirreke anthurre atakeke.”

Kenhe tyerrtye atningke akenhe boat areyenge kwaty alayele tyanenhome arne areye apw-erte ngkweltyeke antherretyeke apmere arrpe-anenhe ikwerele. Nhenge boat-eke-artweye yanhe areyele, warrkene itnekenhe areyele-arlke arlengengentyele arerlte-anetyenhe, itne aretyenhe ure amperleng. <sup>18</sup> Itne mwantyele aretyenhe ure kwerte antyure akngerre akeme-irrerleng arleng nhakwe. Itne anteme angkerretyenhe, “Apmere akngerre arrpenhe ingkirreke kwenhe nhenhe-arteke anetyakenhe aneke. Apmere yanhe kwenhe arrpenhe ingkirrekenge akngerre anthurre ulkere.” <sup>19</sup> Nhenge itne renhe aremele, atnerte akngarte-anthurre-iwelhemele irretyenhe, arlpmenyele mperlkere anthurre illelhomele. Itne irnterre anthurre arrangemele angketyenhe, “Akunye-apenhe areye, akurne anthurre irreke tyerrtye areyeke apmere akngerre yanhele-arle anemeke, itne kwenhe iparrpe-iparrpe anthurre ilwerrirreke. Tyerrtye ingkir-

rekele apmere arrpe-anenhe-ngentyele kwenhe itnenhene akertne utyernetyarte. Yanhe areye boat akngerre-akerte areye arne arrpe-anenhe itneke-werne akngetyemele apwerte ngkweltye akngerre inetyarte. Lyete anteme akenhe Ngkartele-arle apmere Babylon iparrpe atakeke arne mwerre akngerre ingkirreke-arlke yanhe ikwere-arle anekeke.”

<sup>20</sup> Kele anteme arrpenhe alkere akertne-ngentyele angkeke, “Arrantherre alkere akertnele-arle anemeke, akangkemele anaye, apmere Babylon-eke nthakenhe-arle-irretyenhe! Arrantherre kwenhe Ngkarte-kenhe areye aneme, arrantherre angkentye Ngkarte-kenhe-arle ilerle-apetyeke yernekeke, nhenge yanhe ayeye-arlke Ngkarteke-arle angkekeke, akangkemele anerrirraye, Ngkartele-arle kwenhe arratye mpwaretyenhe nhenge Re tyerrtye Babylon-arenye areye arrilemele itne-arle kwenhe arrekantherre arne akurne anthurre mpwarekenge!”

<sup>21</sup> Kele alkere-arenye lterrke akngerre anthurrele anteme apwerte akngerre anthurre, athere akngerre-apenhe-arteke, akertne-ileke imerte kwatye alayeke-arleke iwemele. Re anteme alakenhe angkeke, “The kwenhe apwerte yanhe kwatye alayeke-arleke iweke, re uyerreke anteme. Kele, alakenhe renhe-arteke Ngkartele apmere akngerre yanhe Babylon ataketyenhe renhe akethe-ante arrernemele athirnte-iletienhe, arrantherre anteme renhe uyarne aretyenhe. <sup>22</sup> Arrpenhe anyente-ante-arle anetyakenhe alyelhentye-arle mwerre



alyelhetyeke anemeke apmere yanhe ikwerele, arrpenhe-arle anetyakenhe guitar akangkemele arrkene-irremele anetyenhe. Arrangkwe anteme kwenhe lyete anetyenhe, nterte anthurre anteme anetyenhe. Arrpenhe anyente anetyakenhe merne ntange athetyeke, awetheke arrangkwe tyerrtye nhenhe ingkirreke-arle kwenhe ilwetyenhenge. <sup>23</sup> Apmere akngerre yanhe ikweringe, arrpenhe anyenteke arrangkwe anetyenhe alkngenthe ilettyeke. Artwe uthene arelhe uthene awethe anewe-aketyakenhe anetyenhe. Tyerrtye yanhe areye apmere yanhe ikweringe-ntyete-arle arne areye apwerte ngkweltyeke antherretyarteke kwenhe ilyernpenye anthurre aneke. Tyerrtye apmere arrpe-anenhengentyete kwenhe itnenhe akertne utyernet-yarte. Ngangkere areye akenhe urrtye akwetethe angkentye akngerre, kenhe tyerrtye apmere arrpenhe areye-ngentyete itnenhe arraty akwete itelaretyarte. Kenhe arne ingkirreke anthurre apmere akngerre ikwerele atakelhemele uyerretyenhe.

<sup>24</sup> “Tyerrtye Babylon-arenye areyele kwenhe irrerlknge atwetyarte nhenge yanhe areye angkentye Ngkarte-kenhe ilerlte-apetyeke-arle yerneke, nhenge yanhe areye-arlike Ngkarteke-arle angketyeke. Itne Ngkarte-kenhe areye ingkirreke irrerlknge atwetyarte. Alakenhe ikweringe anteme Ngkarte apmere akngerre Babylon akethe-ante arrerneke tyerrtye ingkirreke yanhe-arenye areye-arlike uyerrelhe-ilemele.”

# 19

*Ngkartele apmere Babylon atakeke-iperre, tyerrtye ingkirreke akertnele-arle anemeke Renhe tnaketyenhe*

<sup>1</sup> Ikwere-iperrele, alkere-arenye lterrke akngerre angkentye uyerreke-iperrele the aywerre aweke tyerrtye atningke-arteke alkere akertnenge apurte alyelhewarrerlenge. Alakenhe nhenhe kwenhe itne arlkemele, “Hallelujah, anwerne Ngkarte akertne utyernemele tnakewarreye Rarle kwenhe anwernenhe itetheke mpwarerlenge ilwemeketye. Re kwenhe mwerre akngerre anthurre aneme arrpenhe areye-arteke anetyakenhe! Re-ante ware kwenhe ilyernpenye anthurre!

<sup>2</sup> Re kwenhe arne mwerre areye mpwarentye akngerre, akwetethe kwenhe Re arne areye arraty mpwarerle-aneme. Re arelhe akurne yanhe renhe areke, arrpenhe atningke-arle uternetyarteke, mpwenye ikngwemele apmere arrpe-anenhele. Arelhe re Ngkarte-kenhe areye irrerlkngge atweke anteye. Kenhe lyete Ngkartele anteme renhe arrileke.”

<sup>3</sup> Akertnnyenye-arenye areyele arnterre alak-enhe awethe arlkeke, “Hallelujah, anwerne Ngkarte akertne utyernemele tnakewarreye, Rarle kwenhe apmere akngerre yanhe renhe alkngenthe-ilemele itekenge, ure kwerte antyure akngerre akwete-ante akeme-irrerlenge.”

<sup>4</sup> Artwe akngerrepate 24 yanhe areye uthene atnunthe 4-pele uthene Ngkarte Alartetyeke

artepe-anemele kwene-irreke Renhe tnakewarremele. Rarle thewe, chair mwerre akngerrele-arle anerle-anemeke. Itne angkeke, “Yewe, anwerne ingkirrekele Ngkarte utyernerlte-anemele tnakewarreye.”

*Rarle, Yepe-Yepe Akwerrke-arteke-arle anemeke anewe akeme*

<sup>5</sup> Yanhe ikwere-iperrele the aweke arrpenhe angkerlenge, angkentye chair mwerre akngerre yanhe-ngentyele-arteke. Re kwenhe alakenhe arlkeke,

“Anwerne ingkirrekele Ngkarte akertne utyernemele tnakewarreye! Warrkene ingkirreke Ikwerenhe areyele-arlke renhe akertne utyernemele tnaketyeke-anteye, ltterrke areyele-arlke, alyepe-alyepe areyele-arlke; Tyerrtye ingkirreke Ikwerenhe areyele-arlke Renhe akertne utyernemele tnaketyeke yanhe Ikwereketye ateralthe areye-arlke.”

<sup>6</sup> The anteme aweke angkentye aywerre akngerre tyerrtye atningke-arle arlketyame-arteke. Angkentye kwenhe aneke kwatye-arle arnwangkeme-arteke, kwatye aywerre angkeme-arteke nhenge apwerte akertnenge thelelhomele. Itne alakenhe angketyame, “Hallelujah, anwerne Ngkarte akertne utyernemele tnakewarreye Rarle kwenhe alartetye anthurre anwerne-kenhe anerlenge. Re kwenhe tyerrtye ingkirrekeke alartetye anthurre aneme apmere ahelhe nhenhele-arle anemeke. <sup>7</sup> Kele anwerne Renhe akangkemele tnakewarreye, Ikwere alyelhetyeke Rarle kwenhe mwerre anthurre anerlenge ingkirreke mpwaretyeke ilyernpenye

anthurre. Lyete anteme aneme nhenge Yepe-Yepe Akwerrke-artekele-arle anewe aketyeke aneme, anewe ikwerenhe akwete-ante mpwarelheke lyete anteme re ikwere akarelhemele. <sup>8</sup> Ngkartele kwenhe renhe antheke mantere mperlkere mwerre akngerre imparrkeyeke irrpetyeke.” Anwerne itelareme, mantere nhenhe areyele-arle anwerneke arratyeyileme warrke mwerre anthurre Ngkartekenhe areyele-arle Ikwere mpwarekeke.

<sup>9</sup> Kenhe alkere-arenye re-anteye atyenge angkeke, “Nhenhe intelhe-ilaye: Nhenge rarle thewe Yepe-Yepe Akwerrke arteke-arle anemeke anewe akerlenghe, tyerrtye atningke kwenhe apetyetyenhe apurte-irremele merne akngerre akangkemele arlkwetyeke. Ngkartele tyerrtye Ikwerenhe areye anyente-irretyeke ileke-arle. Nhenge itne apurte-irremele itne akangkentye anthurre anetyenhe.” Alkere-arenye anteme atyenge awethe angkeke, “Angkentye nhenhe areye itne kwenhe arratyey aneme, itne Ngkartengentye.”

<sup>10</sup> Nhenge the renhe awemele ayenge Ikwerenge arrekwele iparrpe anthurre ulperre intemele renhe tnaketyeke. Re akenhe atyenge angkeke, “Ayenge tnaketyale anaye! Ayenge kwenhe warrkene Ngkarte-kenhe ware aneme nhenge unte-arteke-anteye warrkene arrpenhe areye-arteke tyerrtye areyeke-arle Jesus-akerte ilerle-apemeke. Ngkarte-tetye akertne utyernemele tnakaye tyerrtye areyele-arle arrpenhe areyeke-arle Jesus-akerte ilerlte-apemeke, itne angkentye arratyey angkeme

Utnenge Akngerrele-arle itnenhe anthekeke.”

*Ayeye artwe nanthe mperlkere artepele akerte*

<sup>11</sup> Kele the anteme areke alkere akertne altywere-irrerlenghe, ayenge apateke nhenge nanthe mperlkere arratekenge. Artwe anyente nanthe yanhe artepele anetyame; artwe yanhe re arritnye alakenhe-akerte “Anyente Arratyte Itirrentye Akngerre, Arne Areye Arratyte Mpwarentyte Akngerre.” Re-ante kwenhe aneme arratyte mwerre mpwarentyte akngerre-arle, tyerrtye ingkirreke court-eke ngkerneke-arle iperre aretyeke anteme itne apeke arratyte mwerre anetyartenge ithwenge apeke. Nhenge re arrpenhe areyenge atwerretyeke alhemele, re tyerrtye akurne areye-ante irrerlknghe atweme. <sup>12</sup> Alknghe ikwerenhe kwenhe ure alkngenthe-arteke ampeke, re mwekarte atningke alartetye-kenhe areye akaperteke irrpeke. Tyerrtye ikwerenheke-arleke arrpenhele arritnye alengke-iwentye intelhe-ileke. Arrpenhe areyele arritnye yanhe uye itelarerlenghe, re-ante ware renhe itelareke. <sup>13</sup> Mantere rarle irrpeke-arle kwenhe alhwe-ante anthurre. Itne angkeme arritnye ikwerenhe-arle alakenhe akwele aneme, “Angkentye Ngkarte-kenhe.” <sup>14</sup> Atwerrentye akngerre areye alkere akertnyente-arenye atwerretyeke apurte-irreke renhe apenteke ingkirrekele nanthe mperlkereke-arle antyeke, mantere mperlkereke irrpeleme anteye. <sup>15</sup> Kenhe artwe yanhe itnekenge arrwekele-irretyame, arrakertele re alyweke arrirlpe akngerre anthurre

arntwirrkemele re tyerrtye areye apmere ingkirreke anthurre-ngentyele atwerretyeke impetyenhenge. Kenhe itne akenhe renhe uyarne atwirtneme renhe akwele uyarne irrerlkng e atwemele. Kele re anteme tyerrtye ingkirrekeke alartetye anetyenhe, itnenhe arne areye mpwaretyeke uternetyenhe rarle ilemele. Ngkarte kwenhe itneke ahele anthurre aneme renhe-arle awetyakenhe anetyenheke. Itelaraye, nhenge artwe anyentele kripethe areye ultheme akarrwe rputnemele-arteke, re alakenhe-arteke-anteye-arle itneke mpwaretyenhe, itneke imernetyeke Ngkarte-arle itneke ahele anthurre aneme. <sup>16</sup> Kenhe mantereke-arleke aneke ulyepereke-arleke anteye aneke arritnye arrpenhele-arle ilemeke, “Re kwenhe King aneme, King arrpenhe ingkirrekenge tyeperre ulkere, Re kwenhe Alartetye aneme Alartetye arrpenhe ingkirrekenge tyeperre ulkere.”

<sup>17</sup> Kele the anteme alkere-arenye anyente areke alernngele-arle tnetyameke. Re thiye kere arlkwentye akngerre ingkirrekeke arnterre anthurre arlkeke alkerele-arle alkereke-irretyameke, “Apurtelhe-iletyeke apetyewarraye nhenge arrantherre kere ingkirreke arlkwetyenhenge Ngkartele-arle arrenhantherrenhe anthe-meke! <sup>18</sup> Apetyewarraye, tyelke nhenhe tyerrtye ilweke-arle areye-kenhe arlkwetyeke nhenhele-arle interle-anemeke, nanthe areye-arlke arlkwaye. Nhenhele itne ingkirreke interrirreme, alartetye anthurre areye, atwerrentye akngerre areye, alartetye itnekenhe anteye, nanthe itnekenhe areye, yanhe areye nanthenge-

arle apetyekeke, warrkene areye, arrpenhe areye itneke-arrpe-arle warrke-irremeke. Yanhe kwenhe tyerrtye atningke anthurre inteme ar-rantherre arlkwetyeke atyeperre akngerre areye apeke, tyerrtye alhengkeye areye apeke, tyerrtye apwerte ngkweltye akweke ware-akerte apeke, arrpenhe areye apwerte ngkweltye akngerre-akerte apeke. Ingkerreke anthurre arlkwaye impetyale itnenhe.” Alakenhe renhe kwenhe re thi-pe areyeke angkeke.

<sup>19</sup> The anteme arrentye renhe awethe areke. Re kwenhe alartetye apmere ahelhe nhenhe-arenye ingkirrekenge apurte tnetyame atwerrentye akngerre itnekenhe areye-akerte-arlke apurte-anteye-arle-irrekeke. Itne kwenhe renhe angkarre atwerretyeke tnerrireke nanthe artepele-arle aneme nhengenge ikwerenhe areyenge anteye. <sup>20</sup> Kenhe nanthe mperlkerenge rarle arrentye renhe arntwirrkemele renhe ayerneke akngemele. Re-inpe arrpenhe renhe arntwirrkeke anteye, yanhe re urrtye akwetethe angkentye akngerre. Re kwenhe aneme ilyernpenye anthurre-arle arne areye mpwarekeke nhenge arrentye yanhele aretyamenge. Nhenge re arne yanhe areye ilyernpenye anthurrele mpwaretyame re tyerrtye areye urrtyekelhe-ilemele imperre-arle urleke-arleke-akerte anemeke, itnenhe uterneke artepe anemele kwene-irretyeke tnaketyeke arne yanhe apwerte-ngentyele-arle mpwarekeke re-arteke-arle anekeke. Kele alartetyele nanthe mperlkerenge-arle arrentye yanhe iweke, artwe urrtye akwetethe angkentye

akngerre-arlke, ure alkngenthe akngerreke-  
 arleke kwerte unpe akurne anthurre re  
 ntyeme. <sup>21</sup> Kele rarle nanthe mperlkere-akertele  
 atwerrentye akngerre arrentye-kenhe areye  
 irrerlkngge atweke alyweke-arle arrakertele-  
 arle arntwirrkekeke. Tyerrtye ilweke-arle  
 apanpele interlte-aneke. Kele anteme thipe  
 areye apetyemele ingkirreke ankeye akngerrele  
 arlkweke anhelke anteme itne aneke.

## 20

### *Itne arrentye Satan ayerneke uterne 1000- atwetye*

<sup>1</sup> Yanhe ikwere-iperrele the areke alkere-  
 arenye alkere akertne-ngentyele kwene-akerle  
 apetyerlengge iltye akwe-arratyete re chain  
 arlpentye lterrke akngerre arntwirrkeke,  
 iwenhe-akweye ikwere-arlke-akerte iperte  
 akngerre renhe altywere-iletaye. <sup>2</sup> Re apetyeke  
 apmwe kwatye-arenye renhe arntwirrkemele  
 re renhe chain lterrke akngerrele ayernemele  
 renhe ipmentye impeke anetyeke uterne 1,000-  
 eke-atwetye. Apmwe kwatye-arenye yanhe  
 re kwenhe apmwe arrekwele anthurrenge-  
 arle anetyarte, apmwe nhenge arrentye  
 Satan arritnye. <sup>3</sup> Alkere-arenye re-anteme  
 arriwe altywere-ileke, re apmwe renhe iperte  
 akngerreke-arleke iwemele, arriwe key ikwerele  
 martemele metyileme. Ikwere-iperrele aneke  
 martelhentye akwete, arrpenhele renhe uyarne  
 altywere-ileme uterne 1,000-ekte-atwetye,  
 apmwe yanhe apeke arrateme-ketye, tyerrtye  
 areyeke awethe-ame-awethe urrtirreme-ketye.



Renhe-arle iperte akngerrele uterne 1,000-ekewetye atnyeneke-iperrele, kele alkere-arenyele anteme renhe arratelhe-ileke imerte renhe ipmentye impemele akweke wareke.

<sup>4</sup> Ikwere-iperrele anteme the areke tyerrtye atningke anthurre chair mwerre akngerre ikwere areyele anerlenge. Ngkartele itnenhe alartetye anetyeke arrerneke imerte itnenhe ilemele tyerrtye areye court-ekewetye ngkernetyeke itneke itirremele anetyeke. The tyerrtye areye areke, arrpenhe areyele akaperte itnekenhe akeke-arle itne-arle kwenhe tyerrtye areyeke Jesus-akerte iletartyenge, iwenhe angkentye Ngkarte-kenhe angkemele anteye. Itne kwenhe arrentye renhe tnaketyakenhe anetyarte, itne artepe anemele kwene-irretyakenhe aneke, itne tnaketyakenhe arne yanhe renhe arrentye-arteke-arle anekeke tyerrtye areyele-arle mpwarekeke. Itne kwenhe imperre arrentye-kenhe atnyenetyakenhe aneke, arrangkwe anthurre-arle, nhenge urlele apeke, ilyele apeke, arrangkwe-arle. Irrerlkngwe inteke-arle nhenhe areye awethe anteye itethe-irritnemele, itne Jesus-nge apurte-irremele ikwerenge alartetye areye irreke uterne 1,000-ekewetye. <sup>5</sup> Nhenhe areye kwenhe arrekwenye areye aneme ilweke-arle awethe-anteye itethe-irritneke. Kenhe arrpenhe areye itethe-irritnetyakenhe akwete irrerlkngwe itnekenhe ware interrirreke akarelhemele uterne 1,000 uyerretyeke. Itne kwenhe Ngkarteke akarelhetyame itnenhe awethe itethe-ilirtnetyeke. <sup>6</sup> Ngkarte arrwekelenye nhenhe areyeke atnerte

akangkentye anthurre awelhetyenhe itethe-arle-irirtnekenge. Re itneke itirretyenhe atyewe arratyete Ikwerenhe-arle aneme-arteke nhenge itnenhe akalkelhe-ileke-arle-iperrele, Re itnenhe ureke-arleke iwetyakenhe atherre-ngare ilwetyeke, arrangkwe-arle. Itne Ngkarte uthene Christ utheneke-tetye tyatyete Ikwere-atherrenhele warrke-irretyenhe, itne kwenhe kwertengerle tyatyete-kenhe anteye anetyenhe Christ-nge uterne 1,000 ikwerele-ureke.

*Urele arrentye Satan akurne-ilemele ampeme*

<sup>7</sup> Nhenge uterne 1,000 anpere-irreke-arle alkere-arenye Ngkarte-kenhele arrentye Satan iperte akngerre ikwerenge-ntyete arratelhe-iletienhe renhe irlwemele aywepetyenhe. <sup>8</sup> Re iperte akngerre yanhe ikwerenge-ntyete arratetyenhe tyerrtye akurne areyeke apmere arrpe-anenhe-werne alhetyeke anteme itneke urrtyrremele angketyeke. Apmere yanhe areye arritnye arrpenhe atherre-akerte, Gog uthene Magog uthene. Arrentye Satan-ele tyerrtye akurne areye apurtelhe-iletienhe tyerrtye Ngkarte-kenhe areyenge atwerretyeke. Atningke akngerre anthurre kwenhe itne anetyenhe yerre akweke areye-arteke. <sup>9</sup> Itne apmere arrpe-anenhe-ngentyete apetyetyenhe apmere ingkirreke ahelhe anteke-ngentyete, irraweye tnetyenhe angkarre atwerremele nhenge Ngkarte-kenhe areye apmere itnekenhenge utepe-akerrirremele apmere yanhe Ngkarte-arle ahentye anthurre anemeke. Kenhe ure alkngenthe akngerre anthurre alkere-ngentyete

kwene-akerle apetyetyenhe itnenhe ampetyeke akethe-ante arrernemele. <sup>10</sup> Kenhe alkere-arenye alartetye yanhele anteme arrentye Satan iwetyenhe, nhenge tyerrtye ingkirreke-arle urrtyrremele iletarteke, apmere yanheke-arleke akwetethe-arle amperle-anemeke kwerte ntyenge irntirte-akerte, nthenhele-arle itne kwenhe arrentye renhe kele iweke-arle angkentye ilentye akngerre-arlike urrtye akwetethe-arle angkentye akngerre. Urele itnenhe ampetyenhe rlkerte-anthurre-ilemele, itne anteme uyarne anthurre itirretyenhe, arltele-akake ingwele-akake, akwete-ante-arle.

*Ngkartele tyerrtye ingkirreke court-eke ngk-erneke*

<sup>11</sup> Ikwere-iperrele the Ngkarte areke chair mperlkere akngerre-apenhele anerle-anerlenghe. Nhenge re arratemele, apmere ahelhe nhenhe uthene alkere uthene uyerrerlenghe tyerrtyele renhe-atherrenhe awethe aretyakenhe aneke. <sup>12-13</sup> The areke tyerrtye ingkirreke anthurre apmere ahelhe nhenhele-arle arrekwele ilwekeke kenhe lyete anteme-arle itne awethe itethe-irritneke, itne kwenhe chair mperlkere akngerrenge arrekwele tnerrireke: tyerrtye akngerre areye arrpenhe akweke areye, alartetye areye, warrkene areye. Arrpenheme kwatye alayeke alhekwarle-irreke, arrpenheme ahelhe iperte irrarele inteke, arrpenhe areye akenhe anetyame apmere ilweke-arle areye-arle aneme ikwerele. Itne ingkirreke kwenhe chair akngerre yanhe ikwerenge arrekwele tnerriretyame. Pipe atningke anthurre yanhe

ikwerele aneke, Ngkartele anteme itnenhe altywere-ileke ingkirreke anthurre aremele. Pipe arrpenhe areye ileke nhenge nthakenhe-arle tyerrtye areye apmere ahelhe nhenhele anerrirretyarte. Kenhe arrpenhe areye arritnye atningke anthurre-akerte-arle aneke. Nhenge yanhe areye, iwerre akurnele-arle anetyarte apmere ahelhe nhenhe ikwerele, arritnye itnekenhe pipe yanhe areyele aneke. Kele imerte re pipe arrpenhe altywere-ilemele, pipe tyeperre anthurre Ikwerenhe, pipe yanhe nhenge arritnye Ikwerenhe areye-akerte-ante ware-arle. Pipe ingkirreke anthurre areke-arle iperre Ngkartele tyerrtye ingkirreke court-eke ngkerneke. Anyenteke-anyente itne ingkirreke alhemele chair mperlkere akngerre-apeenhe ikweringe arrekwele tneke. Ngkartele anteme itnenhe arrpe-anenhe apayuthneke, nhenge nthakenhe-arle itne apmere ahelhe nhenhele anetyarte, iwenhe-arle itne mpwaretyarte ahelhe nhenhele. <sup>14</sup> Ngkarte angkeke, tyerrtye areye ilwetyakenhe anetyenhe awethe, itne ahelhe ipertele intetyakenhe anetyenhe awethe. Re ure alkngenthe akngerre kweneke-arleke iweke yanhe areye Renhe-arle arratye itelaretyakenhe aneke, arrpenhe nhenge-arlike tyerrtye areye tnyante irrerlkngeke atwenhe-atwenhe. Ure alkngenthe akngerre yanhe re kwenhe apmere tyerrtye akurne areye-arle awethe atherre-ngare ilwetyenhe. <sup>15</sup> Tyerrtye nhenge yanhe areye arritnye pipe-nge-arle anetyakenhe aneke, nhenge Ngkartele-arle arritnye tyerrtye areye-kenhe intelhe-ileke

akwete-ante-arle anetyenheke, Ngkartele  
itnenhe ure alkngethe akngerreke-arleke  
iweke.

## 21

*Ayeye alkere alkarle uthene ahelhe alkarle  
uthene-akerte*

<sup>1</sup> Ikwere-iperrele the ahelhe arrpenhe  
uthene alkere arrpenhe uthene areke, alkarle-  
arle arrpenhe. The ahelhe arrekwenye,  
alkere arrekwenye uyarne areme, kwatye  
alaye anteye the uyarne aremele. <sup>2</sup> Kele  
the anteme apmere akngerre Ngkartele-  
kenhe areke, apmere yanhe Jerusalem,  
arrekwenye anetyakenhe, alkarle kwenhe  
yanhe aneme. Re kwenhe alkere akertne-  
ngentyele atyenge-werne-atheke kwene-akerle  
apetyetyame. Apmere yanhe re kwenhe mwerre  
akngerre anthurre aneke. Nhenge marle-  
arle mantere mwerre akngerreke irrpeme-  
arteke nhenge re mpwarelherlenge anewe  
inetyeke, alakenhe re-arteke apmere akngerre  
yanhe re mwerre akngerre anthurre aneke.  
<sup>3</sup> The anteme arrpenhe aweke chair mwerre  
akngerre yanhe ikwerenge-ntyale arlkerlenge  
alakenhe angkemele, “Ngkarte kwenhe tyerrtye  
areyenge anetyenhe. Re kwenhe itnekenge  
anetyenhe. Itne kwenhe ikwerenhe areye  
anetyenhe. Ngkarte kwenhe Re-arrpe itnekenge  
anetyenhe, Re Ngkarte itnekenhe anetyenhe.  
Re itnenhe mwantyele arntarnte-aretyenhe  
nhenge alartetye itnekenhe anthurre anemele.  
<sup>4</sup> Re alknultye alknge itnekenhe-ngentyele

arlkngetyenhe nhenge yanhe-ngentyele itne awethe alhwarrpe anetyakenhe anetyenhenge. Itne-arle awethe ilwetyakenhele anetyenhe nhenge akayale artnetyakenhe-arle anetyenhe, arrangketyakenhe anetyenhe, arnteme-arle awelhetyakenhe anetyenhe, arne areyele-arle tyerrtye areye alhwarrpele-anthetyartenge kele uyerreke.”

<sup>5</sup> Ngkarte anteme, chair mwerre akngerre yanhe ikwerele-arle anetyameke, atyenge angkemele, “Araye! The kwenhe lyete arne ingkirreke alkarle-ileme!” Re atyenge angkeke: “Nhenhe areye pipe-ke intelhe-ilye The ngkwenge ileke, unte-arle Ayenge-ante thenterlenge re akenhe aneme-arle. The kwenhe arne ingkirreke mpwareme nhenge ayenge-arle mpwaretyeke angkeke.”

<sup>6</sup> Re atyenge awethe angkeke, “The arne ingkirreke anthurre mpwareke Ayenge-arle angkeke-iperre. Ayenge kwenhe arrwekele anthurre aneme, arne anetyakenhenge-urrke, Ayenge itethe akwete aneke, Ayenge akwete anetyenhe nhenge arne ingkirreke uyerrlerenge. Ayenge-arle itethe akwete-ante anetyenhe. Awerrirraye, nhenge angwenhe apeke kwatyekwe angkethakwe-irrerlenge, kwatyekwe nhenge itethe-arle anthemeke, kele anteme The mwantyele-arle kwatyekwe antheme nhenge kwatyekwe pintye-ngentyele itethe-werne akngetyerlenge, itne antywetyenhenge akwete-ante anteme anemele. <sup>7</sup> Arrantherre apeke lterrke akwete arrentye-ketye aneme Atyenge-ketye artepe untyeme-irretyale anetyeke kele

The arrenhantherrenhe akwete mwantyele arntarnte-arerle-aneme. Ayenge Ngkarte arrekantherrenhe anetyenhe arrantherre kwenhe Atyenge-artweye areye arratyte anthurre anetyenhe. <sup>8</sup> Kenhe tyerrtye areye nhenge ateralthe-arle aneme, nhenge tyerrtye areye Ayenge-arle arratyte itelaretyakenhe anekeke, tyerrtye areye nhenge arne akurne-arle akwetethe mpwarerlte-anemeke, tyerrtye areye apure anetyakenhe nhenge tyerrtye arrpenhe areyenge-arle interremeke, tyerrtye areyele-arle arrwengkwelthele uthnemeke, tyerrtye areye nhenge ngkarte urrtyirrentye-arle tnakemeke, tyerrtye areye urrtyirreme-arle ilerle-apeme. Tyerrtye nhenhe ingkirreke kwenhe atherre-ngare ilwetyenhe; itne apmere ahelhe nhenheleke-amparre ilwetyenhe, urreke itne awethe ilwetyenhe, ure alkngenthe akngerrenge ure kwerte arntirte-arle ntyerle-anemeke.”

*Ayeye apmere alkarle Jerusalem-akerte*

<sup>9</sup> Itelareme alkere-arenye 7-pele apanthe 7-akerte, yanhe areyele kwenhe arne akurne ingkirreke-arle ahelhe-werne-atheke thelekeke. Alkere-arenye anyente yanhe areye-ngentyele apetyemele atyenge angkeke, “Mpe. The ngkwenge arelhe yanhe renhe imernetyenhenge \* anewe-arle-aketyenheke Yepe-yepe Akwerrke

---

\* **21:9** Arelhe yanhe re kwenhe tyerrtye areye-arteke aneme Christ-nge-arle akwete-ante anyente-irrekeke, yanhe thewe Yepe-yepe Akwerrke-arteke-arle anemeke. Itne kwenhe kwerrkipenhe ikwerenhe-arteke anetyenhe, ratherre anteme anewe-akerretyenhe

Ngkarte-kenheke.” <sup>10</sup> Kele Utmenge Ngkarte-kenhe atyenge-arleke irrpeke, alkere-arenyele anteme ayenge apwerte akertne anthurrewerne akngeke. Re atyenge apmere Ngkarte-kenhe-arrpe Jerusalem imerneke, alkere-ngentyele-arle apetyeke Ngkarte-ngentyele. <sup>11</sup> Apmere yanhe re kwenhe imparrkeye anthurre nhenge alkngenthe imparrkeye Ngkarte-kenhele, kelathe-arteke apeke arne iwenhe apeke atyeperre anthurre-arle apeke imparrkemeke alkngenthe atherrke-atherrke mwerre akngerre-akerte-arteke. <sup>12</sup> Kenhe arrkngerte akngerrele apmere yanhe utepe-akeke. Arrkngerte yanhe ikwerenge arriwe 12-akerte aneke, arriwe-arrpeke itweke alkere-arenye tnyame renhe ilpemele. Kenhe arriwe arrpe-anenheke arrpenhele intelhe-ileke-arle arritnye areye alere artwe Israel-kenhe areyeke. Alere 12-pele nhenhe areye-ngentyele Israel-kenheke-artweye areye-arle atningke-ame-atningke-irreke-arle, akwetethe anthurre-arle. <sup>13</sup> Arriwe 12-pele akenhe arrkngertenge alakenhe tnerrireke: urrpetye Ikngerrele tneke, urrpetye arrpenheme Antekerrele tneke, urrpetye arrpenheme Ayerrerele tneke, urrpetye arrpenhe Alturlele tneke. <sup>14</sup> Arrkngerte yanhe re apwerte athirnte 12 akertnele tneke. Kenhe arritnye artwe areye-kenhe apwerte athirnte yanhe areyeke aneke. Arrantherre itelareme, artwe twelve-pele Yepe-Yepe Akwerrkele-arle yernekeke angkentye ilerle-apetyeke, arritnye itnekenhe yanhe ikwerele aneke.

<sup>15</sup> Alkere-arenye atyenge-arle angketyameke



arne arratyentye arntwirrkeke gold-engentyele-  
 arle mpwarekeke, re arne yanhele apmere  
 akngerre yanhe arrkernetyeke, arrkngerte  
 iwenhe-atheke, arriwe iwenhe atheke, arlpentye  
 apeke, arlenge apeke irremeke. <sup>16</sup> Apmere  
 yanhe re square-arteke aneke, nhenge yarte  
 akngerre-arteke arrkngertele utepe-akeke. Re  
 arne arlpentye yanhe atningke-ngare ahelheke-  
 arleke arrerneke apmere yanhe arrkernetyeke.  
 Ikngerre-ampinyele arlpentye anthurre aneke,  
 kilometre 2,400-eke-atwetye. Alakenhe re-  
 anteye re arrkngerte-arrpe arrkerneke. Kenhe  
 antekerre-ampinyele arlpentye anthurre aneke,  
 kilometre 2,400-eke-atwetye. Kenhe ayerrere-  
 ampinyele arlpentye anthurre aneke, kilometre  
 2,400-eke-atwetye. Kenhe alturle-ampinyele  
 arlpentye anthurre aneke anteye, kilometre  
 2,400-eke-atwetye. Ahelhe-ngentyele akertne-  
 werne atheke apmere yanhe kilometre 2,400-  
 eke-atwetye anteye tneke. <sup>17</sup> Alakenhe re-  
 anteye re arrkngerte-arrpe arrkerneke, apmere  
 yanhele-arle utepe-akemeke, itne anteke  
 anthurre. Arrkngerte-arrpe, re metre 66-eke-  
 atwetye anteke aneke. <sup>18</sup> The areke arrkngerte  
 yanhe renhe mwerre akngerre anthurre-arle.  
 Arrkngerte apele nhenge apwerte atherrke-  
 atherrke-ntyale mpwareke-arle. Apmere re  
 mwerre akngerre anthurre anteye aneke,  
 re apele gold-engentyele mpwareke-arle, re  
 alkng pwarthyeme kelathele-arteke. <sup>19-20</sup> The  
 apwerte athirnte 12 areke arrkngerte kwene  
 ikwerele anerlenge arlkenye arrpenhe-akerte-  
 arle. Apwerte athirnte 12-ke apwerte atyeperre

areye aneke arkenye arrpenhe areye mwerre-akerte, arrpenheme atherrke-atherrke, arrpenhe areye alkere-alkere-arteke, arrpenhe areye mperlkere, arrpenheme athetheke, arrpenheme arrerlkere, arrpenheme urrperle anthurre aneke. Itne kwenhe ingkirreke arkenye mwerre akngerre anthurre aneke apwerte athirnte 12-eke-arlenge. <sup>21</sup> The areke arriwe 12-pele mwerre akngerre anthurre anteye aneke. Arrpenhele itnenhe apwerte mperlkere mwerre akngerrenge-ntyele mpwareke-arle apwerte nhenge pearl arritnye-arle. The areke anteye iwerre arlpentye apmere kwene yanhele mwerre akngerre anthurre interlenge nhenge gold-engentyele-arle mpwarekeke, re akenhe arrpenhe anthurre aneke, arrerlkere anthurre re aneke kelathe-arteke renhe akethe anthurre-arle areme nhenge ulkere.

<sup>22</sup> The akenhe tyaty akngerre apmere yanhe ikwerele aretyakenhe aneke tyerrtye areye-arle irrperlenge Ngkarte tnakewarreyeke Ngkarte-arle kwenhe Yepe-Yepe Akwerrke uthene yanhe ikwerele-arle anerle-anerreke. Tyerrtye ingkirrekele Renhe-atherrenhe akethe anthurre akwetethe arerlte-aneke. <sup>23</sup> Apmere yanhe rarle atnyentye apeke arlenge apeke pwarryetyeke ahentye anetyakenhe apmere yanhe ikweringe, Ngkarte Re-arrpe apmere yanheke alkngenthe anetyenhe, Jesus-inpe, Yepe-yepe Akwerrke-arle anemeke, re kwenhe alkngenthe itnekenhe anetyenhe anteye. <sup>24</sup> Kenhe tyerrtye ingkirrekele mwerre anteme untherlte-anetyenhe nhenge arltele-arteke

anerlenghe alkngenthe-arle Ngkarte-ngentyele-arle Yepe-yepe Akwerrke-ngentyele-arle itneke arrtyernerlenghe. Kenhe alartetye areye apmere arrpe-anenhe-ngentyele kwenhe apwerte ngkweltye-arlke, mantere-arlke, arne mwerre akngerre arrpenhe areye-arlke, apmere yanhe ikwere-werne akngetyetyenhe Ngkarte akertne utyernemele tnaketyeke. <sup>25</sup> Yanhe ikwerele kwenhe arlte akwetethe anerle-anetyenhe. Kenhe arriwe 12-pele kwenhe akwetethe altywere anerlte-anetyenhe. Arrpenhe areyele arriwe itnenhe altywere-ileme-ketye, rarle kwenhe ingwe-irretyakenhenge anetyenhe awethe. <sup>26</sup> Kenhe tyerrtye areye apmere arrpe-anenhe-ngentyele kwenhe apwerte ngkweltye-arlke, mantere-arlke, arne mwerre akngerre arrpenhe areye-arlke, apmere yanhe ikwere-werne Ngkarteke akngetyetyenhe Ngkarte-arle impene akngerre anthurre anerlenghe. <sup>27</sup> Itne kwenhe arne akurne areye akngetyetyakenhe anetyenhe arne mwerre akngerre areye-ante ware. Kenhe yanhe areyele arne akurne-arle mpwarerlte-anemeke, yanhe areye-arle urrtiyirremeke, apmere yanheke irrpetyakenhe anetyenhe. Kenhe Ngkarte-kenhe areye-ante ware irrpetyenhe, yanhe areye Ngkartenge-arle akwete-ante anetyenheke Yepe-yepe Akwerrkele-arle arritnye itnekenhe pipe-nge intelhe-ilekenge.

## 22

<sup>1</sup> Yanhe ikwere-iperrele anteme alkere-arenyele atyenge imerneke apmere alkarle

yanhe Jerusalem renhe, re atyenge imerneke lhere kwatye unterlenghe re kwenhe tyerrtye areye itethe akwete-ante anentye akngerre-iletayeke anetyenhe. Kwatye yanhe re alkngrlpe-alkngrlpe-irreke nhenge chair yanhe ikwerenge-ntyete thelelhomele nhenge Ngkarte uthene Yepe-Yepe Akwerrke uthene anerle-anerretyamenge. <sup>2</sup> Yanhe ikwerele aneke iwerre arlpentye akngerre anthurre nhenge anteke akngerre-arle apmere mpwepe yanhe ikwerele inteke. Kwatye yanhe re iwerre mpwepele unteke. Kenhe kwatye lhere iterele-ante atherrele akenhe arne atherre lyapeke, ratherre-arle kwenhe tyerrtye areye itethe akwete-ante anentye akngerre-iletayeke anetyenhe. Arne yanhe atherre kwenhe merne arrpenheke-arrpenhe 12-akerte itne interteke-interte arrateme atnyentye arrpe-anenhele. Kenhe tyerrtye areye apmere arrpe-anenhe-ngentyele irlpelhe arne yanhe atherre-ngentyele ineme kele nhenge itnenhe arlkwemele lterrke-irremele irlpelhe yanhe areyele rlkerte itnekenhe mwerre-ilemenge. <sup>3</sup> Kenhe tyerrtye akurne areye kwenhe apmere yanhele anetyakenhe anetyenhe, tyerrtye mwerre areye-ante apmere yanhe ikwerele Ngkartenge anetyenhenge.

Chair Ngkarte-kenhe, Yepe-Yepe Akwerrke-kenhe anteye apmere yanhe ikwerele anetyenhe, tyerrtye Ngkarte-kenhe areye, Ikwere-arle warrke-irrerlte-anemeke, itne Renhe tnaketyenhenge. <sup>4</sup> Itne kwenhe Renhe inngerre ularreke-ularre anthurre arerretyenhe, arritnye

Ikwerenhe urle itnekenhele intelhe-ileke-arle aneme. <sup>5</sup> Apmere yanhe ikwerele itne ure alkngenthe ahentye anetyakenhe anetyenhe ingwele-arle artintyetyakenhenge anetyenhe awethe. Alakenhe re-anteye itne kwenhe arlengeke itirretyakenhe itnenhe alkngenthe anthetyeke Ngkartele-arle itnenhene alkngenthe anthetyenhenge. Itne Ikwerenge alartetye-anteye anetyenhe akwete-ante re.

### *Jesus-arle apetye-ल्पetyenhe*

<sup>6</sup> Alkere-arenye anteme atyenge angkeke, “Awaye, angkentye nhenhe areye, Ngkartele-arle ngkwenge ilerneke, arratyte aneme, Re kwenhe arratyte mpwareme iwenhe-arle mpwaretyeke angkemele. Alakenhe re-anteye arrule an-thurre Ngkartele yanhe areyeke ileke, Renhe-arle awemele angkentye Ikwerenhe ilerlte-apetyarteke, iwenhe renhe angketyeke. Re alkere-arenye Ikwerenhe yerneke anteye tyer-tye areyeke imernetyeke Ikwere-arle warrke-irremeke arne ingkirreke urreke-ulkere irretyenhe.”

<sup>7</sup> Kenhe Jesus tyerrtye ikwerenhe areye ingkirrekeke angkeke, “Ayenge mwantyele awerrirraye! Ayenge kwenhe lyete ware apetye-ल्पetyenhe; Ngkartele kwenhe ingkirreke mwantye-mwantye-iletienhe angkentye Ikwerenhe-arle awerlte-anemeke nhenge tharle arrekantherre pipe nhenhenge imernekeke.”

<sup>8</sup> Ayenge kwenhe John aneme, the thewe arne nhenhe areye aweke-arle aremele anteye tharle pipe nhenhenge intelhe-ilekeke. Nhenge

the arne nhenhe areye aweke-arle-iperrele it-nenhe aremele anteye, ayenge iparrpe anthurre atnertenge-arlenge atnyeke alkere-arenye ingkele itwele intemele, arne nhenhe areye-arle atyenge imernetyameke the renhe tnaketyeke anteme. <sup>9</sup> Re akenhe atyenge angkerlenge, “Ayenge tnaketyale anaye, ayenge-arle warrkene Ngkarte-kenhe unte-arteke anteye! Ayenge kwenhe tyerrtye areye-arteke-anteye aneme angkentye Ngkarte-kenhe-arle awemele ilerle-apetyarteke, tyerrtye areye-arteke angkentye-arle pipe nhenhenge awerlte-anemeke. Unte Ngkarte-ante ware tnaketyeke!”

<sup>10</sup> Alkere-arenye anteme atyenge angkeke, “Angkentye nhenhe pipe-nge aneme kwenhe Ngkarte-kenhe. Arrpenhe areye-ketye alengke-iwetyale anaye. Kele anteye-arle alherlte-iwaye arrpenhe areyeke ayeye renhe ilerle-apemele itne renhe akethele awetyenhenge arne areye pipe kwene nhenhele-arle aneme kwenhe lyete ware irretyenhe arlte anteme tyerrtye areyeke urteke-irritneme nhenge utepe-irritnetyeke.

<sup>11</sup> Arlte yanhe-arle itwe-irremenge, tyerrtye areyele apeke arne akurne areye akwete mpwarerlte-anetyeke ahentye anemele, kele itnenhe ipmentye-iwe. Ngkartele lyete ware itnenhe arriletyenhe. Kenhe tyerrtye yanhe areye apeke arrpenhe areyenge-arle akwetethe anyelkngele interremeke, kele itnenhe ipmentye-iwe! Ngkartele lyete ware itnenhe arriletyenhe. Kenhe tyerrtye yanhe areye arne mwerre areye-arle akwetethe mpwarerlte-anemeke arraty mwerre-arle anerlte-anemeke itne

kwenhe arratye mwerre akwete anerlte-anetyeke mwerre akwete mpwarerlte-anetyeke anteye. Tyerrtye yanhe areye itneke-arrpe-arle arne akurne areye-ketye akalkelhe-ilelhekeke, alakenhe re-arteke akwete anetyeke.”

<sup>12</sup> Jesus anteme angkeke, “Awerrirraye! Ayenge kwenhe lyete ware apetye-alpetyenhe. Nhenge ayenge apetye-alpemele the arrenhantherrenhe ingkirreke court-eke ngkernetyenhe arrenhantherrenhe akalkelhe-iletaye. The arrenhantherrenhe mwantyele apayuthnetyenhe iwenhe apeke renhe arrantherre mpwareke-arle-akerte nhenge apmere ahelhe nhenhele anerlte-anemele. Nhenge the aweke-arle iperre iwenhe apeke renhe arrantherre mpwarekenge, mwerre apeke akurne apeke, ayenge anteme itirretyenhe arrekatherre nthakenhe-arle irretayeke.

<sup>13</sup> Ayenge kwenhe arrekwele-ipenhe anthurre aneme, arne anetyakenhenge-urrke, ayenge-arle itethe akwete-arle aneme, ayenge ingkernenye anthurre aneme anteye, nhenge arne ingkirreke anthurre uyerrerlengge ayenge akenhe itethe akwete-arle anetyenhe alakenhe re akwete.

<sup>14</sup> “Nhenge tyerrtyele mantere itnekenhe alheweme-arteke itne anteme mwerre alkarle-irrerlengge, alakenhe re-anteye nhenge itne utnengge alkarle atnyenemele akangkentye anetyenhe, alakenhe ikwerenge anteme itne merne ikwemeye arne yanhe-ngentyele arlkwetyeke tyerrtye areye-arle itethe akwete-ante atnyenetyeke, itne anteme arriwe yanhe ikwerenge irrpetyenhe apmere Jerusalem-

enge yanhe ikwerele itethe akwete-ante anetyenhe. <sup>15</sup> Kenhe yanhe areye arne akurne-arle mpwarerlte-anemeke kwenhe irrptyakenhele anetyenhe, itne-arle kwenhe arne akurne areye anthurre mpwarerlte-anemenge: Itne akngwelye areye-arteke aneme, arrpenhe areye artenge-iweme itnenhe rlkerte-iletayeke, itne arrpenhe areye mpwenye ikngwemele, itne arrpenhe areye irrerlknge atwetyarte, itne ngkarte urrtyrrentye areye tnakewarretyarte, itne ahentye anthurre aneme ingkirreke-arle akurne anemeke. Itne kwenhe akethele akwete-ante anetyenhe.”

<sup>16</sup> Jesus atyewe ikwerenhe areyeke angkeke, “The kwenhe alkere-arenye atyinhe arrekantherre-werne yerneke arrekantherre angketyeke alhetyeke apmere arrpe-anenhe-werne arrantherre-arle anemeke. Arrantherre King David itelareme arrule anthurre-arle anetyarteke, kele ayenge kwenhe ikwerenheke-artweye-ngentyele. Ayenge kwenhe kwerralye ingwenhe-ingwenhe arrtyernemele.”

<sup>17</sup> Kele Utmenge Akngerre uthene anewe Yepe-Yepe Akwerrke-kenhele uthene Jesus-eke angkeme, “Apetyaye!” Kenhe arrpenhe areyele apeke nhenhe renhe aweme itne kwenhe alakenhe-anteye angketyeke, “Apetyaye!”

Ye, nhenge angwenhe apeke kwatyeye angkethakwe-irrerleng, re apetyetyeke kwatyeye antywetyeke tyerrtye areye-arle itethe akwete-ante atnyenemeke, kwatyeye nhenge Ngkartele-arle mwantyele anthememeke.



*John-ele tyerrtye areye alkngarre-ileme pipe nhenhe-arle aremeke*

<sup>18</sup> Mwantyele awerrirraye! Ayeye nhenhe kwenhe Ngkarte-kenhe aneme. Alkere-arenye Ikwerenhele atyenge ileke nhenhe renhe alakenhe intelhe-iletyeke. Nhenhe kwenhe ayeye tyerrtye arrpenhe-kenhe anetyakenhele, arrangkwe-arle. Impene anthurre kwenhe re aneme. Kele ayenge John-arle, the anteme arrenhantherrenhe ingkirreke alkngarre-ileme. Ayeye nhenhe akngarte-iwetyale anaye arrpenhe-atheke, ayeye arrpenhe ikwerenge apurtelhe-iletyale anaye, arrangkwe-arle. Nhenge arrpenhele apeke ayeye nhenhe arrpenhe-werne akngarte-iweme, Ngkartele renhe rlkerte-akngerrele-antheme re uyarne anthurre itirretyehenge, yanhe areye-arteke, the pipe-ke intelhe-ileke-akerte. <sup>19</sup> Awethe-anteye the arrenhantherre alkngarre-ileme arrantherre arne iwenhe apeke renhe pipe nhenhe-ngentyele akngeme-ketye. Arrantherre apeke angkentye arrpenheme ware angkeme-ketye arrpenhe areyeke ayeye ingkirreke iletakenhele renhe akethelhe-iletakenhe apeke. Kenhe arrantherre apeke alakenhe mpwarerlenge, kele Ngkartele anteme arrenhantherrenhe merne ikwemeye arne yanhe-ngentyele anthetyakenhe tyerrtye areye-arle itethe akwete-ante atnyenemeke, Re arrenhantherrenhe arrkngerte-ileme apmere mwerre akngerre yanheke irrpeme-ketye, apmere yanhe nhenge tharle pipe-nge intelhe-ilekeke-akerte. Angkentye nhenhele

anwerneke ileme arne yanhe-akerte tyerrtye areye-arle itethe akwete-ante atnyenemeke. Apmere yanhe-akerte, arrantherre itelareme, apmere ameke-ameke yanhe-arle aneme. Kenhe arrantherre kwenhe apmere yanhe itelaretyakenhe anthurre aneme, arrantherre apeke angkentye ingkirreke nhenhe ilerlte-apetyakenhe aneme.

<sup>20</sup> Jesus angkeke “Angkentye nhenhe kwenhe arratyeh anthurre aneme.” Re-anteme angkeke “Ye, Ayenge kwenhe arratyeh anthurre apetyeh-alpetyenhe, lyete ware.” Ayenge John, the nhenhe aweke-arle-iperrele imerte angkirtneke, “Yewe, iparrpe apetyaye, Unte-arle kwenhe alartetyeh anwerne-kenhe anerlenghe.”

<sup>21</sup> Ayenge Ngkarte-kenhe atningkeke angkeme: Jesus Alartetyeh kwenhe arrenhantherrenhe akwetethe mwantyele arntarnte-arerle-anetyenhe, arrenhantherrenhe akangkentyeh-ilemele.

Yewe, kele yanhe ware the angkentyeh ileme.

**Angkentye Mwerre**  
**Portions of the Holy Bible in the Central and Eastern**  
**Arrente language of Australia**

copyright © 2002-2014 Wycliffe Bible Translators

Language: Eastern Arrente (Arrernte, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 11 Nov 2022 from source files dated 22 Nov 2019

26bd077a-984c-5596-a099-f37f2651f363